

Ti iwatyaj jém Apóstolyaj

Jesucristo ijycunúc iga icutsatpa Dios iAnama

¹ Mánamigo Teófilo, jém wintipic toto manjáyáy titam iwat Jesús y titam inquej dende wiñti ² hasta jém jama cuando químgacpa siñyucmi. Antes que químgacpa siñyucmi inquejáy jém apóstolyaj, jém icu-piñnewiip, ti wiap iwatyaj. Inquejáy con jém Dios iAnama. ³ Jesic cuando yaj iñasca jém yaachaji iga mu iccaata, iwiñquejáy eybic jém icuyujc#wiñ iga vivo. Cuarenta jama iwiñquejáy jém ipixiñtam wati veces iga iixyajiñ iga da caane. Inmadáy jutsap injac Dios jém ityajwiip yíp naxyucmi.

Jesús químpa siñyucmi

⁴ Tum jama cuando antuumaneyajum jém icuyujc#wiñ, jém Jesús inquím iga odoy putyajiñ jém attebet Jerusalén. Iñímáy iga:

—Anjooci hasta que cupacpa juuts mijycámayñe jém tanjatun Dios juuts ich mannímáyñe.

⁵ Mannímáy iga jém Xiwan acchíóypa con ni, pero da jáypa michiitamtap jém Dios iAnama.

⁶ Jesic jém antuumaneyajwiip icwácyajpa jém Jesús:

—¿Que yípti rato mojpá ininjac yíp tannaxyucmi Israel?

⁷ Jesús icutson, iñímáy:

—Michtam da wiap iñjodónata jucha ni júp jama iwatpa jém tanjatun Dios, iwatpa con ipimi juuts je ixunpa. ⁸ Pero mimichtam impictsonjámpa

jém Dios ipimi. Michiitamtap jém Dios iAnama iga wiap ininmadáy jém pixiñtam titam íñix iga ich anwatne. Mojpa ininmatta Jerusalén, icuwiti jém naxyucmi de Judea, hasta jém naxyucmi de Samaria, y hasta más juumi, icuwiti de yíp naxyucmi.

⁹ Cuando yaj inmadáy jém icuyujciwiñ, naquímta Jesús sinyucmi. Iganam síp iámyaj, ucsitogoy. Dam i más iix. ¹⁰ Iganam iámyajpa jut químpa Jesús sinyucmi, jeeti rato miñ iwaganateñ wisten pixiñ, agui popo ipuctucu. ¹¹ Iñímáy:

—MiGalileapic mipixiñtam, ¿tiiga miámquímnetá sinyucmi? Yíptim Jesús, jém químnewiip sinyucmi, jempictim miñgacpa eybic.

Cupiñta jém Matías iga tsíyíñ juuts jém Judas

¹² Jesic setyaj Jerusalén de jém cotsic iñiyi Olivos. Ijuumi juuts nimpa jém ley iga wiap tanwít tum jecuy jama. ¹³ Cuando núcyaj jém atebet Jerusalén, químyaj jém yucmipic piso. Tigiyyaj jém cuarto jém iñúcsneyajwiip. Jemum ittim Peto, Jacobo, Xiwan, Anti, Felipe, Tomax, Bartolo, Mateo, jém tungac Jacobo jém Alfeo imaníc, Ximój Zelote y Judas jém Jacobo itíwi. ¹⁴ Anjuumanejay iga seguido iwatyajpa oración con tumti ijixi. Jemum ittim jém yomtam; jém Malía, jém Jesús iapa con Jesús itíwítam.

¹⁵ Jesic tum jama iganam anjuumanejay, teñchucum jém Peto jém pixiñtámanjom, ityaj jem como ciento veinte. Nimpa jém Peto:

¹⁶ —Mimichtam mantíwítam, tienes que cupacpa jém Dios inmati juuts nim jém David cuando

inquejáy jém Dios iAnama ti miñpa. Inmatpa iga jém Judas ichijun̄cotpa jém Jesús iga matstaiñ. ¹⁷ Jém Judas it idic con aichtam jém docepic jém Jesús icuyujciwiñ. Tanwaganayoxatámpa idic. ¹⁸ Juyta tum jaca nas con jém tumiñ jém icoñwiyñewiip iga imalwadáy jém Jesús. Ocmi mutsneactiñ, tojansaj ipuu, cupudáy. ¹⁹ Cuando ijodónayaj ti iñasca jém Judas, jém Jerusalénpic p̄ixiñtam icniyayaj jém nas Acéldama. Jeeyaj inmatimi nimtooba jém nas jém niipiñ chowa. ²⁰ Porque nimpá jém Salmojom jut̄ jayñeta:

Da oomíypa ichíy jém iñas.

Da j̄ nicpā iti jem.

Nimpatim:

Tungac tsíypa iga iwatpa jém iyoxacuy.

²¹ Jesic nimpatim jém Peto:

—Siip tan̄cupiñpa tum de jém tanwaganaitwiip seguido cuando siiba tánomi Jesús con taichtam, ²² dende icchiñ jém Xiwan hasta químgac Jesús siñyucmi. Tum de taichtam tsíypa juuts tum testigo iga numa pisneum jém tánomi Jesús de jut̄ it jém caaneyajwiip.

²³ Jesic cupiñta wisten de jeeyaj. Tum jém José, iñiyi Barsabás, iñiyitim Justo. Jém tungac iñiyi Matías. ²⁴ Jesic los demás inwejpátayajpa Dios. Nimyajpa:

—Mánomi, mich iñixpigáypa itumpiy jém p̄ixiñtam ianama. Aunquejaayi jupp̄ic de yip wisten mich in̄cupiñ ²⁵ iga iwadiñ jém yoxacuy juuts jém apóstolyaj jém in̄cutsatnewiip. Togoy jém Judas iga tsam imalwat. Nic jut̄ ipictson̄pa jém icastigo.

²⁶ Jesic iwatyajpa tum sorteo. Icoñwíy jém Matías, cupineta. Accámta con jém once apóstolyaj.

2

Quando miñpa jém Dios iAnama

¹ Cuando núc jém jama de pentecostés, antuumaneyaj tumti lugar itumpiy jém icupicneyajwip Jesús. ² Jeeti rato imatonjaj tum mijpic anjiyi sinyucmi juuts tum mijpic sawa. Tsam pimi jupa. Tigiy jém injiyi ticjom jut coñyaj jeeyaj. ³ Jesic iixyaj jáyan juctianquiñi. Nawécta jém juctianquiñi, núcyaj cada tumtum jém pixiñtam icobacyucmi. ⁴ Ipictsonjaj jém Dios iAnama, tsam iniit ianamanjom. Mojpa inmat tungac anmatimi juuts ipimíypa jém Dios iAnama.

⁵ Jém tiempo antuumaneyaj Jerusalén jém Israelpic pixiñtam iga iwatyajpa juuts jém icostumbre iga iijisyajpa Dios. Miññeyaj de itumpiy nación icuwiti yip naxyucmi. ⁶ Cuando imatonjaj iga tsam pimi jupa, antuumaneyaj itumpiy jém pixiñtam. Tsam cinyaj, da icutihyiy ti iwatyajpa porque cada tumtum imatonj iga jiyajpa jeeyaj inmatimi. ⁷ Tsam ipooñanjamyaj, ámanjacyaj. Nanímayyajtáp entre jeeyaj:

—¿Que da itumpiy jém siippic jiyajpa Galileapic pixiñtam? ⁸ ¿Junim ammatontámpa iga jiyapa annuntaanmatimi? ⁹ Yim ittim jém pixiñtam de tungac naxyucmi. Miññeyaj de jém naxyucmi de Partia, de Media, de Elam, de Mesopotamia, de Judea, de jém naxyucmi de Capadocia, de jém Ponto y de jém naxyucmi de Asia. ¹⁰ Ittim de Frigia,

de Panfilia, de Egipto y de jém naxyucmi de África jém más juumiꝑic de Cirene. Ittim jém Romapic p̄ixiñtam jém yaguiñꝑic miññe. Ittim jém nunta Israelpic p̄ixiñtam y jém tuṅgacꝑic p̄ixiñtam jém moꝓw̄iꝑ icupic jém judíos inꝓuímayooyi. ¹¹ Ittim jém p̄ixiñtam de Creta y de Arabia. Ammatonṭa aichtampic anaṇmatimi iga aṇmadayyajpa jém w̄itampic cosa jém tawadayñew̄iꝑ Dios.

¹² Itumpiy agui ipooñanjamyaj. Da icutiꝑiy ti w̄iꝑ ij̄isyaj. Nacwácyajtaꝑ:

—¿Yíp ti nimtooba?

¹³ Pero tuṅgac ixaayiyyajpa. Nimpa:

—Yípyaj uꝓuiyaj.

Ti iñímáy Peto jém p̄ixiñtam

¹⁴ Pero jém Peto teñchucum con jém once apóstolyaj. Pimi jiy. Iñímáy jém aṇtuumaneyajw̄iꝑ:

—MiJudeapic mip̄ixiñtam con iñtumpiy jém miittanw̄iꝑ Jerusalén, w̄ijodónataami ti mannímáypa. Matonṭaami. ¹⁵ Yíp p̄ixiñtam da uꝓuiyaj juuts michtam iñjistámpa porque yaguiñ tait a las nueve de la mañana. ¹⁶ Iwatyajpa jempic porque asíam nimpa jém wiñicꝑic profeta jém Joel:

¹⁷ Jém inṇaṇpigam jama, nimpa Dios, anchiiba ánAnama jém p̄ixiñtam.

Michtam iñjaymanictam y jém iñyommanictam inṇmatyajpa ich anaṇmat̄i.

Jém woñjaychixtam iixyajpa poñ.

Jém w̄idaytam maꝓw̄iñayajpa.

- 18 Anchiiyajpa jém ánAnama jém acuyoxayajpáppic jém pixiñtam y jém yomtam iga inmatyajpa ich anañmati.
- 19 Sinycmi manañquejáypa jém impooñanjampáppic jém dapic oypa ñix.

Naxycmi manañquejáypatim seña.

Jém seña juuts nipiñ, juuts jucti, juuts ucsjoco.

20 Jém jama píchpa ichoca,

jém poya tsiypa juuts nipiñ antes que núcpa jém jama iga miñpa jém ñomi.

Jesigam agui wiquejpa jém Dios ipimi.

21 Jesic tanjatun Dios iciacputpa itumpiy jém inwejpátyajpáppic jém tánomi ñiyimi.

22 Nímtim jém Peto:

—MiIsraelpic mipixiñtam, amatónaytaami ti mannímáypa. Tsam wiquejpa mimichtámanjom iga Dios icutsat jém Jesús jém Nazaretpic pixiñ. Dios ichi ipimi iga wiap iwat jém dapic oypa tánix, jém wibic milagro y jém seña. Michtam inwijodontam. 23 Pero michtam da inwadáy caso iga Dios icutsat jém Jesús. Incijuncotta jém enemigo icijom. Ñasca jempic porque dende wiñigam ixunpa Dios iga mimichtam incijuncottámpa jém malopic pixiñtam icijom iga accaatañ cunusyucmi. 24 Pero Dios icpis. Iciacput. Porque da wiap iga caaneeba ichiy. 25 Jém wiñicpic anjagooyi David inmatpa de Jesús cuando nimpá: Siempre ánixpa jém ánomi añwiñjom. Awaganait aich iga odoy aciñiñ.

26 Jeeyucmi ich agui amaymay ánānāmanjom.

Anañmatpa jém wibic añmati porque agui amaymay.

Jeeyucmi da aciṅpa iga acaaba porque anjodon iga apispa.

²⁷ ManJatun Dios, mich da iñchacpa ánanama jém lugar jut it jém caaneyajwip.

Datim iñícpa iga púcpa imijtay jém micuyoxapáppic jém Cuáyñewip iAnama.

²⁸ Anaquejáy jém tun jém ananicpáppic jut ampictsonpa jém vida.

Agui amaymay iga nicpa awagaíti con mimich. Jempam nimpa jém David cuando inmatpa de Cristo.

²⁹ Jesic nintim Peto:

—Mantiwitam, tsam wiquejpa iga caaneum jém tanjatunwewe David, cumta jém tsaajosjom. Hasta sip yim it jém tsaajos. ³⁰ Pero jém David tum jém Dios inmatciwiñ idic. Ijodon iga Dios ijycamayñe iga tum jém iocmanic, jém naypáppic ocmi, jeam jém Cristo. Tsíypa juuts jém más mijpic anjagooyi. ³¹ Jém David iixñe ti miñpa dende wiñigam. Inmatpa iga pispa jém Cristo. Nimpa iga jém ianama da tsíypa jut it jém caaneyajwip, jém imijtay da púcpa. ³² Yiptim Jesús icpis jém tanjatun Dios. Aichtam antumpiytam ánixñeta. Jeeyucmi atsiyta juuts testigo. ³³ Ocmi nanicta sinyucmi jém Dios inwimi. Ipicton jém Dios iAnama juuts ijycamayñe iJatun. Jém sippic iñix y immatonne, jeetim Dios iAnama iwat. ³⁴ Porque da je jém David quim sinyucmi, pero nim jém David:

Jém tanjatun Dios iñimáy jém tánomi Cristo:

“Miñi micoñi anajwimi,

³⁵ hasta que ich manaccoñwíypa jém iñenemigo.”

³⁶ 'MiIsraelpic mipixiñtam, wijodónataami iga yíptim Jesús, jém michtampic inçunúnta cunusyucmi, Dios iccám jém tánQmi y jém Cristo.

³⁷ Cuando mimatonjaj ti nimpa jém Peto, agui anyácyaj ianamanjom jém pixiñtam. Tsam icwácyajpa jém Peto con jém tungac apóstolyaj. Iñimayyajpa:

—Mantiwitam, ¿ti wiap anwatta?

³⁸ Jesic ocmi jém Peto icutsoj. Iñimáy:

—Cucactaami iñjixi. Chiñtaami cada tumtum de mimichtam jém Jesucristo iñiyimi iga Dios miccáyáypa jém iñtánca. Jesic Dios michiiba jém iAnama. ³⁹ Wiñigam Dios ijycámayñe iga miwíwadáypa mimichtam y jém immanictam. Iwíwadáypatim jém ityajwip juumi con itumpiy jém iwianjamyajpáppic jém tanjatun Dios iga inwejáypa.

⁴⁰ Jém Peto inmadáypa jáyan anmati. Tsam pimi inquímpa jém pixiñtam. Iñimáy:

—Pictsontaami yíp wibic anmati iga miciaçputtamtap iga da inwagananicpa jém togoyñeyajwip.

⁴¹ Jesic jém ipictsonnewip jém wibic anmati acchinjajta. Jeetim jama tsam jáyan tigiyñeyaj, como tres mil pixiñtam.

⁴² Seguido icuyujcayajpa juuts inquejayñe jém apóstolyaj. Nawinanigayyajtap itumpiy de jeeyaj. Inwejpátayajpa Dios. Antuumayajpa iga iwécayajpa jém caxtánañi.

Iwínasçayajpa jém wiñtipic icupicneyajwip Cristo

⁴³ Cada tumtum de jeeyaj tsam icinpa Dios. Jém apóstolyaj iwatyajpa jáyan jém milagro y jém seña. ⁴⁴ Itumpiy jém icupicneyajwip Cristo ityaj de acuerdo. Titam iniityaj icumunmichiyaj. ⁴⁵ Imayyajpa titam iniityaj. Iwécyajpa jém tumiñ, ichiyyajpa jém dapic iniyyaj iga ijuypa titam itogóyáy. ⁴⁶ Cada jama antuumayajpa jém mijpic masticjom con tumti ijixi. Iwécyajpa jém caxtánañi tic por tic. Wagawícyajpa. Agui maymayyaj. Wibic jixi iniityaj jém ianamanjom. ⁴⁷ Tsam icujípyajpa Dios. Jém dapic icupicpa Cristo iwixyaypa jém icupicneyajwip Cristo. Cada jama jém tanjatun Dios inimiñpa jém pxiñtam jém iciacputpáppic iga más jáyanap jém icupicneyajwip.

3

Acpista tum cuxuj

¹ Tum jama nicyajpa jém Peto y Xiwan jém mijpic masticjom. Nicpa iwat oración a las tres de la tarde, jesigam jém hora de oración. ² Jesic tsacta tum cuxuj jém mastic anñaca. Je cuxuj mu iñay. Nanicta tum jém puerta inñaca iñiyi jém Wibic Puerta. Jenum tsacta cada jama iga iwágáyiñ tumiñ jém tigiyajpáppic jém mijpic masticjom. ³ Cuando jém cuxuj iix iga tigiyajpa jém Peto y jém Xiwan, iwágáy tumiñ. ⁴ Jesic jém Peto y Xiwan iámmatsyaj jém cuxuj. Jém Peto iñimáy jém pxiñ:

—Aámmatsi.

⁵ Jém cuxuj icupic, iámmats jém Peto. Ijispá iga ichiiba tumiñ. ⁶ Pero Peto iñimáy:

—Da anai plata ni oro, pero manchiiba jém anaitw̄ip. Jém Jesucristo de Nazaret iñiyimi mannímáypa: Tsucumi. W̄itim.

⁷ Ocmi jém Peto imatsáy ici, jém inw̄im̄ipic, ij̄ictsucum. Jeeti rato w̄itsiyum jém cuxuj ipuy. ⁸ Teñchucumum jém cuxuj, yóyquímpa, mojum w̄iti. Tigiy jém mast̄icj̄om con jeeyaj. W̄itpa, yóyquímpa, icujíppa tan̄jatun̄ Dios. ⁹ Itumpiy jém pixiñtam iix jém cuxujpic idic iga w̄itpam y icujíppa Dios. ¹⁰ Iixpicaypa iga jeetim jém pixiñ jém iwác páppic tumiñ jém mast̄ican̄aca jut it jém W̄ibic Puerta. Agui t̄ineanjacyaj, agui ipooñanjamyaj cuando iix ti iñasca jém pixiñ.

Titam iñmat jém Peto jém corredor de Salomón

¹¹ Jesic jém cuxuj, jém acpisnetaw̄ip, da ichac-tooba jém Peto y Xiwan. Poyimi miñyaj jém pixiñtam, an̄tuumayajpa jém Salomón icorredor jut ityaj jém Peto y Xiwan. Agui ámanjacyaj. ¹² Cuando iix iga agui an̄tuumayajpa jém pixiñtam jém Peto iñímáy:

—MiIsraelpic mipixiñtam, ¿tiiga am-pooñanjamtámpa, tiiga agui anámtámpa? ¿Que mich iñj̄is iga ich anacpis yíp pixiñ iga wiap anacwit con ich amp̄imi? ¿Que iñj̄ispa iga tsam w̄ibic apixiñ? Odoy j̄isi jemp̄ic. Porque Dios icpis. ¹³ Jém wiñcpic tan̄jatun̄wewetam jém Abraham, jém Isaac y jém Jacob tsam ij̄isyajpa tan̄jatun̄ Dios. Jeetim Dios siip iwat así iga tan̄cujíptamiñ jém iManic Jesucristo, jém michpic in̄cijun̄cotta jém anjagooyi icij̄om iga accaataiñ. Cuando jém Pilato icutsigaytooba idic, mimichtam da iñj̄icta.

14 Da inñícta iga cutsigaytaiñ jém wibic pixiñ jém ðapic táncaiy. Pero inwácta iga cutsigaytaiñ tum accaoypaap. 15 Jempam iniccaata jém tachiipáppic jém tamvida. Pero Dios icpis de jut it jém caaneyajwiip. Aichtam atsíyta juuts atestigo iga numa pisneum. 16 Yíptim Jesús inñiyimi acpista yíp pixiñ jém siipic inñix, michtam inñixpicta. Witsíy porque icupic iga jém Jesús wiap iyoxpát. Inñasca así jut inñampacneta.

17 'Mantiwitam, anjodon iga immalwadáy jém Jesús porque ða inçutiyyíy iga Dios icutsat. Datim icutiyyiyaj jém ininjagooyitam. 18 Itumpiy jém wiñicpic Dios inmatcwiñ nimyaj iga tienes que yaachwattap jém Cristo jém icutsatnewiip Dios. Siip Dios iccupacneum juuts nimyaj jeeyaj. 19 Jeeyucmi mannímáypa: Cucaci inñixi, tsaci iga immalwatpa, jesic jém tanjatun Dios miccáyáypa jém inñtánca. Michiiba tum wibic maymájaji inñanamajom, 20 micutsadáypa jém Cristo jém icupiñnewiip dende wiñigam para mimichtam. 21 Siip nic iti sinyucmi jém Jesucristo. Jenum tsíy hasta que iwitsacpa itumpiy cosa juuts nim jém wiñicpic anmatcwiñ jém cuáyñewiip. 22 Jempigam inñímáy Moisés jém wiñicpic tanjatunwewetam: “Jém tanjatun Dios ictsucumpa tum jém profeta entre mimichtam juuts acutsat aich. Matonñtaami itumpiy titam miñímáypa jém profeta. 23 Porque itumpiy jém ðapic iwadáypa caso yíp anmatcwiñ iga icupicpa, actogoytap, toptap de jém nación de Israel.”

24 'Itumpiy jém wiñicpic anmatcwiñ dende

jém Samuel hasta siip, inmatyajpa iga iwatpa Dios juuts tánixpa siip. ²⁵ Mimichtam injatunwewetam jém wiñicpic anmatcwiñ. Dios ijycámáy iga miwíwadáypa. Iwat tum trato con jém wiñicpic tanwewetam cuando inímáy jém Abraham así: “Tum jém mich immanic tsam iwíwadáypa itumpiy jém pxiñtam icuwiti yíp naxyucmi.” ²⁶ Cuando Dios icpis jém iManic Jesucristo, wiñti micutsadáy iga miwíwadáyíñ mimichtam. Ixunpa Dios iga inchaguiñ iga immalwatpa cada tumtum de mimichtam.

4

Nanicta jém Peto y Xiwan jém anjagooyi iwiñjom

¹ Iganam jém Peto y Xiwan inmadayyajpa jém pxiñtam, miñyay jém panijyay. Wagamiñyay con jém policía icomandante y con jém saduceoyaj.

² Tsam jóyñeyaj porque jém Peto y Xiwan inquejáypa jém pxiñtam iga acpístap jém caaneyajwiip porque pisneum jém Jesús de jut it jém caaneyajwiip. ³ Ocmi matstajém Peto y Xiwan, cottaj cárcel porque tsuuyim. Hasta icuquejama cipintap. ⁴ Pero tsam jáyan jém imatonneyajwiip jém Peto inmatí icupicyaj jém Cristo. Jeetim jama icupicyaj como cinco mil pxiñtam.

⁵ Icuquejama antuumayaj Jerusalén jém Israelpic anjagooyiyaj, con jém wídaytam, con jém escribaspic maestroyaj. ⁶ Ittim jém Anás jém cobacpic panij anjagooyi. Ittim jém Caifás, jém Xiwan, jém Alejandro y itumpiy jém cobacpic panij itiwitam.

⁷ Jesic cutsatta jém policía iga inimiñiñ jém Peto y Xiwan jém anjagooyiyaj iwiñjom. Acwácta:

—¿I ipimimi, i iñiyimi inwatpa jexpic cosa?

⁸ Jesic Peto tsam iniit jém Dios iAnama. Iñímáy:

—Mananjagooyítam, miIsraelpic miwídaytam,
⁹ mich anacwácpa jutsa mu iwíwadayta jém cuxujpic idic, jutsa micpista. ¹⁰ Siip mananmadáypa michtam inwiñjom iga itumpiy jém Israelpic pxiñtam ijodónayajiñ iga Jesucristo icpis yíp pxiñ yimpic it inwiñjom. Acpista jém Jesús iñiyimi, jém Nazaretpic. Jeetim pxiñ mimichtam inacunúnta cunusyucmi. Pero Dios icpis de jut it jém caaneyajwíp. ¹¹ Yíptim Jesús tsíy juuts tum wibic tsa para jém tic. Pero michtam, jém miticwattampáppic, impatsaytip. Pero siip yíptim tsa imatspacne jém tic. ¹² Da i tungac wiapaap taciacput icuwíti yíp naxyucmi. Dios da icutsat tungac pxiñ iga taciacputpa.

¹³ Jém anjagooyiyaj agui ipooñanjamyaj porque iix iga da cñpa inmat jém Peto y Xiwan. Icutiyyiyaj iga da cuyujne, siiba juuts cualquier pxiñ. Jesic icutiyyiyaj iga jáy iwaganasi jém Jesús. ¹⁴ Iixyajtim iga iwaganateñ jém cuxujpic idic, jeeyucmi da wiap iñim iga migooyi. ¹⁵ Quebacputta jém Peto y Xiwan con jém cuxujpic idic iga jém anjagooyiyaj wiañ ijisyaj ti wiap iwatyaj. ¹⁶ Jesic nanímayajta entre jeeyaj:

—¿Ti wiap tanwat con yíp pxiñtam? Porque itumpiy jém ityajwíp Jerusalén iwíjodón iga iwat tum wibic milagro. Da wiap tananyam. ¹⁷ Pero iga odom más juumi niguiñ yíp anmati, jesic

tannímáypa iga: Manchiiba tum mijpic castigo siiga seguido iniñmatpa yíp Jesús iñiyimi.

¹⁸ Jesic ocmi anwejayta jem Peto y Xiwan jem anjagooyicim. Nímayta:

—Odoy más anmatí jem Jesús iñiyimi. Odoy anmadaayi jem pixiñtam jexpic anquímayooyi.

¹⁹ Pero jem Peto y Xiwan iñímáy jem anjagooyi:

—Jistaami michtam iñyaac siiga más wí iga mancupicpa mimichtam o iga ancupicpa Dios.

²⁰ Aichtam da wíap antsacta iga anañmattámpa ti ánixne y ti ammatone.

²¹ Jesic eybic iñímayyaj jem anjagooyi iga ichiiba castigo siiga da ichacpa iga inmatpa. Pero da i wía michi castigo porque itumpiy jem pixiñtam tsam icujípyajpa Dios porque iix ti iñasca jem cuxujpic idic. Ocmi cutsigayta jem Peto y Xiwan.

²² Jem pixiñ jem wadayñetawip jem milagro, jem acpisnetawip, iniitum más de cuarenta iamtiy.

Jém icupicneyajwip Jesús iwágayyajpa Dios iga iyoxpádiñ

²³ Cuando cutsigayñetawum jem Peto y Xiwan, nicyaj jut it icompañeroyaj. Inmadáy itumpiy titam iñímayyaj jem panij anjagooyiyaj y jem Israelpic wídaytam. ²⁴ Cuando imatonyaj ti iñímáy jem Peto, itumpiy jem Jesús icuyujcwiñ con tumti jixi moj inwejpátayaj Dios. Nímyajpa:

—Manjatun Dios, mich inwat jem sin, jem nas, jem lamar y itumpiy jem itwip yim. ²⁵ Wiñigam jem incuyoxapaap jem David ijaychac mich iniñmati. Mich iñanama iyoxpát iga ijay. Iñímáy:

¿Tiiga tsam jóyñeyaj jém naciónyaj jém dapic icupicyajpa Dios?

¿Tiiga tsam ijsquímpa jém pixiñtam jém cosa da para ti wi, jém dapic i iyoxpátpa?

²⁶ An̄tuumayaj jém reyyaj con yíp naxyucmipic an̄jagooyi.

Nicyaj en contra de jém tan̄Jatun̄ Dios,
nicyaj en contra de jém Cristo jém icutsatnewiip Dios.

²⁷ Numa an̄tuumayaj yíp Jerusalén jém Herodes y jém Poncio Pilato, jém tungac pixiñtam jém dapic je de Israel con jém Israelpic pixiñtam. Nicyajpa en contra de jém wibic imManic Jesús jém michpic iniccám iga Ciacpudoypaap. ²⁸ Jeeyaj cupacpa iwatyaj juuts mich in̄jisne iga in̄ascaaba jém imManic. ²⁹ Siip man̄Jatun̄ Dios, ix̄i yíp pixiñtam. Niymaypa iga achiiba tum̄ mijpic castigo. Man̄cuyoxatámpa. Ayoxpáttaami iga wiap anan̄mat inin̄mati. Acamamwadaayi an̄anama iga odoy aciññiñ. ³⁰ Ach̄i jém impimi iga anacpispá jém mimnewiip, iga an̄watpa jém milagro y jém seña jém Jesucristo in̄iyimi, jém wibic imManic.

³¹ Cuando yaj in̄wejpátyaj Dios, pimi tsigóypa jém tic jut̄ an̄tuumaneyaj. Itumpiy jém pixiñtam tsam iniityaj jém Dios iAnama. Da c̄nyajpa iga in̄matpa jém Dios in̄mati.

Itumpiy cosa icumunm̄chiyaj

³² Itumpiy jém icupicneyajw̄ip tumti ij̄ixi y tumti ianama. Da i ijspa iga im̄chi icutum̄ titam iniityaj. Ijspa iga itumpiy cosa icumunm̄chiyaj.

³³ Jém apóstolyaj seguido in̄matpa iga pisneum jém

tánomi Jesús. Tsam wiap inmat porque Dios ichi jém ipimi y tsam tóyoyajpa. ³⁴ Da i jém yaachayajpáppic. Porque itumpiy jém iniitwiip iñas o itic, imáy iga inimiñpa jém tumiñ. ³⁵ Ipietson jém apóstolyaj, iwécyajpa, ichiiyajpa cada tumtum de jeeyaj iga ijuypa titam itogóyáy. ³⁶ It idic tum levitapic pixiñ iñiyi José. Nay jém isla de Chipre. Jém apóstolyaj iccámayaj iñiyi, Bernabé. Jém iñiyi nimtooba jém yoxpádoypaap. ³⁷ Yíp pixiñ iniit idic tum jaca nas, ocmi imáy. Inimiñ jém tumiñ, icijunꞑcodáy jém apóstolyaj icijom.

5

Jém Ananías y Safira itájca

¹ Jemum ittim tum pixiñ iñiyi Ananías con iwichomo Safira. Imáyajtım tum jaca nas. ² Pero yíp pixiñ inñec uxaj jém nas ichowa. Jém iyomo ittim de acuerdo con iwidaaya. Nımyaj iga yicsáꞑam ichowa jém nas. Jém pixiñ miñ ichagáy jém apóstolyaj ipuycim. ³ Jesic Peto iñímáy jém Ananías:

—MiAnanías, ¿tiiga tigiy jém Wocciwiñ iñanamajom iga immigóyáypa jém Dios iAnama iga iñnéctsiy uxaj jém nas ichowa? ⁴ ¿Que da immichi jém nas cuando danam immáyñe, cuando immáyñeum immichitim jém ichowa? ¿Tiiga iñjspa iga inwatpa jemꞑpic? Immigóyáy Dios, da immigóyáy tum pixiñ. ⁵ Cuando imaton ti nımpa jém Peto, actıj jém Ananías, jemti caanas. Jesic tsam pimi cınyaj itumpiy jém imatonneyajwiip ti iñasca jém pixiñ. ⁶ Tsucumyaj

jém woñjaychixtam, inmonyaj jém tsúts, nic icumyaj.

⁷ Cuando nasne tres hora, miñ jém Ananías iwichomo, da ijodon ti nasne. ⁸ Jesic jém Peto icwác jém yomo:

—Anímaayi, ¿numa jesáñam ichowa jém nas jut-sañ achi jém inwidaya?

Nim jém yomo:

—Numa jesáñam.

⁹ Jesic Peto iñímáy:

—¿Tiiiga inwatta de acuerdo con inwidaya iga incutítspa jém Dios iAnama? Jemum miñiyaj anšicmi jém oyñewiip icum jém inwidaya. Siip michgacti nicpa micum.

¹⁰ Jeeti rato actiñ jém yomo jém Peto ipuycim. Caanas. Cuando tigiyaj jém woñjaychixtam caaneum jém yomo. Itopyaj, nic icum tum lado jut cumneta jém iwidaya. ¹¹ Tsam pimi ciñneyaj itumpiy jém icupicneyajwiip Cristo con jém imatonneyajwiip ti iñascayaj.

Wattap jáyan jém milagro y seña

¹² Jém apóstolyaj iwatyaj jáyan jém milagro y seña jém pixiñtamanjom. An tuumaneyaj itumpiy de jeeyaj jém mijpic mastic icorredor iñiyi Salomón. ¹³ Pero jém dapic icupicpa Cristo ni tum da inpitsneyaj, pero tsam iwixyajpa jém Dios ipixiñtam. ¹⁴ Jém icupicneyajwiip Cristo más jáyanap. Jém pixiñtam y yomtám cada jama más icupicyajpa jém Dios inmati. ¹⁵ Itopyajpa jém mimneyajwiip con ichees. Nicpa ichacyaj calle iga cuando naspá jém Peto, ictsíyáyiñ jém

icumunçi algunos de jeeyaj. ¹⁶ Inimiñyajpatim jém mimneyajwıppic jém tungac attebetyaj jém ityajwıpp nocojom Jerusalén. Inimiñyaj jém mimneyajwıpp y jém imatsneyajwıpp jém mal espíritu. Cupısayyaj itumpıy.

Matsta jém Peto y Xiwan

¹⁷ Jesic jém cobacpic panij anjagooyi con jém iwaganaityajwıpp, jém saduceopic pixiñtam, tsam pımi icujóyıyyaj. ¹⁸ Matsta jém apóstolyaj, cotta cárcel. ¹⁹ Pero jeetim tsuu Dios icutsat tum sınyucmıpic pıxiñ iga íjáyıñ jém cárcel. Topta jém apóstolyaj. Nımayta:

²⁰ —Nıgı miteñi jém mıjpic mastıcjom. Anmadayyajı jém pixiñtam iga Dios ichiitooba jém jomıpic vida.

²¹ Cuando imatonyaj jém apóstolyaj, icuquejama, tsúytım, tıgıyyaj jém mıjpic mastıcjom, moj inquejáy jém pixiñtam.

Jesic jeetim jama antuumaneyaj jém cobacpic panij con itumpıy jém Israelpic anjagooyıyaj y jém wıdaytam iga iwatyajpa tum mıjpic junta. Pıımıyta jém policıa iga nıguıñ itopyaj cárcel jém presoyaj. ²² Pero cuando jém policıa núc jém cárcel, da ipátyaj jém preso. Jesic eybıc setyaj. Mıñ inmadáy jém anjagooyi. ²³ Nımyajpa:

—Cuando anúc jém cárcel tsam wıanpajne y jém guardia ichanwıwatne cuenta jém cárcel ipuerta. Cuando anánáy jém cárcel da i ampát.

²⁴ Cuando imaton ti inímáy jém policıa, agui ipooñanjamyaj jém panij anjagooyıyaj con jém

³³ Cuando imatonɣaj ti nɪmpa jém Peto, tsam jóyñeyaj jém anjagooyi. Tsam iccaayajtooba. ³⁴ Pero entre jeeyaj ittim idic tum fariseopic pɪxiñ in̄iyi Gamaliel. Tum accuyujoypaap de jém Israelpic anquímayooyi. Jém pɪxiñtam tsam iwixyajpa. Teñchucum, ipim̄iy jém policía iga iquebacpudiñ tum rato jém apóstolyaj. ³⁵ Ocmi in̄imáy jém anjagooyiyaj:

—MiIsraelpic mipɪxiñtam, nawattamtaji cuenta. Cuidado iga immalwadáypa yíp pɪxiñtam. ³⁶ Jistaami iga pecam tsucum jém Teudas, tum pɪxiñ tsiytip juuts tum mijpic anjagooyi. Initsucum como cuatrocientos pɪxiñtam. Ocmi accaata jém pɪxiñ y jém itún̄iyajw̄ip cutogóyayaj. Jemum cuyaj. ³⁷ Más ocmi cuando wattaɣ jém censo, tsucum jém Judas, tum Galileapic pɪxiñ. Initsucum tsam jáyaɣ pɪxiñtam. Pero ocmi accaataɣtim. Cupóyayaj itump̄iy jém itún̄iyajw̄ip. ³⁸ Jeeyucmi mannímáypa, tsaci yíp pɪxiñtam. Odoy mooḡiyi. Porque siiga yíp anquímayooyi pɪxiñtam ijxquimi, cuyajpa. ³⁹ Pero siiga yíp pɪxiñtam iniidáy Dios ijxi, mich da wiap inictogoy. Nawattamtaji cuenta. Cuidado iga in̄inatampa Dios.

⁴⁰ Jesic itump̄iy jém anjagooyiyaj icupicyaj juuts nim jém Gamaliel. Ocmi anwejayta jém apóstolyaj, cótsyajta, nímayyajta iga odoy más anmat̄i Jesús in̄iyimi. Ocmi cutsigayyajta. ⁴¹ Jém apóstolyaj putyaj jém anjagooyi iwiñjom. Agui maymayyaj porque Dios ijic iga yaachwatayta jém Jesús icuyucmi. ⁴² Jesic cada jama accuyujópa jém

mijpic masticjom y jém itiganjomyaj. Da ichacpa iga inmatpa jém wibic anmati iga Jesús je jém Cristo.

6

Accámta siete jém iyoxpátráppic jém apóstolyaj

¹ Jém tiempo tsam jáyanap jém Dios ipixiñtam. Icupicyajpatim jém griegopic pixiñtam. Jeeyaj agui jiyajpa acontra de jém Israelpic pixiñtam porque iñejawégáypa jém cunoytam iwíccuy cuando iwécpa jém wíccuy cada jama. ² Ocmi jém apóstolyaj in tuumawatyaj itumpiy jém icupicneyajwip jém Cristo. Inimayyaj:

—Da wi iga antsactámpa iga ananmatpa jém Dios inmati iga acwígoytámpa. ³ Jeeyucmi mantiwitam, métstaami siete de mimichtam jém wibic pixiñtam, jém jixiywip, jém tsampic iniit jém Dios iAnama. Accámtaami iga iwatpa jém yoxacuy iga iwécpa jém wíccuy. ⁴ Pero aichtam seguido ananwejpáttámpa Dios, anaquejpa jém Dios inmati.

⁵ Jesic itumpiy jém Dios ipixiñtam ityaj de acuerdo iga iwatyajpa juuts ninyaj jém apóstolyaj. Cupiñta jém Esteban. Jém pixiñ tsam iniit jém Dios iAnama. Cupinyajtatim Felipe, Prócoro, Nicanor, Timón, Parmenas y jém Nicolás. Jém Nicolás miñ de jém Antioquía. Je tigyñe idic iga icupicpa jém Israelpic anquímayooyi. ⁶ Ocmi namiñta icusiete jém pixiñtam hasta jut it jém apóstolyaj iga inwejpádáypa Dios para jeeyaj. Cada tumtum de jeeyaj jém apóstolyaj ichiccunúgáy icobac.

⁷ Jesic tsam jáyanap jém Dios inmati, núcpa yim jeexic. Tsam jáyanaptim jém Dios ipixiñtam

jém atebet Jerusalén. Waṭi jém Israelpic pañij icupicyajtim.

Matsta jém Esteban

⁸ Jém Esteban tsam iniit jém Dios ipimi y tsam iniit jém wibic tóyooyi. Agui iwatpa jém milagro y jém seña jém p̄ixiñtamanjom. ⁹ Jesic algunos jém p̄ixiñtam miñ iníñayaj jém Esteban. Miñyaj algunos de jém sinagoga de jém Libertinopic p̄ixiñtam. Miñyajtim de jém naxyucmi de Cirene, de jém naxyucmi de Alejandría, de jém Cilicia y de jém Asia. Moj in̄acayaj jém Dios in̄maṭi con jém Esteban. ¹⁰ Pero jém p̄ixiñtam da wiā micoñwíy jém Esteban porque tsam j̄ixiíy. Jém Dios iAnama iyoxpát iga tsam wiā micutsoñ. ¹¹ Jém añayajpáppic con Esteban iyojpa algunos p̄ixiñtam iga icumigóypa jém Esteban. Niñyaj:

—Ich ammaton̄ iga yíp Esteban imalnímáy jém Moisés in̄químayooyi. Tsam icujyypatim Dios.

¹² Jém añayajpáppic con Esteban icujíñáy jém p̄ixiñtam, jém Israelpic wídaytam y jém escribaspic maestroyaj. Icutuumacayaj jém Esteban, matsta, nanicta jém pañij anjagooyicim. ¹³ Ocmi inimiñyaj tuñgac jém miñgoypaap. Niñyaj:

—Yíp p̄ixiñ da ichacpa iga icujyypa jém tammastic. Tsam icujyypatim jém Moisés in̄químayooyi. ¹⁴ Ammatonta iga niñpa iga Jesús jém Nazaretpic p̄ixiñ imiswatpa jém tammastic y icucagáypa jém costumbre jém tatsagayñewiip Moisés.

¹⁵ Jesic itumpiy jém coñyajwip jem, agui iámyajpa jém Esteban. Iixyaj iga aŋcac jém iámooyi juuts tum sinyucmipic pixiñ.

7

Nacupujtaq jém Esteban

¹ Jesic jém cobacpic panij anjagooyi icwác jém Esteban. Iñímáy:

—¿Que numa inwat juuts ninyajpa?

² Jém Esteban iñímáy:

—Mantiwitam, minjagooyítam, amatonṭaami. Jém wibic tanDios iwiñquejáy jém wiñicpic taŋwewe jém Abraham. Iwiñquejáy jém naxyucmi de Mesopotamia cuando danam nicne iti jém naxyucmi de Harán. ³ Dios iñímáy: “Puti jém iññaxyucmi. Tsaci jém iñtiwítam. Nicsim jém naxyucmi iga manañquejáypa.” ⁴ Ocmi jém Abraham put jém naxyucmi de Caldea jut it idic. Nic iti jém naxyucmi de Harán. Jemigam ca jém ijaṭuñ. Ocmi Dios inimiñ jém Abraham hasta yim jut taitta sip. ⁵ Pero Dios da ichi ni tum jaça nas jém imichipic ni jut icteñpa ipuy. Pero ijycámayñe iga ichiiba jém nas y cuando caaneum, tsíypa jém nas para jém imanictam. Pero cuando ijycámáy iga ichiiba jém nas da iniñ imanic ni tum. ⁶ Dios iñímáy: “Jém immanictam nicpa jém tuŋgac naxyucmi. Nicpa iti juuts juumipic pixiñtam. Tsíyyajpa iga esclavo, yaachwatyajtaq cuatrocientos amtiy.” ⁷ Niimpatim Dios: “Ich anchiiba castigo jém pixiñtam jém ityajwip jém naxyucmi jut natsíyyajta iga esclavo. Jesic cuando

putyajpa jemíc, miñyajpa eybic yíp naxyucmi iga acuyoxap.”⁸ Dios iwat tum trato con jém Abraham. Inímáy iga iwadáyñ jém marca de circuncisión jém imanictam juuts tum seña iga Dios iwadayñe jém trato con jeeyaj. Jeeyucmi cuando nay jém imaníc Isaac, cuando iniitum ocho día, jém Abraham iwadáy imaníc jém marca de circuncisión. Ocmi cuando manigíyum jém Isaac, iwadáytim jempic jém imaníc Jacob. Ocmi cuando manigíyum jém Jacob iwadáytim jempic jém imanictam. Jém doce imanictam tsíyyaj juuts jatunpic de jém doce tribu de Israel.

⁹ Yíp Jacob imanictam jém wiñicpic tantiwitam tsam ijóyixyaj jém ijáyuc José. Iachiyaj imáychi jém ijáyuc jém tungac pixiñtam. Ocmi nanicta juumi jém naxyucmi de Egipto. Pero Dios iwaganait jém José.¹⁰ Iciacput de itumpiy jém yaachaji. Dios iyoxpát jém José iga tsam jixiíy iga iwixiñ jém Egiptopic rey jém Faraón. Ocmi jém Faraón iccám jém José iga gobernador de jém naxyucmi de Egipto. Chiitátim jém cargo iga injacpa jém ityajwip jém rey iticcim.

¹¹ Ocmi miñ tum mijpic yuu y tum mijpic yaachaji jém naxyucmi de Egipto y jém Canaán. Jém wiñicpic tantiwitam da ipátyajpa ti icútpa.¹² Pero cuando jém Jacob ijodóna iga it trigo Egipto icutsat imanictam, jém wiñicpic tantiwitam, iga ijuyyajpa jém trigo. Yíp jém wiñtipic viaje.¹³ Ocmi eybictim icutsat imanictam Egipto. Jesic jém tungac viaje jém José, jém máyñetawip wiñigam, injmadayyaj iachiyaj iga itíwi. Jesic jém rey Faraón

icutiŷyíy júp raza jém José. ¹⁴ Jesic José iñímáy itiwítam iga: “Namiñi jém tanjatun con itumpiy jém tantiwítam.” Jém miññeyajwíp setenta y cinco con itumpiy imanictam. ¹⁵ Jesic jempam iwat jém Jacob. Nic iti jém naxyucmi de Egipto. Ocmi jemigam ca jém Jacob. Más ocmi caayajtim jém imanictam jém naxyucmi Egipto. ¹⁶ Cuando ca jém Jacob, naseedayta iticmi jém ipacyaj jém attebet Siquem. Jenum cúmayta jém ipac tum tsaajosjom. Jeetim tsaajos ijuy wiñic jém Abraham. Imáychi tum pixiñ imanictam, iñiyi jém pixiñ Hamor.

¹⁷ 'Cuando núctooba jém tiempo iga cupacpa jém trato jém Diospic iwadayñe jém Abraham, jesic tsam jáyanap jém Israelpic pixiñtam jém naxyucmi de Egipto. ¹⁸ Ocmi tsucum tungac rey jém naxyucmi de Egipto jém dapic iixpicpa jém José. ¹⁹ Yíp anjagooyi tsam imigóyáy jém wiñicpic tantiwítam. Tsam imalwadáy jém tanjatunwewetam. Ipiimíy iga ichaguiñ jém imanictam, jém yaguiñpic nayñe, iga caayajiñ. ²⁰ Jesic jém tiempo nay jém Moisés, tum wibic tsixi, Dios tsam iwixpa. Jém ijatun icmijap tres meses iticim. ²¹ Ocmi jém ijatun ichac jém imanic iga caiññam. Jesic jém Faraón iyommanic ipin jém xutu tsixi. Icmijap juuts iñuntamanic. ²² Jeeyucmi jém Moisés tsam wicuyujne. Iwicutiŷyíypa itumpiy jém jixi jém itwíp Egipto. Jém Moisés tsam wiap iwat ti quej. Tsam wiap inmat.

²³ 'Cuando jém Moisés iniit cuarenta iamtiy, ijispa ianamanjom iga nicpa ijooyáy jém itiwítam jém Israelpic pixiñtam. ²⁴ Jenum iix tum Egiptopic

p̄ixiñ s̄ip imalwadáy t̄um Israelp̄ic p̄ixiñ. Jesic jém Moisés icupuj jém it̄iw̄i. Icca jém p̄ixiñ, ichégáy iga imalwadáy jém it̄iw̄i. ²⁵ Jém Moisés ij̄ispa iga jém it̄iw̄itam icutīiȳiñe iga Dios icutsat jém Moisés iga iccutsigáyiñ. Pero jeeyaj da icutīiȳyyaj. ²⁶ Jesic tun̄gagam j̄ama jém Moisés ipát w̄isten jém Israelp̄ic p̄ixiñtam s̄ip í̄n̄ayaj. In̄j̄iyjac. Iñímáy: “Odoy á̄n̄ataami con iñ̄t̄iw̄i. ¿T̄iiga minicótstamtap?” ²⁷ Ocmi jém á̄n̄ayajp̄ápp̄ic idic con it̄iw̄i agui ijóyix jém Moisés. Iñímáy: “¿I miccám juuts juez iga ananj̄iyjactámpa? ²⁸ ¿Que anaccaabatim aich juuts matic inicca jém Egiptop̄ic p̄ixiñ?” ²⁹ Jesic cuando imaton̄ ti n̄im jém p̄ixiñ, poy jém Moisés. Nic it̄i jém naxyucmi de Madián juuts t̄um juum̄ip̄ic p̄ixiñ. Jemum nay w̄isten ijaymanic.

³⁰ 'Cuando nasne cuarenta am̄tiy jém tits̄inaxyucmi, jém Moisés it idic nocoj̄om jém cotsic iñ̄iyi Sinaí. Jemum iix t̄um xutu cuy j̄ispa ixi. Jém juctj̄om iwiñquejáy t̄um s̄in̄yucm̄ip̄ic p̄ixiñ, jém icutsatnew̄ip̄ tan̄J̄atun̄ Dios. ³¹ Agui ipooñan̄jam cuando iix jém jucti. Cuando icunúc nocoj̄om iga iw̄iámpa, imaton̄ iga j̄iypa jém tan̄J̄atun̄ Dios. N̄impa: ³² “Ich jém wiñ̄icp̄ic p̄ixiñtam aDios. Ich jém Abraham aDios, jém Isaac aDios y jém Jacob aDios.” Jesic Moisés moj cuetsaayi. Agui c̄n̄, da w̄iap í̄n̄ámmoc jém jucti. ³³ Jesic jém tan̄J̄atun̄ Dios iñímáy jém Moisés: “Ts̄aci jém in̄ciac porque ȳim jut̄ miteñ ts̄am it jém Dios ip̄imi. ³⁴ Ich ánix̄ñe jém amp̄ixiñtam iga ts̄am yaachwatyajt̄ap jém naxyucmi de Egipto. Ammaton̄ iga agui wejyajpa. Jeeyucmi aquet naxyucmi iga an̄ciacputpa jeeyaj.

Jesic miñi, mañcutsatpa eybic jém Egipto juť miit idic.”

³⁵ Yíptim Moisés jém tsampic ijóyixyaj jém wiñicpic pixiñtam jém iñimayñewiip iga: “¿I miccám juuts minjagooyi y juuts mijuez?” Yíptim Moisés Dios iccám juuts tum anjagooyi iga iciacputpa jém ipixiñtam. Wiap iwat porque ichi ipimi jém siñyucmicpic pixiñ jém iixñewiip juť yótpa jucti jém xutu cuyyucmi. ³⁶ Yíptim Moisés itopyaj Egipto jém wiñicpic tantiwitam. Tsam iwat jém milagro y jém seña jém naxyucmi de Egipto, jém Tsabats Lamar y jém titsinaxyucmi juť jáy iti cuarenta amtiy. ³⁷ Yíptim Moisés iñimáy jém Israelpic pixiñtam iga: “Dios icutsatpa tuñgac profeta juutstim acutsat aich. Tsucumpa jém nunta tantiwitámanjom juuts ich atsucumne. Cupici ti nimpa.” ³⁸ Yíptim Moisés it idic con jém wiñicpic tantiwitam jém titsinaxyucmi cuando ijíyáy jém siñyucmi pixiñ jém cotsicyucmi Sinaí. Ipictsoñ jém vivopic Dios inmati iga tachiiñ taichtam.

³⁹ Pero jém wiñicpic tantiwitam da icupicyaj jém Moisés. Ijóyixyaj. Ijisyaj ianamanjom iga setpa eybic Egipto. ⁴⁰ Iñimayyaj jém Aarón: “Awadaayi tum watnas jém anquejaypáppic jém tun porque da tanjodoñ juť nic jém Moisés jém tatopnewiip jém naxyucmi de Egipto.” ⁴¹ Ocmi jém Aarón iwat tum watnas, tum xutu xix. Iccaayajpa jém animat jém watnas iwiñjom iga iwatpa sacrificio. Agui maymayyaj iga wiap iwat icimi jém watnas. ⁴² Ocmi Dios ichaganputyaj jém pixiñtam. Ichi lugar iga

ijisyajpa jém matsa y itumpiy cosa jém tánixpáppic
siñyucmi. Jempam ijaychacne jém librojom jém
wiñicpic añmatcwiñ. Nimpa Dios:

Mimichtam miIsraelpic mipixiñtam, mich da in-
icca jém animat iga añwadáy sacrificio iga
anchiiba ich añwiñjom
cuando jáy tawagaiñti jém titsinaxyucmi jém
cuarenta antiy.

⁴³ Inçópcóbóypa jém watnas Moloc con jém ipuc-
tucmastic.

Inisiibatim jém watnas Renfán imatsa
jém michpic inwatneta inçimi iga iñjistámpa.
Jeeyucmi mañquebacputtámpa jém iññaxyucmi.
Mañcutsattámpa más juumi de jém naxyucmi de
Babilonia.

⁴⁴ Nimpa jém Esteban:

—Jém wiñicpic tantiwitam inisiibatim jém puc-
tucmastic juñt accáytañ jém tsaatabla juñt jayñetañ jém
Moisés inquímayooyi. Jém puctucmastic iwat jém
Moisés juuts Dios ipimiy. Iwat juuts Dios inquejáy
jém cotsicyucmi. ⁴⁵ Jesic ocmi cuando caum jém
Moisés, jém wiñicpic tantiwitam con jém Josué
ipictsonyay jém puctucmastic juuts tum herencia.
Ininicyay jém tunçac naxyucmi iganam itobáyáy
jém tunçac pixiñtam iñas. Dios iquebacput jém
tunçac pixiñtam iga ichi jém nas jém wiñicpic
tantiwitam. Inisiyaypa jém puctucmastic hasta
cuando tsíy jém David juuts anjagooyi. ⁴⁶ Dios tsam
itoypa jém David. Je agui iwattooba tum mijpic
tic juñt itpa jém tanjatun Dios, jém ijispáppic jém
tanjatunwewe jém Jacob. ⁴⁷ Pero jém Salomón,
jém David imanic, iwadáy Dios tum tic, jém mijpic

mastic. ⁴⁸ Mex jém yucmipic Dios da ipa jém ticjom jém watnetawip cimi, juuts nim jém wiñicpic aṇmatciwiñ:

⁴⁹ Nimpa tanJatun Dios: Siṇyucmi it aṇcoñcuy.

Naxyucmi anaccámne ampuy.

¿Juutspic tic aṇwadaytámpa?

¿Jut it jém lugar jut wiap anej?

⁵⁰ ¿Que da ich aṇcimi aṇwat itumpiy jém yimpic ityaj?

⁵¹ Jesic jém Esteban iñímáytim jém aṇjagooyiyaj:

—Michtam tsam malotam iñanama juuts jém dapic icupicpa Dios. Jém iñtatsic da matóḡoypa, da inwattooba juuts miñímáypa jém Dios iAnama. Michtam mijextim juuts jém wiñicpic tantiwitam.

⁵² ¿Jupic jém wiñicpic profeta da imalwadáy jém wiñicpic tantiwitam? Iccaayaj jém wiñicpic aṇmatciwiñ jém inmatnewip iga miñpa naxyucmi jém Wibic Pixiñ jém icutsatnewip Dios. Siip jeetim pixiñ mich inwadayta atraición. Iniccaata.

⁵³ Michtam impictsonṭa jém Dios inquímayooyi jém taciḡjunṭodayñewip jém siṇyucmipic pixiñ, pero da inwatta juuts nimpa jém aṇquímayooyi.

Accaata jém Esteban

⁵⁴ Cuando imatonyaj jém pixiñtam ti nimpa jém Esteban, tsam ijóycayaj hasta ichiganjyyajpa itits jém Esteban icuyucmi. ⁵⁵ Pero jém Esteban tsam iniit jém Dios iAnama. Jesic ámqúim siṇyucmi, iix jut it Dios. Iixtim iga teñ jém Jesús jém Dios inwimi.

⁵⁶ Jesic iñímáy jém pixiñtam:

—Aami. Ich ánix iga ányáñe jém siñ. Ánix jém Píxiñ jém Miññewiip Siñyucmi. Siip teñ jém Dios inwimi.

⁵⁷ Pero jém píxiñtam innúcyaj jém itatsic. Pimi jiyajpa, poyimi miñyaj, in tuumacayaj jém Esteban. Imatsyaj. ⁵⁸ Itopyaj jém atebet, ininicyaj anšicmi. Inácscayaj tsaami. Moj iyigayyaj jém Esteban jém icumigoyñeyajwip iga icujyapa Dios. Ichagayyaj iyooti tum mañpíxiñ ipuycim, inyi Saulo, iga iwadáypa cuenta. ⁵⁹ Iganam síp iyigayyaj tsaami jém Esteban, inwejpát Dios. Nimpa:

—Mánomi Jesús, pictsoni ananama.

⁶⁰ Ocmi jém Esteban costeññeactiñ. Pimi jyapa. Nimpa:

—Mánomi, odoy tségayyaj yip píxiñtam itañca iga amalwadáy.

Yaj nimi, caum jém Esteban.

8

Jém Saulo tsam icpóyíypa jém icupicnewiip Cristo

¹ Jém Saulo it de acuerdo con jém iccaaneyajwip jém Esteban.

Jeetim jama jém ijóixyajpáppic moj ictsucumyaj iga pimi imalwadáypa jém Dios ipíxiñtam jém ityajwip Jerusalén. Itumpiy cupóyayyaj. Cunigayyaj yim jeexic hasta jém naxyucmi de Judea y Samaria. Tsíy Jerusalén no más jém apóstolyaj. ² Algunos jém wibic píxiñtam icum jém Esteban. Agui weyjajpa iga accaata jém píxiñ. ³ Jesic jém Saulo moj iyaachwatyaj jém Dios ipíxiñtam. Nicpa iméts tic por tic. Pimimi

ijicputpa jém p̄ixiñtam con jém yomtam. Icotyajpa cárcel.

Anmattap jém wibic anm̄ati Samaria

⁴ Pero jém cupóyayajw̄ip Jerusalén nic inmatyaj jém wibic anm̄ati jut quej. ⁵ Jesic jém Felipe, tum de jeeyaj, nic jém attebet Samaria. Jemum inmadáy jém p̄ixiñtam jém Cristo inquímayooyi. ⁶ An̄tuumayajpa itump̄iy de jeeyaj, imaton̄yajpa ti n̄mpa jém Felipe. Tsam iwadáypa caso cuando iixyaj jém seña jém iwatnew̄ip. ⁷ Porque acp̄isyajta tsam jáyan̄ jém iniitw̄ip idic jém mal esp̄iritu. Topta jém mal esp̄iritu. Tsam p̄imi an̄weja mu iput. Acp̄isyajtatim jém tusacaneyajw̄ip icum̄ij y jém cuxujyaj. ⁸ Jeeyucm̄i itump̄iy jém ityajw̄ip jém attebet tsam maymayyaj.

⁹ Pero it idic jém attebet tum p̄ixiñ in̄iyi, Ximoj. Icuycane jém magia iga in̄awatwadáypa jém itiw̄itam. Tsam imigóyáypa jém p̄ixiñtam. N̄mpa iga: “Ich tum ap̄ixiñ tsam awīap.” ¹⁰ Itump̄iy jém p̄ixiñtam tsam iwadáypa caso. Icup̄icyajpa jém cuyujnew̄ip y jém dap̄ic cuyujne. N̄myajpa:

—Ȳip p̄ixiñ iniit jém Dios ip̄imi.

¹¹ Tsam iw̄icup̄icyajpa porque dende wiñigam imigóyáypa jém p̄ixiñtam con jém magia. ¹² Pero jesic jém Felipe inimiñ jém wibic anm̄ati iga Dios injactooba ȳip naxyucm̄i y iga wīap taciaput jém Jesucristo in̄iyimi. Tsam icup̄icyaj jém p̄ixiñtam y jém yomtam. Acchin̄yajta. ¹³ Jesic jeetim Ximoj, jém nawatp̄ic idic, icup̄ictim. Acchin̄ta. Mojum itún̄jy jém Felipe. Agui ipooñanjampa cuando iix jém milagro y jém seña juuts iwatpa jém Felipe.

14 Jesic cuando jém apóstolyaj jém ityajw̄ip Jerusalén ijodónayaj iga jém Samariapic pixiñtam ipictsonyaj jém Dios inmati, icutsat jém Peto y Xiwan Samaria. 15 Cuando núcyaj jém Samaria, moj inwejpádáy Dios para jém icupicneyajw̄ip Cristo iga ipictsóñiñ jém Dios iAnama. 16 Porque ni tum de jeeyaj danam ipictsonne jém Dios iAnama. No más acchinneyajta jém tánomi Jesús iniyimi. 17 Jesic jém Peto y Xiwan ichigáy jém pixiñtam icobac con ici. Jempam ipictsonyaj jém Dios iAnama.

18 Jesic jém Ximój, jém nawatpic idic, cuando iix iga chiñta jém Dios iAnama cuando jém apóstolyaj ichigáy jém pixiñtam icobac con ici, 19 inímáy:

—Manyojpa. Achitim jexpic pimi mex aich iga cuando antsigáypa tum pixiñ icobac con anci, jesic ipictsonpatim jém Dios iAnama.

20 Jesic jém Peto inímáy:

—Miwagatogóyiñ con jém inñtumiñ porque inñjspa iga jém Diospic tachiiba w̄iap inñjuy con tumiñ. 21 Mich da iniñ derecho iga inñwatpa jém Dios iyoxacuy ni da miw̄iap porque da w̄i jém inñanama jém Dios iwiñjom. 22 Tsaci jém malopic jixi. Anwejpaati tanjatun Dios siiga w̄iap miwadáy perdón jém inñtanca jém inñjnew̄ip inñanamanjom. 23 Porque ánix iga tsam iniñt jém kujóyiyooyi inñanamanjom juuts jém chuxñiwi tsampic tam. Jém malopic jixi michenne.

24 Jesic jém Ximój inímáy jém Peto:

—Anwejpáttaami Dios para ich iga odoy ti anascain juuts mich annímayñe.

²⁵ Jesic yaj inmat jém Dios inmati jemíc, setyay jém Peto y Xiwan Jerusalén. Nasyajpa wati jém tiganjoi jém naxyucmi de Samaria. Inmatyajpa jém wibic anmati iga Dios taciacputpa.

Jém Felipe ipát jém Etiopíapic p̄ixiñ

²⁶ Jesic ocmi Dios icutsat tum sinyucmipic p̄ixiñ. Inimáy jém Felipe:

—Tsucumi. Nicsim antsapsaumi. P̄ici jém Gaza cutuñ, jém tsucumnewip Jerusalén.

Naspa jém tuñ jém titsinaxyucmi. ²⁷ Jesic jém Felipe tsucum. Nic. Tunjom ipát tum Etiopíapic p̄ixiñ. Capun p̄ixiñ. Mijpic anjagooyi jém p̄ixiñ, tesorero. Iccáyáypa jém yompic anjagooyi itumiñ. Jém yomo injacpa jém naxyucmi de Etiopía. Iniyi jém yomo Candace. Jém p̄ixiñ oy Jerusalén iga ijspa Dios. ²⁸ Settim idic iticmi, coñ jém icarretajom, síp imay jém libro jém ijaychacnewip jém Isaías jém wiñicpic profeta. ²⁹ Jesic jeeti rato jém Dios iAnama inimáy jém Felipe:

—Cunuuci jém carreta, wagananici.

³⁰ Póyan̄tsucum jém Felipe, cuando icunúc noco, imatoñ iga síp imay jém libro jém ijayñewip Isaías. Jesic jém Felipe icwác jém capun p̄ixiñ, inimáy:

—¿Incutiñyíy ti síp immay?

³¹ Jém p̄ixiñ inimáy:

—¿Jutsap ancutiñyíy siiga da i anquejáypa? Miñi tawagacoñi yip carretajom.

³² Jem jut síp imay jém Dios inmati n̄mpa así: Nanicta jém p̄ixiñ, accaata juuts tum borrego

juuts tum mañborrego da aṇwejpa cuando cupoodatap,
jesanetim jém p̄ixiñ datim j̄yapa.

³³ Tsam p̄imi yaachwatta,
chiita castigo, pero da i ic̄ip̄iṇ.
¿Jém imanictam, i wiap inmadáy
porque da jáypa cuyajpa ivida ȳip naxyucmi?

³⁴ Jesic jém capun p̄ixiñ icwác jém Felipe. Iñímáy:

—¿Anímaayi, ti nimtooba ȳip aṇmaṭi? ¿Jém wiñicp̄ic profeta, inmatpa de iyaac o inmatpa de tungac p̄ixiñ?

³⁵ Jesic jém Felipe moj inmadáy jém aṇmaṭi jém siippic imay. Inmadáy jém wibic aṇmaṭi de Jesús.

³⁶ Iganam waganicyajpa, núcyaj tum lugar jut it ni.
Jesic jém capun p̄ixiñ iñímáy jém Felipe:

—Ȳim it ni. ¿Que ich da wiap anacchiṇ?

³⁷ Jém Felipe iñímáy:

—Siiga incupicpa con itumpiy iñanama, wiap manacchiṇ.

Jesic jém p̄ixiñ iñímáy Felipe:

—Ich ancupicpa iga Jesucristo je jém Dios iMañic.

³⁸ Ocmi icteñ jém icarreta. Quetyaj, tigiyay jém niicim. Jém Felipe icchiṇ jém anjagooyi. ³⁹ Cuando putyaj jém niicim, jém Dios iAnama ininic jém Felipe. Jém anjagooyi da más iix. Mojum niqui, tsam maymay. ⁴⁰ Jesic páttā jém Felipe jém attebet Azoto. De jem moj niqui. Inmatpa jém wibic aṇmaṭi itumpiy jém attebetyaj hasta núc jém attebet Cerea.

9

*Jém Saulo cuando moj icupic Jesús
(Hch. 22:6-16; 26:12-18)*

¹ Jesic jém Saulo seguido imalwadáypa jém tánQmi ipixiñtam. Tsam icumecpa iga iccaaba. Jeeyucmi nic iám jém cobacpic panij anjagooyi. ² Nic iwác tum toto iga wiap itigiyyaj jém sinagogayaj jém ityajwip jém attebet Damasco iga icuámpa jém icupicneyajwip Cristo, jém pixiñtam y yomtam iga imatspa y ininicpa Jerusalén. ³ Iganam niqui jém Saulo tunjom, cuando núctooba jém attebet Damasco, iix tum jucti tsam pimi tsocpa sinyucmi. ⁴ Jesic jém Saulo actiη naxyucmi. Imatonη tum jiyi. Nímaytap:

—Saulo, Saulo, ¿tiiga anacpoypa?

⁵ Jesic jém Saulo icwác. Nímpa:

—¿Mijapaap, mánQmi?

Jém jiyi icutson. Nímpa:

—Ich aJesús jém michpic siip anacpoy. Iñyaactim siip inimalwadayta. Mijex juuts jém yunta jém iñeppápic jém ichenóycuy inquiñi.

⁶ Jém Saulo tsam pimi cuetsáypa porque agui cηne. Nímpa:

—¿MánQmi, ti iñxunpa iga anwatpa?

Jesic tánQmi iñímáy:

—Tsucumim, nici yíp attebet Damasco. Jenum miñímáytap ti wiap inwat.

⁷ Jém pixiñtam, jém iwagananicpáppic jém Saulo, tsam pimi cη porque imatonη jém jiyi, pero da i iix.

⁸ Ocmi tsucum jém Saulo jut actiηne idic naxyucmi. Tojne jém iixcuy, pero da ixixóypa. Matsayta ici,

jicteñta. Nanicta jem atebet Damasco. ⁹ Jemum tucunajama da ixixóypa. Da wíc ni da níc.

¹⁰ It idic Damasco tum p̄ixiñ iñiyi Ananías, icupicnetim Cristo. Iwiñquejáy tánomi juuts tum poñ. Iñímáy:

—¡Ananías!

Jesic jem p̄ixiñ iñímáy:

—Yim ait, mánomi.

¹¹ Jesic iñímáy jem tánomi:

—Tsucumi. Nici jem calle iñiyi Numa, hasta jem Judas iticim. Acwaaci tum p̄ixiñ de Tarso iñiyi Saulo, síp inwejpát Dios. ¹² Jem Saulo iixtim tum poñ. Iix iga miñpa tum p̄ixiñ iñiyi Ananías, tigypa jem ticjom, iccámpa ici jem Saulo icobacyucmi iga eybictim ixixóyiñ.

¹³ Jesic imaton jem Ananías, iñímáy jem tánomi:

—Mánomi, tsam jáyan p̄ixiñtam anmadayñe ti iwat yíp p̄ixiñ iga tsam imalwadáy jem impixiñtam jem micupicneyajwiip jem atebet Jerusalén. ¹⁴ Siip núcneum yim con jeetim orde jem ichiñewiip jem cobacpic panij iga imatspa itumpiy jem inwejpátpápic Dios mich iñiyimi.

¹⁵ Jesic jem tánomi iñímáy jem Ananías:

—Siip nicsim. Ich ancupin yíp p̄ixiñ iga inmadáyñ ich anañquímayooyi jem tunzacpic p̄ixiñtam, jem tunzac naxyucmi ireyyaj y jem Israelpic p̄ixiñtam iwiñjom. ¹⁶ Ich anañquejáypa iga tsam p̄imi yaachwattap yíp p̄ixiñ ich ancuyucmi.

¹⁷ Ocmi jem Ananías nic jem ticim jut it jem Saulo. Tigiy, iccám ici icobacyucmi. Iñímáy:

—Mantıwı Saulo, jém tánOmı Jesús miwiñquejáy iganam mimiñpa tunjom. Sıip acutsat iga wıap iñixixóy eybıç y iga tsam iniidiñ jém Dios iAnama.

¹⁸ Jeeti rato actıñ iixcuyyucmi juuts tıipı iñaca, wıawum miixixóy eybıç. Jesıç ocmi tsucum jém Saulo, acchınta. ¹⁹ Ocmi wıcum, eybıç ipıctson ipımi. Tsıy juna jama con jém icupıçneyajwııp Cristo jém attebet Damasco.

Jém Saulo inmatpa jém wıbıç anmati Damasco

²⁰ Ocmi moj inmat jém wıbıç anmati jém sinagoga. Inmadáy jém pıxiñtam iga Jesús je jém Dios iManıç. ²¹ Itumpıy jém imatonjajpáppıç tsam ipooñanjamyaj. Nimyajpa:

—¿Que da yıptim pıxiñ jemıç Jerusalén tsam icpoy jém inwejpátpáppıç Dios jém Jesús iñiyımi? ¿Que da yıptim pıxiñ sıp miñne yım iga imatspa jém pıxiñtam y inıncpa jém panıj anjagooyıçım?

²² Pero jém Saulo más pımi inmatpa jém Dios inmati. Je da cınpa. Inquejáypa iga Jesús je jém Cristo hasta imıswadáy ijıxi jém judıos jém ityajwııp Damasco.

Cııput Saulo jém attebet Damasco

²³ Cuando watña jama it jém Saulo, jém judıos iwatyaj acuerdo iga iccaayajpa. ²⁴ Pero ocmi jém Saulo ijodóna iga tsucım y sıñni jém ienemigo inteñne jém puerta anaca iga iccaaba cuando putpa jém attebet. ²⁵ Pero jém icupıçneyajwııp Cristo icotyaj jém Saulo tum mıjpic coonjom. Ijımquetyaj tsucım jém taañi iweñtan. Jempam cııput.

Jém Saulo nic Jerusalén

²⁶ Cuando núc jém Saulo jém Jerusalén, tigiytooba idic jut antuumaneyaj jém icupicneyajwip Cristo. Pero itumpiy jém pixiñtam tsam icinyajpa. Da icupicpa iga jém Saulo numa icupicneum jém Cristo. ²⁷ Pero jém Bernabé iwagananic jém Saulo. Nic icwiñquej jém apóstolyaj iwiñjom y inmadáypa jutsa miix jém Saulo jém tánomi tunjom y jutsa mijiyáy. Inmadáypatim iga jém Saulo da cinpa inmat jém Damasco jém Jesús iñiyimi. ²⁸ Jesic jemum tsíy Jerusalén jém Saulo. Mojum iwaganasiyay jeeyaj. ²⁹ Seguido inmatpa jém Dios inmati jém tánomi iñiyimi. Da cinpa. Anmatmatneyajpa, áñayajpa con jém Israelpic pixiñtam jém iyiyajpáppic jém griego anmati. Pero jeeyaj tsam iccaayajtooba jém Saulo. ³⁰ Cuando ijodónayaj jém tantiwitam, nanicta Saulo jém attebet Cesarea y de jem cutsatta hasta iticmi jém attebet Tarso.

³¹ Jesic da i imoogíypa jém Dios ipixiñtam icuwiti jém naxyucmi de Judea y de Galilea y de Samaria. Jesic más iwicutiyyiyajpa Dios inmati jém icupicneyajwip Cristo. Tsam iwíwatyajpa porque tsam icinpa tánomi. Dios iAnama iyoxpátpa iga tsam jáyanap jém Dios ipixiñtam.

Acpista jém Eneas

³² Jesic jém Peto nicpa ijooyáy jém tantiwitam yim jeexic. Nictim ijooyáy jém icupicneyajwip Cristo jém attebet Lida. ³³ Jemum ipát tum pixiñ iñiyi Eneas. Ocho antiy mimne icheesmi. Tusacane icumij. ³⁴ Jesic jém Peto iñímáy:

—Eneas, Jesucristo micp̄ispa. Tsucumi. Piñi jém immoncuy.

Jesic jeeti rato tsucum jém Eneas. ³⁵ Jesic itumpiy jém p̄ixiñtam jém ityajw̄ip jém attebet Lida y Sarón iixyaj iga p̄isneum. Ichacyaj jém wiñicpic anquímayoooyi, moj icupicyaj jém tánQmi.

Acp̄ista jém Dorcas

³⁶ Jeetim tiempo it idic jém attebet Jope tum yomo icupicnetim Cristo. Iñiyi Tabita. Jém anmat̄imi griego nimtooba Dorcas. Yíp yomo tsam iw̄iwatpa, iyoxp̄atpa jém yaachayajp̄appic. ³⁷ Jesic jeetim tiempo mimneact̄ij jém yomo, ocmi ca. Jesic acch̄ñayt̄a jém im̄j̄tay. Nanict̄a tum cuarto jém tun̄gac pisoyucmi. ³⁸ Jém attebet Jope da juumi de jém attebet Lida. Cuando imatonyaj iga it jém Peto jém attebet Lida, jém icupicneyajw̄ip Cristo icutsatyaj w̄isten p̄ixiñ iga niguiñ in̄wejay jém Peto. Iñimáy:

—Jicsciy n̄ici jém Jope.

³⁹ Jesic nic jém Peto con jém miññeyajw̄ip in̄wejay. Cuando núc jém Jope, nanict̄a jém cuarto jut it jém tsúts jém yucm̄ipic piso. Itumpiy jém cunoytam in̄tuumacaneyaj. Tsam wejyajpa. In̄quejayyajpa jém Peto jém w̄ibic tecxi y yooti jém in̄únw̄ip jém Dorcas cuando vivonam. ⁴⁰ Jesic Peto in̄imáy iga pudiñ itumpiy jém ityajw̄ip cuartojom. Costeññeact̄ij, moj in̄wejpát Dios. Iámseedáy jém yomo jém caanew̄ip, in̄imáy:

—Tabita, tsucumi.

Jesic jém yomo ictoj iixcuy. Cuando iix jém Peto, coñchucum. ⁴¹ Jém Peto imatsáy ici, ij̄ict̄sucum.

Inwejáy jém tantiwítam y jém cunoytam. Inquejáy iga pisneum. ⁴² Icuwítí jém atebet Jope imatonjaj ti inasca jém yomo. Tsam jáyan icupicyaj jém tánomi. ⁴³ Tsíy jém Peto jém atebet Jope watña jama tum pxiñ iticim. Inyi Ximoj jém pxiñ, icinpápic cuero.

10

Jém Peto y Cornelio

¹ It idic jém atebet Cesarea tum pxiñ inyi Cornelio. Capitán idic, injacpa tum batallón, jém grupo inyi jém Italiano. ² Yip pxiñ ijisyajpa Dios con itumpiy jém ichixtam y itiwítam. Icinjajpa Dios. Ichiiba tumiñ jém yaachayajpápic iga iyoxpátpa. Siempre inwejpátpa Dios. ³ Tum jama como las tres de la tarde iix tum poñ. Inuntawix iga tigiy hasta jut it jém Cornelio tum sinyucmipic pxiñ jém icutsatnewip Dios. Inímáy:

—¡Cornelio!

⁴ Jém Cornelio agui iámpa jém sinyucmipic pxiñ, tsam pimi cine. Jesic icwác. Nimpa:

—¿Tí, mánomi?

Jesic jém sinyucmipic pxiñ inímáy:

—Dios mimatónayneum jém inoración. Ijodon iga agui inyoxpátpa jém yaachayajpápic y Dios tsam iwianjam. ⁵ Sip cutsati algunos pxiñtam jém atebet Jope iga inwejáypa tum pxiñ inyi Ximoj, iniyitim Peto. ⁶ Yip pxiñ it jém tungac Ximoj iticim jém icinpápic cuero. It jém lamar anaca. Jém pxiñ minmadáypa ti wip inwat.

⁷ Jesic nic jém siñyucmipic p̄ixiñ jém inimiññewiip jém an̄maṭi. Jém Cornelio in̄wejay wisten jém imozo y tum soldado. Jém soldado siempre iwatpa juuts p̄imiytaṭ. Ij̄spatim Dios. ⁸ Jesic jém Cornelio in̄madáy itumpiy ti iix y ti iñimáy jém siñyucmipic p̄ixiñ. Ocmi icutsat jém attebet Joṑe.

⁹ Jesic icuquejama nic imétsyaj jém Peto. Iganam niquiyaj tunjom cuando núctoobam nocojom jém attebet Joṑe, jesic jeeti rato quim jém Peto jém yucmipic piso iga in̄wejpátpa Dios. Cugapjama. ¹⁰ P̄imi yuane jém Peto, agui wíctooba, pero iganam síp iwadayta iwíccuy, iix tum poñ. ¹¹ Iix iga aňáy jém siñ. Juuts tum miipic manta jimquetta hasta naxyucmi, tsénayñeta icucuatro itatsic. ¹² Ityaj jém mantajom itumpiy jém animat yip naxyucmipic, jém cuatropic ipuy, jém tsaňyaj y jém jonyaj. ¹³ Ocmi imaton tum j̄iyi. Nímayta:

—Peto, tsucumi, accai, cuuti.

¹⁴ Pero jém Peto icutson. Nimpa:

—Mánomi, da queman oypa aňcút jém dapic w̄i taňcút, ni jém ni-myajpáppic iga tactaňcaíypa.

¹⁵ Eybictim j̄iyayta. Nímayta:

—Jém Diospic iw̄itsac iga w̄i taňcút, da i wiap iñim iga tactaňcaíypa.

¹⁶ Jempigam iñasca tuciy. Ocmi eybictim quim jém manta siñyucmi. ¹⁷ Iganam amaňjac jém Peto iga iix jém poñ, núcyaj jém tiganaca jém p̄ixiñtam jém icutsatnewiip jém Cornelio. Acwágoyyajpa jém Ximoj iticim. ¹⁸ Cuando núcyaj iticim, p̄imi j̄iy. Icwacyaj siiga jemum it jém Ximoj iñiyitim Peto.

19 Iganam Peto síp ijis ti nimtooba jém poñ, Dios iAnama iñímáy:

—Aami, síp miméts tucuten p̄ixiñ. 20 Tsucumi, queti jém yucm̄ipic piso, nicsim con jeeyaj. Odoy c̄iñi porque ich mañcutsadayñe.

21 Jesic quet jém Peto, nic iám jém tucuten p̄ixiñ jém icutsatnew̄ip jém Cornelio. Iñímáy:

—Icham jém ammétstampáppic. ¿T̄iiga mimiñta ȳim?

22 Jesic iñímáy jém p̄ixiñtam:

—Amiñta porque acutsatta jém capitán Cornelio. Je tum w̄ibic p̄ixiñ, tsam iwatpa juuts ixunpa Dios. Itump̄iy jém Israelpic p̄ixiñtam tsam iw̄ianjamyaj, tsam itoyyajpa jém capitán. Da más pecam oy iwiñquejay tum siñyucm̄ipic p̄ixiñ jém icutsatnew̄ip Dios. Nimpa jém siñyucm̄ipic p̄ixiñ iga miñwejayiñ iticc̄im iga imatonpa jém capitán mich iniñm̄ati. 23 Jesic jém Peto iñímáy jém p̄ixiñtam:

—Tigiyi.

Jemum ts̄iyyaj jém tsuu con jém Peto. Icuquejama waganicyajpa jém Peto con jeeyaj. Iwagananicyajpatim algunos jém tant̄iwitam jém ityajw̄ip jém attebet Jope. 24 Jesic jém tungagam más jama, núcyaj jém attebet Cesarea. Jemum injócneyaj jém Cornelio con algunos it̄iwitam y con jém más w̄ibic iamigoyaj jém inwejayñew̄ip. 25 Cuando núc jém Peto jém Cornelio iticc̄im, put jém Cornelio, miñ iw̄ipictson. Costeñactiñ jém Peto iwiñjom iga inwejpáttooba. 26 Pero jém Peto ij̄ictsucum. Iñímáy:

—Teñchucumi. Ich apixiñtim juuts mimich.

²⁷ Iganam siip inmatyaj, tigiyaj jém Cornelio iticjom. Jém Peto ipát tsam jáyan pixiñtam an̄tuumaneyaj. ²⁸ Jesic Peto iñímáy:

—Michtam iñjodon iga jém judíos in̄químayooyi da ijícpa iga an̄tuumap jém judíos con jém tungac pixiñtam ni datim ijícpa iga tigiyaj jém tungac pixiñ iticjom. Pero Dios an̄quejayñe iga da wí iga tanjisa iga tum pixiñ tactan̄cawatpa, da wí iga tanjisa iga tum pixiñ da jex juuts taich. ²⁹ Jeeyucmi cuando mich an̄añwejay, amiñ. Da ti an̄jij. Siip manacwácpa, ¿tiiga an̄añwejay?

³⁰ Jesic jém Cornelio iñímáy:

—Iniitum cuatro día como yíptim hora ait anticcim. An̄watne ayuno. An̄añwejpátpa Dios juuts siempre an̄watpa cada cutsuuyaji. Jesic awiñquejay tum pixiñ tsam tsocpa ipuctucu. ³¹ Jém pixiñ anímáy: “MiCornelio, Dios mimatónayñeum jém iñoración. Ijisa iga tsam iñyxpátpa jém yaachayajpápic.” ³² Anímáytim: “Cutsati algunos jém impixiñtam hasta jém attebet Jope iga inimíñ jém Ximoj iñiyitim Peto. Jém pixiñ it jém tungac Ximoj iticcim jém icin̄pápic cuero jém itwip lamar an̄naca. Cuando núcpa, miñmadáypa ti wíap in̄wat.” ³³ Jeeyucmi jeeti rato an̄cutsat jém ampixiñtam iga niguiñ miméts. Agui wí iga mimiñ. Siip tantumpiytam taifta yim Dios iwiñjom. Tsam ammatontamtooba itumpiy cosa juuts miñímáy jém tánomi.

Najíyóypa jém Peto jém Cornelio iticcim

³⁴ Jesic jém Peto moj jiyi. Nimpa:

—Numa siip tançutihíyipa iga jém tanJatun Dios da iñejaixpa ni tum pxiñ. Itumpiy iixpa jextim. ³⁵ Pero Dios iwipictsonpa itumpiy jém pxiñtam icuwiti yíp naxyucmi siiga icinpa Dios y iwíwatpa. ³⁶ Dios icutsadáy jém wibic anmati jém Israelpic pxiñtam. Inímáy iga tawipictsonpa tanJatun Dios porque tawíwadáy jém Jesucristo. Je tantumpiytam tánomi. ³⁷ Michtam inwijodon ti nasne jém naxyucmi de Judea. Jemigam tsucum jém Galilea cuando najíyóypa y acchínóypa jém Xiwan. ³⁸ Injodonjim iga ocmi Dios ichi jém Jesús de Nazaret jém Dios iAnama ipimi. Injodonjim iga jut quej nicpa jém Jesús, iwíwadáypa jém pxiñtam, icpispa itumpiy jém iyaachwatyajpáppic jém Wocchwiñ. Jém tanJatun Dios iwaganait, jeeyucmi wíap iwat jempic. ³⁹ Aichtam atsiyta juuts testigo. Anixñeta itumpiy cosa juuts iwat jém atebet Jerusalén y icuwiti jém judíos inaxyucmi. Ocmi jeeyaj iccaayaj, cunúnta cunusyucmi. ⁴⁰ Pero Dios icpis jém tucunajama y awiñquejayta aichtam. ⁴¹ Da iwíñquejay itumpiy pxiñtam. No más awiñquejay aichtam jém acupineta wíp dende wiñti jém tanJatun Dios iga atsiyta juuts testigo. Awagawícta, awaganícta con je cuando pisneum de jut it jém caaneyajwíp. ⁴² Acutsatta iga ananmadaytámiñ jém pxiñtam y ananquejaytámiñ iga Dios iccám yiptim Jesús iga juez iga ichipinpa jém vivopic y jém caaneyajwíppic. ⁴³ Dende wiñigam itumpiy jém Dios inmatcchwiñ inmatyajtim

iga miñpa jém Jesús. Nimyajpa iga jém icupicpaap jém Jesús, wadaytap perdón jém itañca jém Jesús iñiyimi.

Ipicsonpatim Dios iAnama jém dapic je de Israel

⁴⁴ Iganam síp inmat jém Peto, núc jém Dios iAnama. Ipicsonyaj itumpiy jém imatonneyajwip jém Peto inmati. ⁴⁵ Tsam ipooñanjamyajpa jém Israelpic pixiñtam jém miññeyajwip con Peto, jém icupicnewip Cristo, cuando iix iga chiitaim jém Dios iAnama jém tungac pixiñtam jém dapic je de Israel. ⁴⁶ Porque imatonyaj iga jyyajpa jém tungac pixiñtam inmatimi. Tsam icujipyajpa Dios. ⁴⁷ Jesic Peto iñimáy:

—¿I wiap iñim iga da wiap tanacchin yíp pixiñtam? Porque ipicsonneum Dios iAnama juutstim taichtam.

⁴⁸ Jesic Peto ipimiy iga acchinjaytaiñ jém pixiñtam jém Jesucristo iñiyimi. Ocmi cunucsayta jém Peto iga tsíyiñ juna jama con jeeyaj.

11

Jém Peto inmadáypa jém ityajwip Jerusalén ti iñasca jém attebet Jope

¹ Jesic jém apóstolyaj con jém tantiwitam, jém ityajwip Judea, ijodónayaj iga jém tungac pixiñtam, jém dapic je de Israel, ipicsonyajtim jém Dios inmati. ² Cuando set Jerusalén jém Peto, agui icujyyaj jém Israelpic pixiñtam jém icupicneyajwip Jesús. ³ Nimyaj:

—¿Tiiiga oy iñjooyáy jém tuṅgac p̄ixiñtam jém ḍap̄ic je de Israel? ¿Tiiiga miwagawíc̄pa con jeeyaj?

⁴ Jesic jém Peto moj iṅmadáy titam iñasca dende wiñti. Iñímáy:

⁵ —Ich ait idic jém attebet Jope. Iganam síp anañwejpát Dios, ánix tum poñ. Ánix juuts tum m̄ijp̄ic manta tsénayñeta icucuatro itatsic, j̄imquetta dende s̄iṅyucmi hasta j̄ut ait. ⁶ Cuando añwiám ti it jém mantajom, ánix yíp naxyucm̄ipic animat jém cuatropic ipuj, jém jimñi animat, ittim jém tsañ, jém pach̄i y jém jonyaj. ⁷ Jesic ammaton̄ tum j̄iyi. Anímáyta: “Peto, tsucumi, accai, cuuti.”

⁸ Pero annímáy: “Mánomi, ich da queman añcút jém ḍap̄ic w̄i taṅcút jém tactañcaiypp̄ic.” ⁹ Jesic eyb̄ic ajíyáy jém s̄iṅyucm̄ipic j̄iyi. Anímáy: “Jém Diosp̄ic iw̄itsac, da wiap tannim iga da w̄i taṅcút.”

¹⁰ Annasca tucciy. Ocmi eyb̄ic j̄imquímta s̄iṅyucmi.

¹¹ Jeeti rato núcyaj tucuten p̄ixiñ jém ticc̄im j̄ut ait idic. Tum Cesareap̄ic p̄ixiñ icutsat iga miñ

améts. ¹² Jém Dios iAnama anímáy iga aniguiñ con jeeyaj y iga odoy ac̄iñiñ. Anwagananictatim yíp seis tant̄iwitam. Antumpiytam atigiyta jém p̄ixiñ iticjom, tum capitán. ¹³ Anmadáy jutsa miix iticc̄im tum s̄iṅyucm̄ipic p̄ixiñ. Miñ iṅmadáy jém capitán. Iñímáy: “Cutsati algunos p̄ixiñtam jém attebet Jope iga inimíñiñ jém Ximoj iñiyitim Peto. ¹⁴ Je miñpa miṅmadáy jutsap̄ iñciput y jutsap̄ ic̄iputyaj itump̄iy jém ityajw̄ip̄ iñticc̄im.”

¹⁵ Cuando moj anañmat jém Dios iṅmat̄i, ipictson̄yaj jém Dios iAnama juustim taichtam matampictson̄

wiñti. ¹⁶ Jesic anjjs ti tanímáy jém tánQmi. Nĩmpa: “Jém Xiwan acchĩóypa con ni, pero mimichtam impictsonťampa Dios iAnama.” ¹⁷ Siiga Dios ichi jém tungac pĩxiñtam jém Dios iAnama juuts tachiĩñeta taichtam, jém tanćupicnewĩp Jesucristo, ćjesic ich aĩapaap iga anĩcpa contra jém tanJatun Dios?

¹⁸ Jesic cuando imatonjaj jém tantĩwĩtam, jém ityajwĩp Jerusalén, da jĩyyaj. Moj icujĩpyaj Dios. Nĩmyaj:

—Jém tanJatun Dios ichiĩtim lugar jém tungac pĩxiñtam jém đapic je de Israel iga icucacyajpa ijĩxi iga iniĩtpatim jém vida jém đapic cuyajpa.

Jém Dios ipĩxiñtam jém attebet Antioquía

¹⁹ Cuando accaata jém Esteban, jeetim jama moj icpoyajta los demás jém icupicneyajwĩp Cristo. Cupóyayaj. Algunos nĩcyaj hasta jém attebet Fenicia, Chipre y Antioquía. Jemĩgam inmadayaj jém wĩbic anmaťi jém Israelpic pĩxiñtam. Pero da inmadáy jém tungac pĩxiñtam jém đapic je de Israel.

²⁰ Pero algunos jém tantĩwĩtam jém ityajwĩp jém attebet Chipre y Cirene nĩcyaj jém attebet Antioquía. Inmadayaj jém tungac pĩxiñtam jém đapic je de Israel iga wĩap iciacputyaj jém tánQmi Jesús.

²¹ Jém tantĩwĩtam tsam iniĩt jém tánQmi ipĩmi. Tsam jáyan jém pĩxiñtam ichacyaj jém wiñćpic anquĩmayooyi. Moj icupĩcyaj jém tánQmi Jesús.

²² Cuando ijodónajaj jém Dios ipĩxiñtam, jém ityajwĩp Jerusalén, icutsat jém Bernabé iga nĩguiñ Antioquía. ²³ Cuando núc jém Bernabé, iix iga Dios agui iwĩwadayñe jém pĩxiñtam. Jesic agui

maymay jém Bernabé. Moj inqúmyaj itumpiy jém pìxiñtam iga iwìcupìguiñ y odoy ichaguiñ jém tánQmi inmadayooyi. ²⁴ Porque jém Bernabé tum wibic pìxiñ, tsam iniit jém Dios iAnama. Tsam iwìcupìcpa iga Dios wiap. Jeeyucmi jáyan pìxiñtam tigiyñeyaj iga icupìcyajpa jém tánQmi Jesús. ²⁵ Ocmi jém Bernabé nic jém attebet Tarso. Nic iméts jém Saulo. Cuando ipát, ininic Antioquía. ²⁶ Jáy itiyaj jemum con jém Dios ipìxiñtam. Oy iti tum amtíy. Inquejáy jáyan pìxiñtam jém Dios inmati. Yíptim Antioquía moj iccámayyajtá iñiyi iga cristiano jém icupìcneyajwìip Cristo.

²⁷ Jeetim tiempo algunos jém profeta, jém ityajwìip Jerusalén, nic Antioquía. ²⁸ Tum de jeeyaj, iñiyi Agabo, teñchucum jut antuumaneyaj jém tantìwìtam. Dios iAnama icjodóna ti miñpa. Niñpa iga miñpa tum mijpìc yuu icuwìti de yíp naxyucmi. Ocmi numa cupac juuts nim, jém tiempo cuando injacpa jém Romapìc anjagooyi Claudio. ²⁹ Jesic ocmi jém icupìcneyajwìip Cristo, jém Antioquíapìc pìxiñtam, moj ijìsyaj iga icutsadayyajpa tum yoxpádooyi jém tantìwìtam jém ityajwìip Judea. Ichiiyajpa cada tumtum jutsañ wiayajpa. ³⁰ Jempìgam iwatyaj. Cutsadayta jém yoxpádooyi jém Dios ipìxiñtam injagooyiyaj. Oy ichac jém Bernabé y Saulo.

12

Accaatá Jacobo y pajta jém Peto

¹ Jeetim tiempo moj icpoy jém rey Herodes algunos jém Dios ipìxiñtam. ² Accaatá con espada

jém Jacobo jém Xiwan it̄wi. ³ Cuando jém Herodes iix iga agui iwianjam jém Israelpic pixiñtam, jesic ipimiytim iga matstaiñ mex jém Peto. Iñasca jempic cuando wattap jém siñ iga cúttap jém caxtánañi sin levadura. ⁴ Cuando matsta jém Peto, nanicta cárcel. Jém cárcel tsam w̄i watneta cuenta con cuatro grupo de soldado. Cada grupo ityaj cuatro soldado. Jém Herodes ijispa idic iga itoppa jém Peto cuando cuyajneum jém siñ iga icipinpa jém pixiñtam iwiñjom. ⁵ Jeeyucmi ts̄iy Peto jém cárcel, tsam w̄i watneta cuenta. Pero jém Dios ipixiñtam tsam p̄imi inwejpádáypa Dios para je.

Dios itop jém Peto jém cárcel

⁶ Ocmi cuando núc jém tiempo iga jém Herodes ijispa iga itoppa jém Peto, jeetim tsuu monpa Peto cucmi de w̄isten soldado. Tsenne con w̄isten cadena. Algunos jém soldado iwatne cuenta jém cárcel ipuerta. ⁷ Jeeti rato iwiñquejay jém Peto tum siñyucmipic pixiñ jém Diospic icutsatne. Jém cárcel ijojmi cutsoctic juuts tum jucti. Jesic jém siñyucmipic pixiñ ichigáy jém Peto ipócpac. Ichicyus. Iñímáy:

—Jicsciy tsucumi.

Jesic wij jém cadena jém Peto ic̄iyucmi, cutin naxyucmi. ⁸ Jém siñyucmipic pixiñ iñímáy:

—Tsencaami jém iñcinturón immijpacyucmi. Coti inciac.

Cuando yaj iwat jempic, iñímáy jém siñyucmipic pixiñ:

—Coti iñyooti. Atún̄iyi.

⁹ Jesic put jém Peto, mojum itúñíy jém sɨnyucmipic pɨxiñ. Pero da icutiíyíy siiga numa ti iwatpa jém sɨnyucmipic pɨxiñ. Je ijɨspa no más iga imawíñ.

¹⁰ Pero nasyaj juť inťeññe jém wiñtipic soldado y jém ocmipic soldado. Cuando núcyaj juť it jém tɨncyuy puerta jém calle aɨnaca, áñáy iyaac jém puerta. Putyaj, widaɨnasyaj tum calle, jeeti rato nic jém sɨnyucmipic pɨxiñ. Tsíy icutum jém Peto.

¹¹ Jesigam jém Peto icutiíyíy iga numa. Nɨmpa:

—Sɨip aɨcutiíyíy iga numa jém tánomi icutsat tum sɨnyucmipic pɨxiñ iga aciacputpa jém Herodes icɨjɨm con jém Israelpic pɨxiñtam icɨjɨm jém amalwadaypáppic idic.

¹² Iganam sɨp ijɨs jém Peto ti iñasca, nic jém Malía iticcɨm. Jém yomo jém Xiwan iapa iñiyítim Marco. Jem tsam jáyaɨ pɨxiñtam aɨtuumaneyaj.

Sɨp iwatyaj oración. ¹³ Cuando jém Peto itics jém puerta, miñ inťson tum woñi iñiyi Rode.

¹⁴ Imatónactiíyáy iga Peto ijíyi. Pero jém woñi da íñáy jém tic. Tsam maymay, póyaɨsucum, nic jojmi iga inmadáy jém aɨtuumaneyajwɨip iga núcneum jém Peto jém puerta aɨnaca. ¹⁵ Pero jeeyaj iñímáy jém woñi:

—Mich miloco.

Pero jém woñi nɨmpa:

—¡Numa, da je miñooyi!

Jesic nɨmyajpa jém pɨxiñtam:

—¿Que da je Petotim ianama?

¹⁶ Seguido iticspa puerta jém Peto. Cuando íñáy jém puerta jém pɨxiñtam, iixyaj jém Peto, tsam pɨmi ámaɨjacyaj. ¹⁷ Pero jém Peto iwat seña con ici

iga odoy jiyajijn. Moj inmaday jutsa mitop tánomi jém cárcel. Inimáy jém pixiñtam:

—Anmadaytaami jém Jacobo y los demás jém tantiwitam.

Ocmi put jém Peto, nic tungac lugar.

¹⁸ Icuquejama pimi cujínayñeyaj jém soldadoyaj porque da ijodon ti inasca jém Peto. ¹⁹ Jém Herodes icutsat jém soldado iga inimíñiñ jém Peto, pero da ipát. Jesic jém Herodes inwejay jém soldado jém iwatneyajwip cuenta jém cárcel. Icipin. Ocmi ipimíy iga accaayajtaiñ itumpiy de jeeyaj. Jesic put jém Herodes jém naxyucmi de Judea, nic iti jém atebet de Cesarea.

Ca jém Herodes

²⁰ Jesic jém Herodes tsam pimi ijóyixpa jém pixiñtam jém ityajwip jém atebet de Tiro y Sidón. Pero jém pixiñtam iwatyaj acuerdo con jém Blasto, tum mijpictim anjagooyi, icuyoxap jém rey Herodes. Iyojyaj jém Blasto iga iyoxpadiñ. Iacunucsay iga odoy imoogiyajijn jém rey porque jém pixiñtam ipicpa iwiccuy jém rey Herodes inxayucmi. ²¹ Jém Herodes inwejay jém pixiñtam. Inimáy júp jama miñyajijn. Jesic jém jama icot jém rey ipuctucu. Nic coñi jém icoñcuyucmi jut cipínóypa. Moj najíyooyi. ²² Jesic jém pixiñtam, jém inwejayñeyajwip, tsam pimi jiyajpa, tsam icujípyajpa jém Herodes. Nimyaj:

—Yimpic jiyapa da je pixiñ, tum dios.

²³ Jeeti rato tanjatun Dios icutsat tum sinyucmic pixiñ iga icmimneñ jém Herodes

porque da icujíppa Dios. Más iwianjam iga cujítaiñ iyaac. Jempigam ca. Jém tsuuquiñ icútyaj.

²⁴ Pero jém tánQmi inquímayooyi más jáyanap. Anmattap jutinquej jém anmati.

²⁵ Jesic jém Bernabé y Saulo cuando cuyaj jém iyoxacuy, putyaj Jerusalén. Setyaj iticmi. Iwagananicyajpa jém Xiwan iniyitim Marco.

13

Jém Bernabé y Saulo mojpaw iwat jém yoxacuy iga ininicipa Dios inmati juumi

¹ Jesic jemigam jut antuumayajpa jém Dios ipixiñtam, jém attebet Antioquia, ityaj jém Dios inmatciwiñ y jém wibic maestroyaj. Ityaj jém Bernabé; jém Ximoy iniyitim Niger; jém Lucio, jém Cirenepic pixiñ; jém Manaén, icuyoxap idic jém Herodes jém gobernador de Galilea; ittim jém Saulo. ² Tum jama cuando antuumaneyaj jém pixiñtam iga ijspa jém tánQmi y iwatyajpa ayuno, Dios iAnama inimáy jém pixiñtam:

—Tsaci aparte yíp Bernabé y Saulo jém ancupinewip iga acuyoxap.

³ Iwatyaj ayuno jém Dios ipixiñtam, inwejpátyaj Dios, iccámayyaj ici jém Bernabé y Saulo icobacyucmi. Jesic nanquímyajta.

Jém apóstolyaj inmatyajpa jém Dios inmati jém attebet Chipre

⁴ Jesic Dios iAnama icutsat jém Bernabé y Saulo. Nicyaj jém attebet Seleucia. Jemum tigiyaj barcojom iga nicpa jém isla de Chipre. ⁵ Cuando núc jém attebet Salamina, moj inmat jém Dios

in̄mati jém judíos imasticjom, jém sinagoga. Iwagananicyajtim jém Xiwan iga iyoxpátpa. ⁶ In̄matyaj yim̄jeexic icuwiti jém isla de Chipre. Núcyaj jém atebet Pafos. Jemum ipát tum nawat in̄yi Barjesús. N̄impa iga tum Israelpic an̄matciwiñ, pero je tum migoypaap. ⁷ Jém nawat it idic con jém gobernador Sergio Paulo. Yip anjagooyi tsam̄ jixiíy. In̄wejay jém Bernabé y Saulo porque agui imaton̄tooba jém Dios in̄mati. ⁸ Pero jém nawat, in̄yitim Elimas, nicpa en contra de jém Bernabé y Saulo. Da ichiitooba lugar jém gobernador iga icupiguiñ Cristo. ⁹ Jesic jém Saulo, in̄yitim Pablo, tsam̄ iniit jém Dios iAnama. Iwiámmats jém nawat. ¹⁰ In̄imáy:

—Mimigoypaap, tsam̄ malopic mipixiñ, Wocciwiñ mimanic. Mich tsam̄ mienemigo de itumpiy jém w̄itampic cosa. Agui in̄wótpa jém tánomi in̄químayooyi jém numapic. ¹¹ Siip jém tánomi michiiba castigo. Siip micáchtiap. Juna jama da w̄iap in̄ix jém jama ichoca.

Jesic jeeti rato imats juuts tum oma jém iixcuy, cupiicha. Mojpa iméts i w̄iap ijicteñ. ¹² Cuando jém gobernador iix ti in̄asca jém p̄ixiñ, icupic Cristo. Agui ipooñanjampa cuando imaton̄ jém tánomi in̄químayooyi.

Jém Pablo y Bernabé nicyaj jém tungac Antioquia jém atebet de Pisidia

¹³ Ocmi jém Pablo con icompañeroyaj tigiy barcojom, putyaj jém atebet Pafos. Nicyaj jém atebet Perge jém naxyucmi de Panfilia. Pero jém Xiwan ichagan̄put iga iwaganasiiba jeeyaj, set Jerusalén. ¹⁴ Ocmi nasyaj jém atebet Perge, núcyaj jém tungac

Antioquía jém itw̄ip jém naxyucm̄i de Pisidia. Jemum tum jejcuy jama tiḡiyay jém sinagoga, coñyay. ¹⁵ Jém sinagoga injagooyiyaj imayyay jém Dios in̄māti, jém Moisés in̄químayooyi y jém ijaychacnew̄ip jém wiñ̄ic̄pic̄ ān̄mātc̄wiñ̄. Cuando yaj imayyay, jesic jém anjagooyiyaj icutsadáy ān̄māti jém Pablo. Nímayta:

—Mant̄iw̄itam, siiga iniit ti in̄ñ̄imaytooba ȳipyaj p̄ixiñ̄tam iga inin̄químpa, s̄ibam w̄iap inin̄madáy.

¹⁶ Jesic jém Pablo teñ̄chucum. Iwat tum seña con ici iga odoy i j̄iyiñ̄, moj in̄madáy:

—M̄ilsraelp̄ic̄ mip̄ixiñ̄tam y mimichtam in̄c̄in̄tamp̄app̄ic̄ tan̄J̄atūn̄ Dios, maton̄taami.

¹⁷ Tan̄J̄atūn̄ Dios, jém Israelp̄ic̄ p̄ixiñ̄tam iDios, icupin̄ jém wiñ̄ic̄pic̄ tan̄jatūn̄w̄ewetam. Ts̄am icj̄ayān̄ayaj jém tan̄w̄ewetam cuando oy itiyaj jém naxyucm̄i Egipto juuts juum̄ip̄ic̄ p̄ixiñ̄tam. Ocm̄i itop jém naxyucm̄i de Egipto con ip̄imi. ¹⁸ Dios iyaach̄iy iga ts̄am imalwatyajpa jeeyaj cuando jáy itiyaj cuarenta āmtiy jém titsinaxyucm̄i. ¹⁹ Ocm̄i Dios ictogoy siete nación jém ityajw̄ip̄ic̄ jém naxyucm̄i de Canaán iga chiit̄ap̄ jém nas jém tan̄jatūn̄w̄ewetam. ²⁰ Jesic ocm̄i Dios iccám jém juezyaj iga injacyajpa jém Israelp̄ic̄ p̄ixiñ̄tam cuatrocientos cincuenta āmtiy. Injacyajpa jém juezyaj hasta que núc jém tiempo de Samuel jém Dios in̄mātc̄wiñ̄. ²¹ Ocm̄i iwácyaj tum nunta rey iga injaguñ̄. Jesic Dios iccám jém Saúl juuts rey iga injacpa cuarenta āmtiy. Jém Saúl, jém Cis iman̄ic̄, tsucum de jém tribu de Benjamín. ²² Ocm̄i Dios itop jém Saúl. Accám̄ta jém David iga rey. N̄impa

Dios: “Ampát jém David jém Isaí imaníc. Jém ijixi jextim juuts aich. Iwatpa juuts ich anwianjam.”

²³ Yíptim David iocmaníc maníc jém Jesús, jém iciacputpáppic jém Israelpic pixiñtam. Dios ictsucum juuts tajycámayñe wiñigam. ²⁴ Antes que miñpa jém Jesús, jém Xiwan inmadáy itumpiy jém Israelpic pixiñtam iga icucacyajiñ ijixi y iga acchiniyajtaiñ. ²⁵ Cuando dam jáyñe iga caaba jém Xiwan, nimpa: “Ich da aje jém michpic iñjiswa iga miñpa. Pero ocmi miñpa antuuñianc#m tum pixiñ más wiap que aich. Ich da ipati iga anwijáypa iciac ipuyyucmi.”

²⁶ Mantiwitam, jém Abraham mimanictam, jém inçintampáppic Dios, taichtam tacutsadayta jém wibic anmati iga taciacputpa Dios. ²⁷ Jém ityajwip Jerusalén y jém injagooyiyaj da ijodonjay iga Jesús je jém icutsatnewip Dios. Datim icut#y#yyajpa cuando imayyajpa cada jejcuy jama jém anmati jém ijaychacnewip jém wiñcpic anmatc#wiñ. Cuando accaata jém Jesús, cupacpa iwat juuts nim jém wiñcpic anmatc#wiñ. ²⁸ Mex da ipadayyaj itança jém Jesús iga accaataiñ, jém pixiñtam iwágáy jém Pilato iga accaataiñ. ²⁹ Cuando jém pixiñtam yaj imalwadayyaj jém Jesús juuts ijaychacne jém wiñcpic anmatc#wiñ, icquetyaj jém icunusyucmi, icumyaj. ³⁰ Pero Dios icpis de jut it jém caaneyajwip. ³¹ Watña jama iwiñquejáy jém icuyujc#wiñ jém iwaganamiññewip de Galilea a Jerusalén. Sip jeeyaj tsíyyaj juuts testigo iga inmadayyajpa jém pixiñtam iga numa pisneum.

³² Sip aichtam manañquejáypa jém wibic

aṇmaṭi jém Diospic ij̄ycámayñe jém wiñicpic tanjatuṇwewetam. ³³ Siip Dios iccupac jém promesa para taichtam jém wiñicpic p̄ixiñtam tamañictam. Iccupac Dios cuando icp̄is jém Jesús, juuts jaychacnetā jém salmo dos. N̄impa:

Mich mammanic.

Ȳip jama manchi jém vida.

³⁴ Jém tanjatuṇ Dios ij̄ychacne iga icp̄ispa jém iman̄ic de juṭ it jém caaneyajw̄ip iga jém im̄ijt̄ay da p̄ucpa. Ȳimpic n̄impa juṭ jaychacnetā:

Manyaachanj̄ampa,

maṇw̄iwadáȳpa juuts anj̄ycámayñe jém David.

³⁵ Jeeyucmi n̄impatim jém tuṇgac salmo:

Da anj̄icpa iga p̄ucpa im̄ijt̄ay jém acuyoxapaap, jém ts̄ampic antoȳpa.

³⁶ Numa jém David ts̄am icuyoxa jém it̄iwitam juuts iw̄ianjam Dios. Ocmi ca, cumta juttim cumneyaj jém ij̄atuṇwewe, p̄uc jém im̄ijt̄ay.

³⁷ Pero jém icp̄isnew̄ip Dios, da p̄uc jém im̄ijt̄ay.

³⁸ Mant̄iwitam, jodón̄ataami iga ȳiptim Jesús iñ̄iyimi miñmadayt̄amt̄ap iga Dios miwadayt̄ampa perdón jém iñt̄añca. ³⁹ Ȳip p̄ixiñ iñ̄iyimi itump̄iy jém icupicneyajw̄ip Jesús wadayt̄ap perdón itump̄iy jém it̄añca jém dapic w̄iap iw̄itsagáy jém Moisés inq̄imayooyi. ⁴⁰ Nawattamt̄aji cuenta mimichtam iga da iñ̄ascaaba juuts ij̄ychacne jém wiñicpic aṇmat̄c̄wiñ. N̄impa ȳimpic:

⁴¹ Mimalop̄ic mip̄ixiñtam, ts̄am iñ̄iccat̄ampa jém w̄ibic cosa.

Núcpa jama iga agui miámanjacpa, pero mitogoȳpa. Porque ich aDios aṇwatpa tum mījpic cosa jém tiempo de mimichtam.

Pero mimichtam da inꝑictámpa mex i
miñmadáypa.

⁴² Iganam putyaj jém Pablo con icompañeroyaj
jém sinagoga, jesic jém p̄ixiñtam iñimayyaj:

—Yíp tungac jejcuy jama miñi añmadaytaami
eyb̄ic jém siꝑpic ammaton̄ta.

⁴³ Cuando cupudayyaj de jut añtuumaneyaj, jesic
tsam jáyan jém judíos con jém tungac p̄ixiñtam,
jém iw̄ianjamyajp̄appic jém Moisés inꝑuimayoyi,
itún̄iyajpa jém Pablo y Bernabé. Jesic jeeyaj
inꝑuimpa jém p̄ixiñtam iga seguido icup̄iguiñ y
odoy ichaguiñ jém Dios itóyooyi.

⁴⁴ Jesic jém tungac semana jém jejcuy jama
añtuumayajpa casi itump̄iy jém ityajw̄ip jém at-
tebet iga imaton̄yajpa jém Dios in̄mati. ⁴⁵ Pero
cuando jém judíos iix iga añtuumaneyaj tsam
jáyan p̄ixiñtam, jesic tsam najajoyyajpa, moj imal-
malnimayyaj jém Pablo. Nimyajpa iga tsam
miꝑóypa. ⁴⁶ Jém Pablo y Bernabé da c̄in̄pa in̄mat.
Iñimáy:

—Tienes que wiñti manañmadáypa jém Dios
in̄mati mimichtam miIsraelp̄ic mip̄ixiñtam. Pero
como da imp̄ictson̄tooba jém vida jém dap̄ic cuya-
jpa, siꝑ ananigáypa jém w̄ib̄ic añmati jém tungac
p̄ixiñtam jém dap̄ic je de Israel. ⁴⁷ Porque
jemp̄igam tanímáy jém tan̄jatun̄ Dios. Nimpa
ȳimp̄ic:

Manaccám juuts tum w̄ib̄ic jucti para jém tungac
p̄ixiñtam jém dap̄ic je de Israel.

Mañcutsatpa iga ininicipa jém wibic añmati iga
Dios iciacputtooba jém pìxiñtam icuwiti yíp
naxyucmi.

⁴⁸ Jesic cuando imatonyaj jém tungac pìxiñtam,
jém ñapic je de Israel, agui maymayyaj. Niñyajpa:

—¡Yíp Dios inñmati tsam wi!

Jesic icupicyaj itumpiy jém icupinewiip Dios iga
ipictsonyajiñ jém vida jém ñapic cuyajpa. ⁴⁹ Jesic
añmattap jém Dios inñmati icuwiti jém naxyucmi
de Pisidia. ⁵⁰ Pero jém judíos tsam ijóyixyajpa
jém wibic añmati. Moj ictsucum iga icpóyiyajpa
jém Pablo y Bernabé. Jém malopic judíos inñmáy
jém wibic yomtam con jém miñpic añjagooyiyaj
iga iyoxpádiñ. Jesic moj icpóyiyaj hasta icque-
bacputyaj jém naxyucmi de Pisidia. ⁵¹ Jesic cuando
putyaj jém Pablo y Bernabé, icunebayyaj jém
pótpót ipuyyucmi iga quejiñ iga jém pìxiñtam da
ipictsonyaj jém Dios inñmati. Ocmi nicyaj jém attebet
Iconio. ⁵² Pero jém icupicneyajwip Cristo jém
attebet Antioquia tsam maymayyaj. Tsam iniityaj
Dios iAnama.

14

Jém Pablo y Bernabé it jém attebet Iconio

¹ Jesic jém attebet Iconio jém Pablo y Bernabé
wagatiñyay jém judíos isinagoga. Como tsam
wiap inñmatyaj jém wibic añmati, tsam jáyan
pìxiñtam icupicyaj jém Cristo. Icupicyajtim jém
judíos con jém griegopic. ² Pero jém judíos, jém
ñapic icupicpa, tsam pimi imalnímayyaj jém Pablo
y Bernabé. Icjóyixyajtim jém tungac pìxiñtam jém

đapic je de Israel. ³ Jeeyucmi tsíyyaj jemum jém Pablo y Bernabé watña jama. Da c̄iŋpa iŋmat porque ijodon̄ iga iyoxpátpa jém tán̄omi. Numa Dios iŋquejáypa jém p̄ixiñtam iga da miğóypa jém Pablo cuando iŋmatpa de jém Dios itóyooyi. Chiit̄atim jém Dios ip̄imi iga wiap̄ iwat jém milagro y jém seña jém đapic oypa tánix. ⁴ Pero nawécayajta jém p̄ixiñtam jém ityajwiip̄ jém attebet. Algunos iwianjamyaj jém judíos iŋquímayooyi, algunos iwianjamyaj jém apóstol iŋquímayooyi. ⁵ Ocmi jém judíos con jém tuŋgac p̄ixiñtam iwatyaj acuerdo con jém anjagooyiyaj iga imalwadayajpa jém Pablo y Bernabé, iga iñácscayajpa tsaami. ⁶ Pero jém Pablo y Bernabé cuando ijodon̄ayaj, poyyaj, n̄icyaj jém attebet Listra y Derbe jém naxyucmi de Licaonia. Nasyaj itump̄iy jém attebetiyaj jém nocojomp̄ic it̄ ⁷ iga iŋmatyajpa jém w̄ibic aŋmat̄i.

Yigayta tsaami jém Pablo jém attebet Listra

⁸ Jém attebet Listra coñ tum̄ cuxuj calle aŋnaca. Da nunca wiap̄ iwit̄ porque cuxuj miñay. ⁹ Jém p̄ixiñ s̄ip̄ imaton̄ ti n̄impa jém Pablo. Jesic jém Pablo iámmats, iix iga tsam̄ icup̄icpa iga Dios wiap̄ icp̄is. ¹⁰ Jesic jém Pablo ijíyáypa p̄imi. N̄impa:

—¡Tsucumi, numteñi!

Jém p̄ixiñ teñchucum, yóyquím, mojum w̄iti.

¹¹ Cuando jém p̄ixiñtam iixyaj ti iwat jém Pablo, p̄imi j̄iyajpa jém Licaonap̄ic aŋmat̄imi. N̄imyajpa:

—Quetneum wisten̄ diosyaj, jex juuts p̄ixiñ.

¹² Ij̄isyaj jém p̄ixiñtam iga jém Bernabé jém dios Júpiter y jém Pablo jém dios Mercurio porque je

agui aṇmatpa. ¹³ Jém pañij, jém icuyoxapáppic jém dios Júpiter, iniit imāstic jém attebet aṇṇaca. Inimiñ juten xix tsam iwíaccuyajne con jém moya. Jém pañij con jém p̄ixiñtam iccaayajtooba jém xix juuts tum sacrificio jém Pablo iwiñjom iga ij̄isyajpa juuts tum dios. ¹⁴ Pero jém apóstolyaj, jém Pablo y Bernabé, cuando icut̄iyiyaj ti iwatpa jém p̄ixiñtam, jesic ichiccujac jém iyooti. Tigiy jém p̄ixiñtámanjom, moj j̄iyi p̄imi. ¹⁵ N̄impa:

—¡Mip̄ixiñtam! ¿T̄iiga inwattámpa jem̄pic? Ich ap̄ixiñ juuts mimichtam. Jeeyucm̄ amiñ iga manactsactámpa jexpic j̄ixi jém dapic tayoxpátpa. Cup̄ici jém vivopic Dios jém iwatnew̄ip siṇ, nas y lamar. Itump̄iy jém Dios iwati. ¹⁶ Wiñigam Dios ij̄ic iga itump̄iy jém p̄ixiñtam iwatyajpa con ij̄ixi juuts ixunpa iyaac. ¹⁷ Pero dende wiñigam tanquejáypa juutspic Dios jém tanjatun̄ Dios. Tsam taw̄iwadáypa. Icchijóypa tuj iga tanaítámpa wibic cosecha. Tachiiba titam tan̄cútpa iga tamaymáypa.

¹⁸ Mextim inmadáypa jem̄pic, jém Pablo tsam táṇca ictsac jém p̄ixiñtam iga iccaaba jém xix iga iwadáypa sacrificio jém Pablo y Bernabé iwiñjom.

¹⁹ Ocm̄ miñyajt̄im jem̄ jém malopic judíos, jém ityajw̄ip jém Antioquía y jém Iconio. Moj icum̄igoyaj jém p̄ixiñtam iga Pablo icuj̄ypa Dios. Jesic iccup̄icyaj, iyigayyaj tsaam̄i jém Pablo. Ij̄isyaj iga caaneum. Ij̄icputyaj aṇs̄icm̄i de jém attebet. ²⁰ Pero cuando icuyujc̄iwiñ̄ in̄tuumaçayaj jém Pablo, eyb̄ic tsucum, tigiy jém attebet. Jém tun̄gac jama put jém attebet con jém Bernabé, n̄icyaj jém attebet Derbe. ²¹ Ocm̄i cuando yaj

inmat jém wibic anmati jém attebet Derbe, tsam jáyan tigíyyaj iga icupicyajpa Cristo. Jesic set jém attebet Listra, jém Iconio y jém Antioquía. ²² Cuando nasyaj jém tungac attebetay tsam iyoxpátpa jém icupicneyajwip Cristo. Inquímpa iga odoy ichaguiñ jém Dios inmati. Inímayyajpatim iga tienes que tayaachwattap y tacutitstap iga tanúcpa jut it Dios. ²³ Accámta tum anjagooyi cada masticjom jut antuumayajpa jém Dios ipixiñtam. Jesic jém Pablo y Bernabé cuando yaj iwat oración y ayuno, icijunçot jém anjagooyiyaj jém tánomi icijom iga iwatyajiñ cuenta jém icupicneyajwip Cristo.

Jém Pablo y Bernabé setpa Antioquía y Siria

²⁴ Ocmi nasyajpa jém naxyucmi de Pisidia, núcyaj jém naxyucmi de Panfilia. ²⁵ Inmatyaj jém Dios inmati jém attebet Perge. Ocmi nicyaj hasta tum attebet iníyi Atalia. ²⁶ Jemum tigíyyaj tum barcojom. Set eybic jém Antioquía, jém attebet jut tsucumyaj, jut jém tantiwitam icijunçotyaj jém Dios icijom iga iwatpa cuenta con jém wibic tóyooyi cuando nicpa iwat jém yoxacuy jém siippic cuyajneum. ²⁷ Cuando núcyaj jém Antioquía, intuumawatyaj jém Dios ipixiñtam. Jesic jém Pablo y Bernabé inmadayaj itumpiy juuts iwadáy Dios. Inmadáytim itumpiy jutsap ináyáy jém puerta jém tánomi para jém tungac pixiñtam jém dapic je de Israel iga wiañtim icupicyaj. ²⁸ Jesic jeeyaj tsíyyaj wati jama con jém tantiwitam.

15

Añtuumayaj jém apóstolyaj Jerusalén

¹ Jesic algunos pixiñtam, jém ityajwiiip idic Judea, miñyay Antioquía. Moj inquejayyay jém tantiwitam iga da taciaputtap siiga da tampictsonpa jém marca de circuncisión jém ictsucumnewiiip jém Moisés. ² Jesic jém Pablo y Bernabé añayaj con jém inimiññeyajwiiip jém migooyi. Jesic cupiñta jém Pablo y Bernabé con tungac más pixiñtam iga nicpa iwitsac jém asunto Jerusalén con jém apóstolyaj y jém wídaytam, jém injacápápic jém Dios ipixiñtam.

³ Jesic jém Dios ipixiñtam jém ityajwiiip Antioquía oy ijagañtsacyaj tunjōm. Ocmi nasyaj jém Fenicia y Samaria. Inmadayyaj jutsa micupicyaj jém tungac pixiñtam jém dapic je de Israel. Agui maymayyaj itumpiy jém tantiwitam cuando imatonayaj.

⁴ Cuando núcyaj Jerusalén jém Pablo y Bernabé, iwipictsonyay jém Dios ipixiñtam. Iwipictsonyajtīm jém apóstolyaj y jém wídaytam. Moj inmadayyaj titam iwadáy Dios con jeeyaj. ⁵ Pero jemum ittim jutēn jém fariseoyaj, icupicyajtīm jém Jesucristo inquímayooyi. Teñchucum, nīmyajpa:

—Jém tungac pixiñtam jém dapic je de Israel tienes que iwatpatīm jém marca de circuncisión cuando moypa icupic Jesús. Tienes que iwatpatīm juuts nīmpa jém Moisés inquímayooyi.

⁶ Ocmi añtuumayaj jém apóstolyaj con jém wídaytam. Moj ijisyaj siiga wī iga tanwatpa juuts nīmpa jém fariseoyaj. ⁷ Cuando yajum añajiyaj, teñchucum jém Peto. Iñímáy:

—Mantiwitam, michtam iñjodon iga da más pecam Dios acupin de mimichtamanjom iga ananmadáypa jém wibic anmati jém tungac pixinтам jém dapic je de Israel iga icupicyajiñ mex jeeyaj. ⁸ Dios ijodon ti tanjiswa tánanamanjom. Tanquejáy iga jém tungac pixinтам numa icupicyajpatim Cristo porque chiiyajta jém Dios iAnama juutstim taichtam. ⁹ Dios da iñejaixpa jém pixinтам. Iixpa jém tungac pixinтам jextim juuts taichtam. Dios iccuáyáy ianama porque icupicpatim Cristo mex jeeyaj. ¹⁰ Jesic tiiga da incupicpa ti iwatpa Dios. ¿Tiiga inicts#map jém tantiwitam con jém wiñicpic anquímayooyi? Porque ni taichtam ni jém wiñicpic tanjatunwewetam da wiap tanaccupac juuts nimpajém wiñicpic anquímayooyi. ¹¹ Pero taichtam tanjucupicpa iga Jesucristo taciacputpa porque tsam tatoypa. Tachiiba jém tóyooyi juuts tum xaja. Jempictim iwadáypa Dios jém tungac pixinтам.

¹² Jesic itumpiy jém pixinтам jut antuumaneyaj dam jyyaj. Moj icumatonyaj iganam inmatpa jém Pablo y Bernabé jutsa miyoxpát Dios iga iwat jém milagro y seña entre jém tungac pixinтам, jém dapic je de Israel. ¹³ Cuando yaj nimiraj, teñchucum jém Jacobo, iñimáy jém pixinтам:

—Mantiwitam, amatontaami. ¹⁴ Tanmadáy jém Peto jutsa miwíwadáy Dios jém tungac pixinтам cuando moj ipictsonyaj jém Dios inmati. Cupinyajtatim juten de jeeyaj iga tsíyyajpa juuts jém Dios ipixinтам. ¹⁵ Cuando iwat jempic, ictsíypa jém anmati juuts ijaychacne jém wiñicpic

aṇmaṭciḥwiñ. Nĩmpa yḥĩmpic:

¹⁶ Jesic yaj iñasca jempic, amiñgacpa eybic iga aṇwĩtsagáypa jém David itic jém actiṇnewiḥp. Aṇwatsetpa jomipic jém misanewiḥp, eybic anacteñpa.

¹⁷ Aṇwatpa jempic iga jém tungac pĩxiñtam imétsyajiñ Dios.

Jesic itumpiy jém cupiṇnetawḥp, jém dapic de Israel, tsíyyaj juuts ich ampixiñtam.

¹⁸ Nĩmpa jém tanjatun Dios:

Tsam wiñigam jodónata iga naspa jempic.

¹⁹ Nĩmpatim Jacobo:

—Jeeyucmi ich anĩmpa wĩ iga da tammoogíypa jém tungac pĩxiñtam jém dapic je de Israel cuando ichacpa jém wiñicpic jĩxi iga icupicyajiñ Dios. ²⁰ Wĩ iga tanjáyáypa tum toto iga ichaguiñ iga icupicpa jém watnas, iga odoy pejóyiñ, odoy icúdiñ jém animat jém pencanewiḥp ni jém jupcanewiḥp y odoy icúdiñ jém niipiñ. ²¹ Dende wiñigam it jém iṇmatpáppic jém Moisés iṇquímayooyi cada tiganjoj. Maytap jém aṇmaṭi cada jecuy jama jém sinagoga.

²² Jesic jém apóstolyaj con itumpiy de jém Dios ipixiñtam con jém wĩdaytam iṇisyaj iga icupiṇyajpa wisten pĩxiñ de jeeyaj iga icutsatpa Antioquía con jém Pablo y Bernabé. Jesic cupiṇta jém Judas iñiyitim Barsabás y tum pĩxiñ iñiyi Silas. Yíp wisten tsíy iga jém Dios ipixiñtam iṇjagooyiyaj. ²³ Icutsat tum toto con jeeyaj. Nĩmpa:

“Aichtam aapóstoltam, con jém wĩdaytam, con itumpiy jém tantiwitam jém ityajwiḥp yim, maṇcutsadáypa waṭidios, mantiwitam,

jém miittanw̄iip jém attebet Antioquía y jém naxyucmi de Siria y Cilicia. ²⁴ Anjodoñaneta iga oyñe ȳimpic p̄ixiñtam, pero aichtam da ancutsatneta. Yípyaj mimigóyáypa, micujíñáypa con jém in̄mat̄i. Mip̄im̄íypa iga in̄wadiñ jém marca de circuncisión y iga odoy iñchaguiñ jém Moisés in̄químayooyi. ²⁵ Jeeyucmi an̄cumun̄jista iga an̄cupiñpa w̄isten p̄ixiñ aichtampic iga nīguiñ miám̄ta con jém Bernabé y jém Pablo jém tantoypáppic. ²⁶ Yíp w̄isten p̄ixiñ watciy accaatātooba jém tán̄omi Jesucristo icuyucmi. ²⁷ Jeeyucmi man̄cutsadáypa jém Judas y Silas iga nicpa miñmadáy iyaac it̄ump̄iy juuts man̄jáyáypa yíp totoyucmi. ²⁸ Dios īAnama da iw̄ian̄jam iga manacts̄im̄ap con jém mījpic an̄químayooyi y aichtam an̄jístamp̄atim jempic. Manañmadáypa ti ixunpa Dios iga tan̄watpa: ²⁹ Odoy cuuti jém animat im̄ayi, jém accaanetaw̄iip jém watnas iw̄iñjom, jém watnetaw̄iip sacrificio. Odoy cuuti jém nīpiñ ni jém animat jém pencanew̄iip. Odoy pejooyi. Odoy ts̄ici tun̄gac yomo. Siiga seguido in̄watpa juuts nimpa yíp an̄químayooyi, jesic in̄wīwatpa. Jesán̄jam man̄jáyáy.”

N̄icyajpa Antioquía jém cuatro p̄ixiñ

³⁰ Jesic yaj in̄quím̄yaj, mojum nīquiyaj jém cuatro p̄ixiñtam jém attebet Antioquía. Cuando núcyaj, in̄tuum̄awat̄yaj it̄ump̄iy jém Dios ip̄ixiñtam. Ichījun̄codayyaj jém toto. ³¹ Cuando yaj im̄ayyaj jém toto, jém tant̄iw̄itam agui maymayyaj porque ts̄am iyoxpát jém toto. ³² Jém Judas y Silas profetayaj, chīiyajta jém j̄ixi iga wīap in̄mat jém Dios in̄mat̄i.

Tsam inmadayyajpa jém p̄ixiñtam ti ixunpa Dios. Tsam iyoxpátpa iga iw̄icupicyajpa y da ichacyajpa jém w̄ibic an̄mat̄i. ³³ Jesic jáy wagaitiyaj. Cuando yaj iwat iyoxacuy, jém tant̄iwitam in̄químyaj iga setpa eybic juttim tsucumyaj. ³⁴ Pero jém Silas ij̄is iga tsíypa Antioquía. ³⁵ Tsíyyajtim jém Pablo y Bernabé. Da ichacyaj iga najíyóypa y in̄quejáypa jém p̄ixiñtam jém tán̄omi inmadayooyi. Jemum tsíyyajtim w̄ati jém tant̄iwitam.

Jém Pablo eybic nicpa juumi

³⁶ Da w̄at̄ña jama jáyit̄iyaj, jém Pablo in̄ímáy jém Bernabé:

—Nicpa tanjóyáy eybic jém tant̄iwitam itump̄iy jém attebet j̄ut̄ moj tanañmat jém tán̄omi inmadayooyi iga tanjodón̄ap jutsane īit̄iyaj.

³⁷ Jém Bernabé iwaganan̄ictoobatim jém Xiwan in̄iyit̄im Marcos. ³⁸ Pero jém Pablo da iw̄ian̄jam iga iwagananicpa jém Xiwan porque ichagan̄put jém yoxacuy jém attebet Panfilia. ³⁹ Ocm̄i jém Pablo an̄ayaj con jém Bernabé. Mex jeegacti nat-sagan̄putyajta. Jém Bernabé inin̄ic jém Marcos. Tigiy barcojom, waganicyaj jém isla de Chipre. ⁴⁰ Jesic jém Pablo icupin̄ jém Silas. Nicyaj. Jesic jém tant̄iwitam in̄químyaj, in̄wejpát̄yaj tan̄jatun̄ Dios iga iyoxpádiñ. ⁴¹ Nasyajpa jém naxyucm̄i de Siria y Cilicia. J̄ut̄ quej nicpa iyoxpát̄ jém Dios ip̄ixiñtam iga más w̄iañ̄ iwatyaj juuts ixunpa Dios.

16

Waganicpa jém Timoteo con jém Pablo y Silas

¹ Jesic jém Pablo y Silas nicyaj jém attebet Derbe y Listra. Jemum ipát tum p̄ixiñ jém icupicnewiip Cristo iñiyi Timoteo. Jém iapa tum Israelpic yomo, tsam icupicpatim Cristo. Jém ijatun tum griegopic p̄ixiñ. ² Jém tantiwitam jém ityajwip Listra y jém Iconio tsam iwixyajpa jém Timoteo. ³ Jém Pablo iwagananictooba jém Timoteo. Jeeyucmi iwadáytim jém marca de circuncisión iga odoy ijóyixiñ jém judíos jut nicyajpa jém Pablo. Porque ijodonjay iga jém ijatun griegopic p̄ixiñ. ⁴ Jesic nicyaj, nasyajpa wati jém attebet. Inquejayyajpa ti wiap iwatyaj juuts ipimiy jém apóstolyaj y jém wídaytam jém ityajwip Jerusalén. ⁵ Jesic jut antuumayajpa Dios ipixiñtam mástim icupicyajpa. Cada jama más jáyanap.

Imawíñix Pablo tum Macedoniapic p̄ixiñ

⁶ Jém Dios iAnama da ijigáy iga inmatpa jém Dios inmati jém naxyucmi de Asia. Jeeyucmi wídaynasyaj jém naxyucmi de Frigia y Galacia. ⁷ Ocmi núcyaj jut tsucum jém naxyucmi de Misia. De jem ijisyajpa iga tigiypa jém naxyucmi de Bitinia. Pero Dios iAnama datim ijigáy iga inmatyajpa jém Dios inmati jem. ⁸ Jesic icuwídayyaj jém naxyucmi de Misia, nicyaj naxwiñ jém attebet Troas jém lamar anaca. ⁹ Jesic tsuucim jém Pablo iix tum poñ. Iix iga jemum teñ tum Macedoniapic p̄ixiñ. Iacuncsáypa. Iñimáy:

—Nasi yim Macedonia, miñi ayoxpáttaami.

¹⁰ Mu iix jém poñ, jicsciy anawitsactamta iga anictampa Macedonia. Anjodonjata iga numa

aṇwejáy Dios iga niḡuiñ ananmat jém wibic aṇmaṭi Macedonia.

Cuando ityaj Filipos jém Pablo y Silas

¹¹ Atigiyta barcojom jém attebet Troas. Anumnicta jém isla de Samotracia. Tunḡagam jama anúcta jém attebet Neápolis. ¹² De jém anicta hasta Filipos, tum Romapic colonia. Je jém más miḡpic attebet de jém parte de Macedonia. Jáy aṭitam jemum juna jama. ¹³ Tum jejcuy jama aputta aṇsici de jém attebet. Anicta tum ni aṇna. Anúcta tum lugar juṭ siempre iṇwejpátyajpa Dios. Acoñta, moj ananmadayaj jém Dios iṇmaṭi jém yomtam jém aṇtuumaneyajwiip jem. ¹⁴ Tum de jeeyaj iñiyi Lidia. Jém yomo tsucum jém attebet Tiatira. Imáypa jém wibic puctucu jém color morado. Tsam iḡispa Dios. Iwimatonpa jém Dios iṇmaṭi. Jém tánomi iṇáyáy jém yomo ianama iga iwadáyiñ caso ti nimpa jém Pablo. ¹⁵ Jesic acchiṇta jém Lidia. Acchiṇyajaṭim itumpiy jém ityajwiip iticim. Ocmi icunucsáy jém Pablo. Iñimáy:

—Siiga iṇispa iga aṇwicupic jém tánomi, miñi michiyi ich anticim.

Jesic aṇcupicta, atsiyta.

¹⁶ Jesic tunḡagam jama anictámpa eybic jém lugar juṭ iwatyajpa oración. Tunjom ampát tum woñi juyñeta, tum esclava. Iniit tum mal espíritu. Jém woñi tum sabio. Imétsa suerte. Tsam iwicoñwiypa tumiñ para jém iomi jém ijuyñewip. ¹⁷ Yip woñi moj atúnyta aichtam. Pimi jiyipa jém woñi, nimpa:

—Yíp p̄ixiñtam icuyoxap jém yucm̄ipic Dios. Inmatyajpa jutsap taciacput Dios.

¹⁸ Jempam iwat jém woñi waṭña jama. Ocmi jém Pablo ijóyca. Iámseedáy, iñímáy jém mal espíritu:

—Jém Jesucristo iñiyimi mannímáypa, puti yíp woñi ianamanjom.

Jeeti rato jém mal espíritu ichacum jém woñi.

¹⁹ Pero mu iix jém woñi iomi iga da más icoñwíypa tumiñ, jesic matsta jém Pablo y Silas. Nanicta jém anjagooyicim jém plaza anñaca.

²⁰ Iciijuncot jém juez iciijom. Nimpa jém woñi iomi:

—Yípyaj judíos tsam iccujiñáypa jém p̄ixiñtam jém ityajw̄ip tánattebet. ²¹ Inquejpa tum anquímayooyi jém dapic wiap tan̄cuyucata porque taichtam taRomapic tap̄ixiñtam.

²² Ocmi tsucumyaj jém p̄ixiñtam iga iquejajwadayyajpa jém Pablo. Jém juez ip̄imíy iga ichodayyajiñ iyooti iga cóstaiñ con waycuy. ²³ P̄imi icótsyaj, ocmi icotyaj cárcel. P̄imiyta jém carcelero iga iw̄iwadiñ cuenta. ²⁴ Cuando ip̄ictson jém orde, icot jém Pablo y Silas jém más jojm̄ipic cuarto de jém cárcel. Codayta ipuy tum cuycotcuyjom, acmatsta tum cadena.

²⁵ Cuando núc cugaptsu, jém Pablo y Silas iwatyajpa oración; iwánayyajpa Dios tum himno. Jém tungac preso imaton̄yajpa. ²⁶ Jeeti rato tsam p̄imi ȳispa jém nas. Tsam p̄imi ixics jém cárcel. Jeeti rato añáy itump̄iy jém ipuerta. Añáyaj itump̄iy jém cuycotcuy icadena, cutsigayyajta itump̄iy jém preso. ²⁷ Jesigam yus jém carcelero.

lix iga áráyñeum itumpiy jém cárcel ipuerta. Itop imachiti iga nacaatap iyaac porque ijispa iga cupóyayñeyajum itumpiy jém preso. ²⁸ Pero jém Pablo pimi ijíyáy. Inímáy:

—Odoy watí jempic. Da apoyñeta, antumpiytam aitta yim.

²⁹ Jesic jém carcelero iwác jucti. Tigiy poyimi jém cárcel. Pimi cuetsáypa, tsam cñne. Ocmi costeññeactij jém Pablo y Silas iwiñjom. ³⁰ Ocmi itop jém Pablo y Silas. Icwác. Inímáy:

—Mipixiñtam, ¿ti wiap anwat iga aciaccputtap?

³¹ Jesic jém Pablo y Silas inímáy:

—Cupici tánomi Jesucristo. Jesic miciaacputpa, ciaccputtaptim itumpiy jém ityajwip iníccim.

³² Jesic moj inmadáy Dios inmati jém carcelero con itumpiy jém ityajwip iticcim. ³³ Jeetim hora, tsuucim, danam cuquejne, jém carcelero icheáy jém Pablo y Silas icoowaji. Jesic jeeti rato acchinyajta jém pixiñ con itumpiy jém ityajwip iticcim. ³⁴ Ocmi ininic iticcim jém Pablo y Silas iga acwícyajtap. Agui maymay jém pixiñ con itumpiy jém ityajwip iticcim porque icupicyaj Dios.

³⁵ Icuquejama jém juezyaj icutsatyaj juten jém policía iga inímáyíñ jém carcelero iga icutsigáyíñ jém Pablo y Silas. ³⁶ Jesic ocmi jém iwatnewip cuenta jém cárcel inmadáypa jém Pablo:

—Apimiy jém juezyaj iga mancutsigáyíñ. Siip puttaamim. Chogoyñicsim.

³⁷ Pero jém Pablo inímáy:

—Aunque aichtam aRomapic, acótstamta jém pixiñtam iwiñjom ni da i acipij. Acotta cárcel.

¿Que ijisyajpa iga siip ayamcutsigayyajtooba? Da wiap. Más wí iga miñyajiñ jeeyaj iga acutsigayyajpa iyaac.

³⁸ Jém policía nic inmadayyaj jém juezyaj. Jesic tsam pimi cinyaj jeeyaj cuando imatonyaj iga Romapic pixiñtam. ³⁹ Jesic miñyaj jém juezyaj iga iwágáypa perdón jém Pablo y Silas iga tsam imalwadáy. Iacunucsay iga pudiñ jém attebet. ⁴⁰ Cuando yajum puti cárcel jém Pablo y Silas, nic jém Lidia iticcim. Nic iámyaj jém tantiwitam. Inquímyaj ti wiap iwatyaj. Ocmi nicyajum.

17

Cujíñáypa jém Tesalónicapic pixiñtam

¹ Jesic jém Pablo y Silas nasyaj jém attebet de Anfípolis y Apolonia. Ocmi núcyaj jém attebet Tesalónica jut it tum jém judíos isinagoga. ² Juuts siempre jém Pablo tigiypa jut antuumaneyaj. Tucunasemana inquejáypa Dios inmati cada jejucuyjama. ³ Inquejáy jém pixiñtam jut jayñeta jém Dios inmati. Inmadáypa iga tienes que yaachwattap jém Cristo y ocmi acpistap. Inímáytim:

—Yíptim mismo Jesús siip manañmadáypa, je jém Cristo.

⁴ Jesic algunos jém Israelpic pixiñtam icupicyaj, inpitsyaj jém Pablo y Silas. Icupicyajtim jáyan jém griegopic pixiñtam jém ijisyajpáppic Dios y wati jém wítampic yomtam jém jixiywiip. ⁵ Ocmi jém judíos, jém dapic icupicyajpa jém wibic anmati, tsam najajóypa. Antuumayaj con algunos jém malopic pixiñtam jém dapic yoxayajpa, jém witwidoypáppic calle. Ictsumyaj tum mijpic

bullá iga iccujíñáypa jém p̄ixiñtam. Inñácsayyaj jém Jasón itic. Imétstip jém Pablo y Silas iga itopyajpa iga ininicyajpa jém p̄ixiñtam iwiñjom. ⁶ Pero cuando da ipát jém Pablo ticjom, matsyajta jém Jasón con algunos jém tantiwitam. Ijictēñayj hasta jém anjagooyiciim. Jém p̄ixiñtam p̄imi anweyjajpa. N̄imyajpa:

—Yíbam p̄ixiñtam iccujíñayñeyaj icuwiti yíp naxyucmi. Siip núcneyajum yim. ⁷ Yíp Jasón ipictson̄ne iticciim. Itumpiy de jeeyaj da iwatyajpa juuts n̄impa jém Romapic anquímayooyi. N̄imyajpatim iga it tungac rey, jém Jesús.

⁸ Jesic jém p̄ixiñtam con jém anjagooyiyaj tsam p̄imi cujíñayyaj cuando imaton̄ ti n̄imyajpa. ⁹ Jesic jém Jasón con icompañeroyaj ichiiyaj tumiñ jém anjagooyi iga odoy más idiñ jém bullá. Ocmi cutsigayta.

Jém Pablo y Silas nicpa jém attebet Berea

¹⁰ Jesic jeeti tsuu jém tantiwitam icutsatyaj jém Pablo y Silas iga nicyajíñ jém attebet Berea. Ocmi cuando núcyaj, tigiyay jém judíos isinagoga.

¹¹ Pero jém Bereapic p̄ixiñtam más da maloyaj que jém ityajw̄ip jém attebet Tesalónica. Tsam maymayyaj, iw̄ipictson̄yay jém Dios in̄mat̄i. Cada jama icuyujcayajpa jém an̄mat̄i jém jayñew̄ip, icuámyajpa siiga n̄uma jesaneum juuts iñímáy jém Pablo. ¹² Jeeyucmi tsam jáyan̄ de jeeyaj icupicyaj. Icupicyajtim jáyan̄ jém griegop̄ic yomtam y p̄ixiñtam jém w̄itampic. ¹³ Pero jém judíos jém ityajw̄ip Tesalónica, cuando ijodónayaj iga jém Pablo in̄mat̄pa Dios in̄mat̄i Berea, nicyaj jem̄ic

iga iccujíñayajpatim jém p̄ixiñtam. ¹⁴ Jesic jém tant̄iwitam jém ityajw̄ip Berea jicsciy icutsat jém Pablo jém lamar aññaca. Pero jém Silas y Timoteo tsíyyaj jém attebet Berea. ¹⁵ Jém iwagananicnew̄ip jém Pablo ininicyaj hasta jém attebet Atenas. Cuando setyaj, jém Pablo icutsadáy añmāti jém Silas y Timoteo con jeeyaj. Iníímáy iga: Jicsciy miñi, da mijáypa.

Jém Pablo it jém attebet Atenas

¹⁶ Iganam jém Pablo injócpa jém Silas y Timoteo, iix iga jém ityajw̄ip jém attebet Atenas agui icupicyajpa jém watnas. Tsam jáyañ ityaj. Jesic jóyñe jém Pablo ñanamajom. ¹⁷ Jeeyucmi añmatyajpa jém Pablo con jém ityajw̄ip jém sinagoga, jém judíos, con jém tun̄gac p̄ixiñtam jém ij̄isyajpáppic Dios. Cada jama añmatyajpatim jém Pablo con jém p̄ixiñtam jém ipátneyajw̄ip plaza. ¹⁸ Jenum ipátyaj algunos jém p̄ixiñtam jém icuyujcanew̄ip jém epicúreospic in̄químayooyi con jém icuyujcanew̄ip jém estoicospic in̄químayooyi. Jeeyaj moj añmātiyaj con jém Pablo. N̄imyajpa:

—¿Tí n̄imtooba yíp p̄ixiñ tsam añmattero?

Tun̄gac jém p̄ixiñtam n̄imyajpa:

—Quénam tum najíyoypaap de tun̄gac dios.

N̄imyajpa jem̄pic porque jém Pablo in̄matpa jém Cristo in̄químayooyi iga pis jém Jesús de jūt it jém caaneyajw̄ip. ¹⁹ Ocmi jém p̄ixiñtam ininicyaj jém Pablo tum lugar in̄yi Areópago jūt siempre añtuum̄yajpa iga accuyujóypa. Jém p̄ixiñtam icwácyaj jém Pablo. Iníímáy:

—Aichtam anjodónatooba tiapaap yíp jomipic anquímayooyi jém michpic inimiñ. ²⁰ Mich anañmadáypa tungac jixi jém dapic queman ammaton̄ta. Anjodónatooba ti nimtooba.

²¹ Porque itumpiy jém Atenaspic pixiñtam con jém juumipic pixiñtam jém ityajw̄ip jem, tsam iwianjamyaj jém jomipic jixi iga imatonjajpa y iga inmatyajpa.

²² Ocmi jém Pablo teñchucum jém pixiñtam anjucmi jém ityajw̄ip jém Areópago. Inimáy:

—Mimichtam, miittanw̄ip Atenas. Ánix iga tsam jáyan diosyaj in̄jistámpa. ²³ Cuando anas jut it wati jém in̄dios, ampát tum altar jut jayñeta yíp anmat̄i. Nimpa jém letra: “Jém dios jém dapic i iixpicpa.” S̄ip manañmadáypa de jém Dios, jém dapic in̄ixpictámpa mimichtam.

²⁴ Yibam Dios iwat jém nas con itumpiy jém ityajw̄ip yíp naxyucmi. Im̄chi jém sin̄ y jém nas. Da siiba jém masticjom jém iwatnew̄ip jém pixiñtam. ²⁵ Jém pixiñtam da w̄iap iyoxpátyaj yíp Dios iga ichiiba titam itogóyáy. Porque je iniit itumpiy cosa. Tachiiba tamvida tantumpiytam. Tachiibatim jém sawa iga tasaupicpa. Tachiiba itumpiy cosa.

²⁶ De tum pixiñ ictsucum iga ityaj itumpiy jém naciónyaj jém ityajw̄ip icuw̄iti de yíp naxyucmi. Ij̄ispa jut itpa jém naciónyaj y jutsan̄ ityaj. ²⁷ Dios iwadáypa jem̄pic porque ixunpa iga icuámiñ jém pixiñtam iga w̄iañ ipát. Numa Dios da juumi it con taichtam. ²⁸ Porque yíp naxyucmi tanwaganaitpa Dios. Je tachiiba tamvida y tamp̄imi. Tum

de mimichtam jém ininmatcwiñ nimpá iga: “Tañchtam Dios tamañictam.” ²⁹ Siiga Dios tamañictam, da wíap tanjista iga tanjatun Dios jex juuts tum watnas jém watnetawíip de oro, plata o tsa, jém ijixquímpáppic jém pixiñtam iga iwatpa. ³⁰ Dios da ijsáy itañca jém wiñcípíic pixiñtam porque jeeyaj da ijodon ti wí tanwat. Pero síip Dios ipimíy itumpiy jém pixiñtam icuwíti de yíp naxyucmí iga icucacyajiñ ijixi. ³¹ Porque Dios ichac tum jama iga icípinpa itumpiy jém pixiñtam, jém ityajwíip yíp mundo. Iwíicípinpa con tum pixiñ jém iccámnnewíip juuts juez. Tanquejáy tantumpiytam iga numa iwatpa jempic cuando pis yíp pixiñ de jut it jém caaneyajwíip.

³² Jesic cuando imatonyaj jeeyaj iga pis tum pixiñ caanewíip, algunos agui ixiccayajpa. Pero jém tungac nímajpa:

—Tungac jama ammatontooba eybic ti miñimpa.

³³ Jesic put jém Pablo jut antuumaneyaj. Nic.

³⁴ Pero algunos jém pixiñtam nic itúnjy jém Pablo. Icupictim jém Cristo inquímayooyi. Itúnjy jém Dionisio tum Areópagopic pixiñ, y tum yomo iñiyi Dámaris con tungac más.

18

Jém Pablo nicpa jém attebet Corinto

¹ Ocmí jém Pablo put jém attebet Atenas. Nic jém attebet Corinto. ² Jemum ipát tum judío iñiyi Aquila. Nay jém attebet Ponto. Yaguiñ miñ de jém naxyucmí de Italia. Iwaganamiñ iwíchomo Priscila. Putyaj jém naxyucmí de

Italia porque jém Romapic anjagooyi jém Claudio ipimíy itumpiy jém Israelpic pixiñtam iga pudiñ jém attebet Roma. Jesic jém Pablo nic ijooyáy jém Aquila y Priscila. ³ Jeetim yoxacuy iwatyajpa juuts iwatpa jém Pablo. Jeeyucmi nicpa iwaganaityaj. Wagayoxayajpa. Iwatyajpa jém puctuctic. ⁴ Cada jejcuy jama jém Pablo nicpa inquejayyaj jém antuumaneyajwip jém sinagoga. Icupicyaj jém judíos con jém tungac pixiñtam jém dapic je de Israel.

⁵ Mu ixetyaj jém Silas y Timoteo de jém Macedonia jém Pablo inmadáypa jém judíos con itumpiy ijixi iga Jesús je jém Cristo. ⁶ Pero jeeyaj tsam ijóixyajpa jém Pablo. Tsam imalmalnímayyaj. Jesic Pablo icuxicsáy iyooti juuts tum seña. Inímáy:

—Michtam iniit la culpa siiga micaaba y da impictsonpa jém vida jém dapic cuyajpa. Ich da anai la culpa. Dende sip nicpa ananmadáy jém tungac pixiñtam jém dapic je de Israel.

⁷ Jesic put jém sinagoga, nic tum pixiñ iticim iníyi Justo. Jém sinagoga anaca it jém itic. Yip pixiñ tsam jispa Dios. ⁸ Jém sinagoga injagooyi iníyi Crispo. Icupictim jém tánomi con itumpiy jém ityajwip iticim. Jesic tsam jáyan jém Corintopic pixiñtam mu imatonyaj ti nimpá jém Pablo, icupicyajtim jém Cristo y acchiniyajtá. ⁹ Jesic tum tsuu jém Pablo iix tum poñ. Jém tánomi inímáy jém Pablo:

—Odoy ciji. Seguido anmati ich ananmati. Odoy tsaci iga ininmatpa. ¹⁰ Ich manwaganait mimich

jeeyucmi da i wiap mimalwadáy. Tsam jáyan ampixiñtam anaít yíp attebet.

¹¹ Jesic jemigam tsíy jém Pablo tum amtíy y medio jém attebet Corinto. Inquejáypa jém pìxiñtam jém Dios inmati.

¹² Jém tiempo jém gobernador Galión injacpa jém naxyucmi de Acaya. Jesic jém judíos anuumayaj iga imatsyajpa jém Pablo. Ocmi nanicta jém anjagooyicim. ¹³ Inimayyaj jém gobernador:

—Yíp pìxiñ inquejáy jém pìxiñtam iga ijsyajiñ Dios con tungac anquímayooyi jém dapic jex juuts aichtam ananquímayooyi.

¹⁴ Jesic jiytooba idic Pablo cuando jém Galión inimáy jém Israelpic pìxiñtam:

—MiIsraelpic mipìxiñtam, siiga tsam mijpic tánca iwat yíp pìxiñ o siiga accaoyñe, jesic mammatóráypa ti miñimpa. ¹⁵ Pero siiga nada más ininjacatámpa michtam ininmadayooyi y jém ininquímayooyi y jém inDios inñiyi, jesic witsactaami inñaac. Da ancipinjooba jexpic cosa.

¹⁶ Jesic topyajta jém anjagooyicim. ¹⁷ Cuando putyaj, jesic jém griegopic pìxiñtam imatsyaj jém Sóstenes jém sinagoga injagooyi, icótsyaj jém gobernador iwiñjom. Pero jém Galión da iwadáy caso.

Jém Pablo set eybic jém Antioquía

¹⁸ Jenum tsíy jém Pablo jáyan tiempo. Ocmi inquímayaj jém tantiwitam, tigíypa barcojom con jém Priscila y Aquila iga nicyajpa jém naxyucmi de Siria, jém attebet Cencrea. Antes que tigíypa jém barcojom, icujebáy icobac juuts tum seña iga iccupacpa juuts ijycámayñe Dios. ¹⁹ Ocmi núcyaj

jém attebet Efeso. Jemum ichacyaj jém Priscila y Aquila. Jesic tigiy jém sinagoga jém Pablo iga inquejáypa Dios inmati jém judíos porque jemum an̄tuumaneyaj. ²⁰ Jém p̄ixiñtam icunucsayyaj jém Pablo iga tsíyiñ más jáyan tiempo con jeeyaj, pero Pablo da ijíc. ²¹ Cuando nictoobam jém Pablo, inquím jém p̄ixiñtam. Inímáy:

—W̄i iga anicpa Jerusalén iga anacnasp̄a jém sin̄ jém miñp̄appic. Pero eybic miñpa mánámta siiga Dios iw̄ianjam.

Ocmi tigiy barcojom jém attebet Efeso. Nic Cesarea. ²² Cuando núc jém Cesarea, nictim Jerusalén iga idioschiyajpa jém Dios ip̄ixiñtam. Ocmi nic jém attebet Antioquía.

²³ Jesic jáy iti juna jama Antioquía. Ocmi put eybic. Nic yim jeexic cada tumtum tiganjoj jut oyñe wiñti. Nas icuw̄iti jém naxyucmi de Galacia y Frigia. Iyoxp̄atpa jém Dios ip̄ixiñtam iga odoy ichaguiñ jém Dios inmati.

Jém Apolos najiyóypa jém attebet Efeso

²⁴ Jesic jeetim tiempo núc jém attebet Efeso tum judío in̄iyi Apolos. Nay jém attebet Alejandría. Tsam wiap̄ inijiyóy. Tsam iw̄icutīiyíypa jém Dios inmati. ²⁵ Tsam iw̄icuyujcane ti ixunpa tan̄jatun̄ Dios iga tan̄watpa. Inmatpa Dios inmati con itump̄iy ianama. Iw̄ianquejáypa jém p̄ixiñtam jém tán̄omi Jesucristo inquímayooyi. Mex da iw̄ijodon̄ jém an̄químayooyi, no más ijodon̄ jém Xiwan inquímayooyi jém acch̄iñoypaap. ²⁶ Jém Apolo tigiy jém sinagoga, moj inmat jém Dios inmati. Je da c̄iñpa. Pero cuando jém Priscila y Aguila

imaton̄yaj, ininicyaj jém Apolo tun̄gac áņeymi. Iwian̄quejáypa iga más iwicut̄iıyíypa jém tan̄Jatun̄ Dios in̄madayooyi.

²⁷ Jesic cuando nictooba jém Apolo jém naxyucmi de Acaya, jém tant̄iwitam jém ityajw̄ip Efeso tsam iyoxpátıyajpa. Ijáyáy tum̄ toto jém ityajw̄ip Acaya iga w̄ipictson̄taıñ jém Apolo. Jesic ocmi cuando núcneum Acaya jém Apolo, tsam iyoxpát jém icupicneyajw̄ip Cristo, jém ipictson̄neyajw̄ip jém Dios itóyooyi.

²⁸ Iwian̄quejáypa jém judíos jém pixiñtáman̄jom iga da w̄iputne jém in̄quımayooyi. Tsam w̄iquejpa jém migooyi y jeeyaj da w̄iap in̄yam. In̄quejpa con Dios in̄matı jém jayñew̄ip iga numa Jesús je jém Cristo jém in̄jócyajpápic.

19

Jém Pablo nicpa Efeso

¹ Iganam it jém Apolo jém attebet Corinto, naspá jém Pablo jém tigan̄joıyaj jém ityajw̄ip jém cotsigan̄jom jém naxyucmi de Galacia y Frigia. Ocmi núc Efeso. Jenum ipát algunos jém icupicneyajw̄ip Cristo. ² Jém Pablo icwác jém pixiñtam. In̄ímáy:

—¿Que impictson̄ta jém Dios iAnama cuando moj in̄cupic Cristo?

Nımyajpa:

—Da ammaton̄ta siiga it jém Dios iAnama.

³ Jesic jém Pablo icwác. In̄ímáy:

—¿I in̄ıyımı micchin̄tamta?

Nımyajpa:

—Acchĩntamta juuts acchĩńóypa jém Xiwan jém acchĩńoypaap.

⁴ Jém Pablo ińĩmáy:

—Jém Xiwan icchĩpa jém pĩxińtam juuts tum seña iga icucaguiń jém ijĩxi. Ińĩmáytim iga icupĩguiń jém mińpáppic ocmi, je jém Jesucristo.

⁵ Jesic yaj imatonɣaj, acchĩɣajtap jém tánŌmi Jesús ińiyĩmi. ⁶ Jém Pablo ichicunúc cada tumtum icobacyucmi, jesic ipĩctsonɣaj jém Dios iAnama. Moj jĩyi tungac ańmatĩmi. Inmatyajpa jém jĩxi jém ichiĩnewĩp Dios. ⁷ Ityaj jem con itumpĩyyaj como doce jém pĩxińtam.

⁸ Jáy ĩti jem jém Pablo tres meses. Tigiy jém sinagoga, da cĩpa inmat. Chocoymi inquejáypa jém pĩxińtam jutsap injac Dios yĩp naxyucmi. ⁹ Pero algunos tsam maloyaj ianama, da icupĩcyaj. Tsam imalmalnimayyaj jém tánŌmi inquĩmayooyi jém pĩxińtam iwińjom. Jesic jém Pablo ichaganputyaj jeeyaj. Ininic jém icupĩcnewĩp Cristo tum escuela jém Tiranno imĩchi. Jemum accuyujóypa cada jama. ¹⁰ Jemum tsiy wisten amtiy. Jempigam itumpiy jém ityajwĩp jém naxyucmi de Asia imatonɣaj jém tánŌmi inquĩmayooyi. Mińyaj jém judíos con jém tungac pĩxińtam jém griegopic. ¹¹ Dios ichi ipĩmi jém Pablo iga wiĩĩ iwat jém mĩjtampic milagro. ¹² Siiga jém Pablo ichicpa tum pańuelo o tum puctucu y ocmi cutsadaytap tum mimnewĩp iga ichĩguiń, jesic pĩspa. Putpatim jém mal espĩritu.

¹³ It idic jem algunos jém judíos jém nicyajpáppic yĩm jeexic, jeeyaj itopyajpa jém mal espĩritu.

Itopyajtoobatim idic jém Jesucristo iñiyimi. Iñimáypa jém imatsnewip jém mal espíritu:

—Siip mampiimiypa. Jém Jesús iñiyimi jém inmatpáppic jém Pablo, puti de jem.

¹⁴ It idic tum judío iñiyi Esceva, cobacpic panij. Iniit siete ijaymanic, iwatyajpatim jempic. ¹⁵ Jesic tum jama cuando itopyajpa idic tum mal espíritu, jiyapa jém mal espíritu, nimpá:

—Ich ánixpicpa jém Jesús. Ánixpicpatim jém Pablo. Pero mich, ¿mijapaap?

¹⁶ Ocmi jém pixiñ jém iniitwip jém mal espíritu yóyquimpa, moj áñajiyaj con jém itopyajpáppic idic. Como tsam iniit ipimi jém iniitwip jém mal espíritu, icoñwiy; más wiap que jém sietepic, jém itopyajpáppic idic. Tsam pimi malwadayyajta. Poyyaj icusiciyaj hasta iticcim, coowaneyaj.

¹⁷ Itumpiy jém ityajwip jém Efeso ijodónayaj, jém judíos con jém griegopic. Tsam cinjay. Tsam pimi icujípyaj jém tánomi Jesús. ¹⁸ Jesic jáyan jém icupicneyajwip Cristo miñ inmadáyayyaj Dios jém itánca titam iwatne pecam. ¹⁹ Miñyay jáyan jém nawatyaj. Inimiñyay jém ilibroyaj. Miñ iñoquetyaj jém pixiñtam iwiñjom. Ocmi ijisyaj jutsan ivale jém libro. Ivale cincuenta mil tumiñ de plata. ²⁰ Jempam tsam jáyanap jém Dios inmati, tsam wiquejpa jém tánomi ipimi.

²¹ Ocmi cuando nas itumpiy yípyaj cosa, jém Pablo ijis iga nicpa jém naxyucmi de Macedonia y Acaya y ocmi hasta Jerusalén. Nimpá:

—Wiñfi anicpa Jerusalén, ocmi anictoobatim jém attebet Roma.

²² Jesic jém Pablo icutsat jém naxyucmi Macedonia wisten jém icuyoxayajpaap jém Timoteo y Erasto iganam tsíy jém Pablo juna jama jém naxyucmi de Asia.

Cujiñayyaj jém ityajwip Efeso

²³ Jeetim tiempo tsam inacayajpa jém Dios inquímayooyi. Jém dapic icupicpa Cristo pimi ijóyixpa jém wibic anquímayooyi. ²⁴ Tum pixiñ iníyi Demetrio ictsucum jém pleito. Yíp pixiñ tum platero, iwat tum xutu mastic iwatnas. Jém watnas en forma de jém dios iníyi Diana imastic. Yíp pixiñ con icompañeroyaj icoñwiyyajpa jáyan tumiñ con jém iyoxacuy. ²⁵ Anuumayajpa con jém tungac pixiñtam jém iwatyajpáppic jexpictim yoxacuy, nímayajta:

—Mantiwitam, michtam inwijodon iga tsam tawitpa con yíp yoxacuy. ²⁶ Síp inixñeta y imatoneta ti nimpa yíp Pablo. Síp inmat iga jém diosyaj, jém watnetawip cimi, da je nunta dios. Tsam icupicyajpa jáyan pixiñtam, da no más yim Efeso, pero icupicyajpatim icuwiti jém naxyucmi de Asia. ²⁷ Da wi siiga togoypa jém tanyoxaji. Da wi siiga tsíypa jém tammastic juuts tum cosa da para ti wi. Da wi siiga jém pixiñtam mojpa ijóyixyaj jém tandios Diana, jém siippic ijisyajpa itumpiy jém ityajwip Asia y icuwiti de yíp naxyucmi.

²⁸ Cuando imatonyaj ti nimpa jém Demetrio, jesic tsam jóyyaj jém pixiñtam. Tsam pimi anweyjajpa. Nímyajpa:

—Tsam w_i jém tandios Diana, jém tanj_istampáppic y_im Efeso.

²⁹ Jesic cuj_iñayyaj jém p_ix_iñtam icuw_iti jém atebet. Itump_iy de jeeyaj poy_im_i n_icyaj jém m_ij_pic a_nci ju_t iwatyajpa jém asamblea. Matsyajta jém Gayo y Aristarco jém Pablo icompañeroyaj, Macedoniap_ic jeeyaj. Nan_icyajta poy_im_i hasta ju_t a_ntuum_ayajpa jém Efesop_ic p_ix_iñtam. ³⁰ Jém Pablo tig_iytooba idic ju_t a_ntuumaneyaj jém p_ix_iñtam iga icupujpa jém w_isten. Pero jém icup_icneyajw_ip Dios da ij_igáy. ³¹ Ittim jem jut_en jém Pablo iamigoyaj, jém Asiap_ic a_njagooyiyaj. Jeeyaj icut_sadáy a_nm_ati jém Pablo iga odoy tig_iy_iñ jém m_ij_pic a_nci.

³² Tsam jáya_n jém p_ix_iñtam a_ntuumaneyaj, tsam p_imi a_nweyajpa. Tum n_impa tum cosa y tun_gac n_impa tun_gac cosa. Porque tsam cuj_iñayyaj jém p_ix_iñtam. Casi da _i ij_odo_n tiiga a_ntuumaneyaj.

³³ Jesic algunos jém ityajw_ip jem in_madayyaj jém Alejandro tiiga a_ntuumaneyaj jém p_ix_iñtam. Jesic jém judíos iyácte_n inin_ic jém Alejandro jém p_ix_iñtam iwiñ_om iga ij_iyáyiñ. Jesic jém Alejandro iwat seña con ici iga odoy j_iyyajiñ jém p_ix_iñtam porque icupujtooba jém w_isten p_ix_iñ. ³⁴ Pero cuando icut_iy_iyayaj jém p_ix_iñtam iga judío jém Alejandro, jesic tsam p_imi a_nweyajpa dos hora. N_imyajpa:

—Tsam w_i tandios, Diana, jém tanj_istampáppic y_im Efeso.

³⁵ Jesic ocmi jém secretario in_ji_yjac jém p_ix_iñtam. Cuando cuyaj iga a_nweyajpa, iñ_imáy:

—MiEfesopic mipixiñtam, da i ni tum pixiñ jém dapic ijodon iga taichtam taccámnetá iga tanwattámpa cuenta jém tammastic jut it jém tandios Diana y jut it jém iwatnas jém actiñnewiip sinyucmi. ³⁶ Da i wiap iñim iga migooyi. Jesic odoy jiytaami más. Odoy ti wattaami siiga da wiñti iñjiswa ti inwatpa. ³⁷ Porque yíp wisten pixiñ da icujiyñe jém iñdios Diana ni da imalnímayñe. ³⁸ Yíp Demetrio con icompañeroyaj siiga i ijóyixpa, wiap iquejajwadáy jém juezcim. Jeeyucmi it jém juez iga icipinpa jém pleito. Jemum wiap iwitsacyaj. ³⁹ Siiga algo más iñxuntámpa, wi iga ininjóctámpa hasta cuando tantuumawattámpa jém tananjagooyi. ⁴⁰ Siip wiap i taquejajwadáypa iga tarebelde porque tantuumata sin anjagooyi. Da ti wiap tannim siiga tacwáctamtap tiiga it yíp bulla.

⁴¹ Yaj nimi jempic, jém secretario iccuyaj jém junta.

20

Nicpa jém Pablo jém Macedonia y Grecia

¹ Cuando cuyaj jém bulla, jesic jém Pablo inwejay jém icupicneyajwip Cristo iga ichiiba jixi. Ocmi inquímyaj, nanuusyajta. Nic jém Pablo jém naxyucmi de Macedonia. ² Jut quej nicpa, inquejay jém tantiwitam ti wiap iwatyaj. Inmadayyaj tsam jáyan aḡmati. Cuando yaj icuwitxet jém Macedonia, núc jém naxyucmi de Grecia. ³ Jemum tsíy tres meses. Cuando tigiyooba idic jém barcojom iga nicpa jém Siria, imaton iga algunos jém judíos imétsyajpa jutsap iccaayaj. Jeeyucmi

jém Pablo ijis iga setpa puymi. Naspá eybíc jém naxyucmi de Macedonia. ⁴ Jesic juten jém iamigoyaj itúnjyyaj jém Pablo. Nicyaj jém Sópater, tum Bereapic p̄ixiñ, y Aristarco. Nicyajtim tum Tesalónicapic p̄ixiñ iñjyi Segundo, tum Derbepic p̄ixiñ iñjyi Gayo y Timoteo. Nicyajtim jém Tíquico y Trófimo, tsucumneyaj jém naxyucmi de Asia. ⁵ Yipyaj tantiwitam anjagóy miñicyaj, jemigam ananjócyajpa jém attebet Troas. ⁶ Cuando nas jém sin iga cúttap jém caxtánañi sin levadura, jesic atsucumta jém Filipos, atigiyta barcojom. Awitta barcojom cinco día hasta anúcta jém attebet Troas. Jemigam anactsíy jém ánamigoyaj jém tsucumneyajw̄ip wiñti. Jemum atsíyta siete día.

Jém Pablo nicpajoyi jém attebet Troas

⁷ Jém wiñtipic jama de jém semana, anjtuumayaj jém icupicneyajw̄ip Cristo iga iwécyajpa jém caxtánañi. Jém Pablo moj accuyujooyi. Nictooba Pablo jém tungac jama jeeyucmi accuyujóypa hasta cugapsu. ⁸ Anjtuumaneta tum cuarto jém yucmipic piso. Jemum tsocpa jáyan jucti. ⁹ Iftim jem tum woñjaychixi iñjyi Eutico. Coñ jém ventana yucmi. Como jém Pablo tsam jáyan hora inmat jém Dios inmati, imats moñi jém jaychixi, jesic joobanjas jém tucuten piso iyucmi. Cuando pin̄ta, caaneum. ¹⁰ Jesic quet jém Pablo, icunúc noco, innuusáy. Iñímáy jém ityajw̄ip jem:

—Odoy c̄intaami. Da caane, vivo.

¹¹ Ocmi Pablo quím eybíc jém yucmipic piso. Iwéc jém caxtánañi, wícyaj. Jesic seguido moj inmat

jém Dios in̄māti hasta cuquej. Ocm̄i nic̄ jém Pablo.
 12 Jesic̄ nan̄ictā jém jaych̄ixi itic̄c̄im, vivojam. Agui
 maymayyaj iga da ca.

N̄icpa Pablo jém attebet Mileto

13 Aichtam̄ an̄jagóypa an̄icta barcojom̄ hasta jém
 attebet Asón iga jem̄igam̄ amp̄icnaspa jém Pablo.
 Jem̄pigam̄ an̄watneta trato. Nic̄ jém Pablo puymi.
 14 Cuando anact̄síȳtam̄tā jém attebet Asón, tigiȳ
 barcojom̄ jém Pablo, awagan̄icta jém attebet Mi-
 tilene. 15 Jesic̄ aputta de jem̄, jém tun̄gac̄ jama
 an̄umnas jém attebet Quío. Tun̄gagam̄ jama an̄ucta
 jém attebet Samos. Amon̄ta noco jém attebet
 Trogilio. Tun̄gac̄ más jama an̄ucta jém attebet
 Mileto. 16 Jém Pablo ij̄is iga an̄umnastampa jém
 attebet Efeso iga da ajáȳtampa jém naxyucm̄i de
 Asia. Agui jic̄scȳ n̄ictooba Jerusalén iga ict̄síȳiñ
 jém siñ de pentecostés siiga wiap.

Jém Pablo ichi j̄ixi jém an̄jagooyiyaj

17 Cuando an̄ucta jém Mileto, jém Pablo in̄wejaȳ
 jém Dios ip̄ixiñtam̄ in̄jagooyiyaj jém ityajwiip̄ Efeso.
 18 Cuando n̄úcneyaj, iñim̄áy jém Pablo:
 —Michtam̄ in̄jodon̄ ti an̄watne dende jém
 wiñtip̄ic̄ jama cuando an̄uc̄ jém naxyucm̄i de
 Asia. 19 Itump̄iȳ tiempo cuando man̄waganaītta
 mimichtam̄, tsam̄ an̄cuyoxā jém tán̄om̄i. Da
 anacuj̄iptā anyaac. Tsam̄ p̄imi anyácne. Tsam̄
 acut̄it̄stā porque jém judíos ij̄isyaj jutsap̄ accaayaj.
 20 Pero ich̄ da antsac̄ iga manan̄madáy itump̄iȳ
 jém Dios in̄māti jém tsam̄pic̄ miyoxpátpa.

Manañquejáy jut añtuumaneyaj jáyan jem pixiñtam y manañquejáytim iñtíccim.

21 'Añañmadáy jem judíos con jem dapic je judíos iga icucacyajiñ ijixi jem Dios iwiñjom y iga icupicyajiñ jem tánQmi Jesucristo. 22 Siip anicpa Jerusalén. Apimíy jem Dios iAnama. Da anjodon ti acnascatap jemíc. 23 No más cada tiganjoj jut ich anicpa, jem Dios iAnama acjodónap iga ayaachwattap, apajtap. 24 Pero da añwadáypa caso. Ni datim añçinpa iga accaatap. Da ti cuwacuy jem amvida. Ich amaymay siiga anaccupacpa jem anyoxacuy y siiga añwatpa juuts apimíy jem tánQmi Jesús iga añañmatpa jem wibic añmañi iga Dios tsam tatoypa.

25 'Siip ich añwijodon iga ni tum de mimichtam, jem manañmadayñewip jem Dios inmañi, da eybic ánixtámpa. 26 Jeeyucmi siip tsam manñimaytooba iga ich da anai la culpa de ninguno de mimichtam siiga mitogoypa y da impictsonpa jem vida jem dapic cuyajpa. 27 Mañwianmadáy itumpiy jem Dios inmañi. Da ti añañécne ni uxañ. 28 Siip nawattamtaji cuenta mimichtam iñyaac. Minjagooyítam jem miccámnewip Dios iAnama, wattaami cuenta jem Dios ipixiñtam jem ijuyñewip jem tánQmi Cristo con iñpiñ. 29 Ich anjodon iga cuando anicneum, miñyajpa jem migoyyajpaap iga ictogoypa jem Dios ipixiñtam juuts tum lobo tsam malo iccaaba jem borrego. 30 Mimichtámanjom tsucumpa algunos jem migoypaap. Moypa imigóyáy jem icupicnewip Cristo iga ictsacpa jem Dios inmañi iga iccupiguiñ

jém miḡooyi. ³¹ Jesic nawattamtaj̄i cuenta. J̄istaami iga tres am̄tiy oy manañmadáy jém Dios in̄māti tsuuc̄im y siñ̄ni. P̄imi manañquím hasta awejpa iga odoy i mictsaguiñ jém Dios in̄māti.

³² S̄ip mañc̄ijun̄cotpa jém tan̄jatun̄ Dios ic̄ijom iga miwattámiñ cuenta y iga miyoxpátpa con jém wibic an̄māti iga tsam̄ tatoypa Dios. Jém an̄māti tsam̄ miyoxpátpa iga más in̄wicup̄icpa. Miyoxpátpa iga imp̄ictson̄pa jém herencia con itump̄iy jém cuáyñew̄ip̄ ianama. ³³ Da mañcusún̄iyáy jém in̄tumiñ, plata y oro, ni jém impuct̄ucu. ³⁴ Michtam in̄wijodoñ iga ich ayoxa an̄c̄imi iga odoy ti atogóyayiñ ni ich ni jém an̄waganait̄w̄ip̄. ³⁵ Siempre manañquejayñeta iga w̄i iga tayoxap̄ iga tanyoxpátpa jém yaachayajpáppic. J̄istaami ti n̄impa jém tán̄omi Jesús cuando n̄im: “Más tamaymay iga tachióypa que iga tachiitap̄.”

³⁶ Cuando yaj n̄imi jempic, jém Pablo costeñ̄neact̄iñ, moj in̄wejpát Dios con itump̄iy jém ityajw̄ip̄ jem. ³⁷ Agui wejyajpa, itump̄iy nanuusyajta, in̄nacatsútsyay jém Pablo. ³⁸ Tsam̄ an̄yácneyaj jém p̄ixiñtam porque n̄impa jém Pablo iga da nunca iixyajpa eyb̄ic. Ocm̄i nic̄ ijagan̄tsacyaj hasta tigiy barcojom.

21

Jém Pablo nicpa Jerusalén

¹ Cuando antsacta jém tant̄iwitam, atigiyta jém barcojom. An̄umnic hasta jém attebet Cos. Jém tun̄gac jama anicta jém attebet Rodas y de jem anicta jém attebet Pátara. ² Jém attebet Pátara

ampátta tum barco jém nicpáppic Fenicia. Jemum atigiyta, anicta. ³ Jesic anastámum, ánix jém isla de Chipre. Tsíy tum lado añnaymi. Anumnic hasta jém naxyucmi de Siria. Jemum anúc porque jém barco ichacnaspá jém ichimi jém puerto de Tiro. ⁴ Jemum ampátta jém icupicneyajwip Cristo. Atsíyta con jeeyaj siete día. Dios iAnama icjodóna jém icupicneyajwip Cristo ti iñascaaba jém Pablo. Jeeyucmi nímayta jém Pablo iga odoy niguiñ Jerusalén. ⁵ Pero cuando núc jém siete día, mojum aniquitam. Itumpiy jém icupicneyajwip Cristo con iyomtám y con ichixtam nic ajagan̄tsacta añsicmi de jém attebet, jém lamar añnaca acosteñta, moj anañwejpátta Dios. ⁶ Ocmi anañquímtamta, ananuustamta. Aichtam aquímta barcojom. Jeeyaj setyajum iticmi.

⁷ Atsucumta jém Tiro, anicta hasta jém attebet Tolemaida. Jemum atsac jém barco, moj aniquitam puymi. Jesic jém attebet Tolemaida andioschi jém tantiwitam, atsíyta con jeeyaj tum jama. ⁸ Jesic icuquejama atsucumta aichtam con jém Pablo, anicta jém attebet Cesarea. Anúcta jém Felipe iticim. Je tsam wip inmadáy Dios inmati jém pixiñtam jém dapicnam icupicne. Yip pixiñ tum de jém siete jém iyoxpátpáppic jém apóstolyaj. Jemum atsíyta iticim. ⁹ Jém Felipe iniit cuatro iyommanic da jaayiyñeyaj. Dios iyoxpátta iga inmatyajpa ti miñpa. ¹⁰ Watña jama aitta jem cuando núc tum Judeapic pixiñ iñiyi Agabo, tum profeta, wipatim inmat ti miñpa. ¹¹ Miñ aámta. Ipiháy jém Pablo imijpactsencuy, jém icinturón.

Natsenta iyaac jém p̄ixiñ. Ichen ici y ipuy. Jesic n̄impa jém Agabo:

—N̄impa jém Dios iAnama iga jém attebet Jerusalén jém judíos ichénáypa así ȳip cinturón iomi, ocmi cījuñcottap jém tungac p̄ixiñtam ic̄ijom.

¹² Cuando ammaton̄ta ti n̄impa jém p̄ixiñ, jesic aichtam con jém tant̄iwitam jém ityajwīp Cesarea an̄iyacts̄iyta jém Pablo iga odoy n̄iguiñ Jerusalén.

¹³ Pero jém Pablo an̄ímayta:

—¿Tiiga miwejtámpa, tiiga ants̄igan̄yácwattámpa? Ich an̄j̄icpa iga atsentap y da solamente iga atsentap, an̄j̄icpatim iga accaatap Jerusalén jém tán̄omi Jesucristo icuyucmi.

¹⁴ Como da amaton̄ jém Pablo ti ann̄ímayta, jesic antsacta. Ann̄ímayta iga w̄ati juuts ixunpa jém tán̄omi.

¹⁵ Cuando cupac jém j̄ama iga aitta jém Cesarea, an̄w̄itsacta jém antraste, atsucumta. An̄icta jém attebet Jerusalén.

¹⁶ An̄wagananicta algunos jém Cesareap̄ic p̄ixiñtam jém icup̄icneyajwīp Cristo. Inin̄icyajtim tum Chiprep̄ic p̄ixiñ in̄iyi Mnasón. Ȳip p̄ixiñ tsam wiñigam icup̄icne Cristo. Jém Mnasón iniit it̄ic Jerusalén. Jenum an̄úcta, acw̄ictamta, y acmon̄tamta.

Jém Pablo n̄icpa ijooyáy jém Jacobo

¹⁷ Cuando an̄úcta Jerusalén, jém tant̄iwitam tsam aw̄ip̄ictson̄ta, agui maymayyaj. ¹⁸ Jesic icuquejama Pablo n̄ic ijooyáy jém Jacobo. Awagananictatim aichtam. An̄tuuman̄eyajtim jem

itumpiy jém wídaytam jém injacyajpáppic jém Dios ipixiñtam. ¹⁹ Jém Pablo idioschi. Ocmi inmadáy parejo jém antuumaneyajwip jutsap iwíwadáy Dios jém tungac pìxiñtam jém dapic je de Israel cuando oy inmadáy jém wibic anmati. ²⁰ Cuando imatonyaj, tsam icujípyaj Dios. Nímayta jém Pablo:

—Mantíwi, íxi iga tsam jáyan miles de jém judíos icupicneyaj jém Jesucristo inquímayooyi. Itumpiy de jeeyaj nímajpa iga da wí iga tantsacpa jém Moisés inquímayooyi. ²¹ Ijodóñaneyaj iga mich ininquejáy itumpiy jém judíos, jém juumipic nicneyaj, iga odoy icupiguiñ jém Moisés inquímayooyi. Ininquejáytim iga odoy iwadáyiñ imanictam jém marca de circuncisión y odoy iwadiñ jém wiñicpic costumbre. ²² ¿Jesic ti wíap tanwatta? Porque cuando imatonyaj jém pìxiñtam iga miñúcne, tienes que micutuumaçayajpa. ²³ Jesic wati juuts sip mannímáy. It yim con aichtam cuatro pìxiñ. Jeeyaj iccupactoba juuts ijycámáy Dios. ²⁴ Wagananici, wagachintaami juuts nímpa jém tancostumbre, yojóyaayi jutsan iwatpa gasto. Jesic ocmi wíap ijepyaj icobac. Jempigam icutiyyajpa itumpiy jém tantíwítam iga inwixpatim jém Moisés inquímayooyi y iga incupicpatim mex mich. ²⁵ Pero jém tungac pìxiñtam, jém dapic de Israel, jém icupicneyajwip Cristo, anjáyayne iga odoy iwadiñ jém Israelpic costumbre. No más annímáy iga odoy icúdiñ jém animat imayi jém accaatawip jém watnas iwiñjom ni odoy icúdiñ jém nipiñ ni odoy icúdiñ jém animatyaj jém pencanewip y odoy pejooyi.

Matsta Pablo jém masticjom

²⁶ Jesic jém Pablo ininic jém cuatro pixiñtam. Icuquejama wagaacchiniyajta con jeeyaj juuts nim jém Israelpic costumbre. Ocmi tigiyay jém mijpic masticjom iga quejiñ iga cupacpa iwatyaj jém costumbre y juchā ichacyajpa jém ofrenda cada tumtum de jeeyaj.

²⁷ Cuando cuyajtooba jém siete día, algunos jém judíos, jém miññeyawip de Asia, iixyay jém Pablo jém mijpic masticjom. Jesic iccujñayyay itumpiy jém pixiñtam jém ityajwip jem. Imatsyay jém Pablo. ²⁸ Pimi anweyaypa. Nimyajpa:

—MiIsraelpic mipixiñtam, ayoxpaati. Yibam jém pixiñ jém inquejaypappic jém pixiñtam jutinqej contra tannación, contra jém tanañquímayooi y contra jém tammastic. Tungac más táñca iwat. Inimiñ tammasticjom jém tungac pixiñtam jém griegoyaj. Inimiñ jém táñcaiywip jém wibic tammasticjom.

²⁹ Nimpa jempic porque iixyay iga jém Pablo iwaganasiba Jerusalén tum Efesopic pixiñ iniyi Trófimo. Jeeyucmi jeeyaj injampa iga inioy jém mijpic masticjom. Pero da inioy.

³⁰ Jesic kujñayyay itumpiy jém pixiñtam icuwiti jém attebet. Miñyay poyimi. Icutuumacayaj jém Pablo. Imatsyay. Ijicputyaj jém masticjom. Jicsciy injpajay jém mastic. ³¹ Iccaayajpa idic jém Pablo. Cuando acjodónata jém coronel iga tsam kujñayyay jém pixiñtam icuwiti jém Jerusalén, ³² jesic jeeti rato jém coronel intuumawat isoldado cada grupo con icapitán. Nicyaj poyimi hasta jut it jém

p̄ixiñtam. Cuando iixyaj iga núcyaj jém coronel con isoldado, jesic ichacyaj iga icótspa jém Pablo. ³³ Jesic jém coronel icunúc. Matsta jém Pablo. Ipiimíy jém isoldado iga ichéniñ con wisten cadena. Ocmi icwácpa, n̄mpa:

—¿Mich, mījapaap? ¿T̄i in̄watne?

³⁴ Pero jém p̄ixiñtam p̄imi j̄iyyajpa. Tum n̄mpa tum cosa y tun̄gac n̄mpa tun̄gac cosa. Jém coronel da w̄iap icutīȳy ti n̄myajpa porque tsam it bulla. Jesic ip̄imíy jém isoldado iga inin̄guiñ jém cuartel. ³⁵ Cuando núcyaj j̄ut químyajpa jém cuartel, jém soldado icópne inin̄cyaj jém Pablo porque agui imalwadayyajtooba jém p̄ixiñtam. ³⁶ Porque itump̄iy jém p̄ixiñtam jém miñyajp̄ap̄pic ituuñiānc̄im p̄imi j̄iyyajpa, n̄myajpa iga accaatañ jém Pablo.

Nacupujtap jém Pablo jém p̄ixiñtam iwiñjom

³⁷ Iganam cottap Pablo jém cuartel in̄imáy jém coronel:

—Mann̄imaytooba idic tum ām̄ati.

Jesic jém coronel in̄imáy:

—¿Que mich w̄iap in̄imat jém griegopic ām̄ati?

³⁸ ¿Jesic mich da je jém miEgiptopic mip̄ixiñ, jém dap̄icnam peca ictsucum tum rebelión, jém inin̄cnew̄ip jém t̄its̄inaxyucmi jém cuatro mil p̄ixiñtam, jém accaoyajpaap?

³⁹ Jesic Pablo in̄imáy:

—Ich ajudío. Anay jém attebet Tarso. Ich apertenece jém más mījpic attebet de jém naxyucmi de Cilicia. Māwágáypa tum favor. Ajígaayi iga anāmadáypa ȳip p̄ixiñtam.

⁴⁰ Ocmi jém coronel ijígáy iga inmadáypa jém pìxiñtam. Teñchucum jém Pablo jém escalerayucmi. Iwat seña con ici iga odoy ì jíyíñ. Jesic cuando dam ì jìypa, moj jìyi jém Pablo jém hebreopic anmatìmi. Iñímáy:

22

¹ —Mantìwìtam, minjagooyítam, amatónaayi iga anacupujtap.

² Cuando imatonjaj iga jìypa jém Pablo jém hebreopic anmatìmi, jesic mástim da jìyyaj. Iñímáy jém Pablo:

³ —Ich ajudío. Anay jém attebet Tarso jém naxyucmi de Cilicia. Amija yim Jerusalén. Ich accuyuj jém maestro Gamaliel. Ançuyujca jém wiñicpic tanañquímayooyi jém tachiiñewiip jém wiñicpic tanjatunwewetam. Tsam anwadáy caso iga ançuyoxap Dios con itumpiy ánana ma juutstim mimichtam inwattámpa yíp jama. ⁴ Ich pecam tsam anacpoy jém icupicneyajwiip yíp jomipic anquímayooyi hasta anaccaaba. Ammatspa pìxiñ y yomtam, ançotpa cárcel. ⁵ Jém cobacpic panij anjagooyi con itumpiy jém tanañjagooyiyaj tsíyyaj juuts testigo porque achiiyaj jém toto iga wiap amméts jém icupicneyajwiip yíp jomipic anquímayooyi. Anic jém attebet Damasco iga ammatspa jém pìxiñtam y anamiñpa preso Jerusalén iga chiitap castigo.

*Pablo inmatpa jutsa micupic Cristo
(Hch. 9:1-19; 26:12-18)*

6' Pero cuando aniqui tunjom, como cugapjama, anúctooba jém attebet Damasco, tsam pimi tsoopa tum justi sinyucmi. Acuyicquej jut aniqui. 7 Acutiñ naxyucmi. Amaton tum jiyi. Anímáy: “¿Saulo, Saulo, tiiga anacpoypa?” 8 Ocmi anacwác. Annímáy: “¿Mijapaap, mánomi?” Jesic anímáy: “Ich aJesús de Nazaret jém michpic síp incpoy.” 9 Jém ityajwip con aich iixyaj jém justi. Tsam pimi cinyaj. Imatonyaj jém jiyi, pero da icutiyyiyaj ti anímáy. 10 Jesic ich annímáy: “¿Mánomi, ti wip anwat?” Jém tánomi anímáy: “Tsucumi, nici Damasco, jemum miñimaytap itumpiy cosa titam ansunpa iga inwatpa.” 11 Como jém justi ichoca acáchtiwat, ajicteñyaj jém anwagananicpáppic hasta anúcta Damasco.

12 Jemum it idic tum pixiñ iniyi Ananías. Tum wibic pixiñ. Iwatpa itumpiy juuts nampa jém Moisés inquímayooyi. Itumpiy jém judíos, jém ityajwip Damasco, tsam iwixyajpa. 13 Jém Ananías miñ aám. Acunúc, anímáy: “Mantiw Saulo, amquimi.” Jesic anámquímáy, jeeti rato wiawum mu ánixíoy. 14 Jesic jém Ananías anímáy: “Jém tanjatun Dios jém icupicnewip jém wiñicpic tantúmmitam, micupin iga injodónaiñ ti ixunpa Dios iga inwatpa. Micupin iga inixpa jém Cristo, iga immatonpa ti miñimáypa. 15 Michiypa juuts testigo para je iga iniñmadáypa itumpiy jém pixiñtam icuwiti yip naxyucmi ti inixne y ti immatonne. 16 Sip odoy anjooci, tsucumi, chinj. Anwejpaati tanjatun Dios jém Cristo iniyimi iga miccáyáypa jém inñanca.”

Jém Pablo in̄mat jutsa micutsatta jém tungac p̄ixiñtaman̄jom

17 'Cuando aset Jerusalén atigiy jém mīpic masticjom iga anan̄wejpátpa Dios. Jemum anix tum poñ. 18 Anix jém tán̄mi. Anímáy: “Jicsciy puti yíp Jerusalén porque yípyaj p̄ixiñtam da iwadáypa caso iga in̄madáypa ich anan̄mati.”

19 Ocmi annímáy: “Mán̄mi, jeeyaj ijodonyaj iga jáy amméts jém p̄ixiñtam jém micupicnewīp cada sinagoga. Ammatsyajpa iga an̄cotpa cárcel. Tsam an̄cotsyaj. 20 Cuando accaata jém Esteban, jém in̄matpáppic mich in̄mati, ich as̄ibatim. Ich ait de acuerdo iga accaata. An̄wadáy cuenta jém iyootiyaj jém iccaaneyajw̄ip.” 21 Pero jém tán̄mi anímáy: “Nicsim. Man̄cutsatpa juumi iga in̄madáypa ich anan̄mati jém tungac p̄ixiñtam jém dapic je de Israel.”

Jém Pablo it jém coronel ic̄ijom

22 Cuando imatonyaj iga n̄impa jém Pablo iga in̄madáypa Dios in̄mati jém juumīpic p̄ixiñtam, p̄imi jóyñeyaj jém Israelpic p̄ixiñtam. Moj j̄iyiyaj p̄imi. N̄imyajpa:

—Accaataiñ yíp p̄ixiñ. Da w̄i iga tsíypa vivo.

23 Tsam p̄imi an̄weyjajpa. Itopyaj iyooti, ipatsquetyaj naxyucmi. Ipatsquímyajpa pótpót.

24 Jeeyucmi jém coronel ip̄imíy jém isoldado iga in̄inicyajiñ jém cuartel. Ip̄imíy iga cótstaiñ jém Pablo iga in̄madiñ tiiga iccujíñáy jém p̄ixiñtam y tiiga tsam j̄iyajpa jeeyaj acontra de jém Pablo.

25 Pero cuando tsenneta jém Pablo iga cótsta, iñímáy jém capitán jém itwïp jem:

—¿Que mich wïap inçóts tum Romapic pïxiñ jém dapic ì icïpiñe?

26 Cuando imaton jém capitán, nic iñímáy jém coronel:

—Cuidado iga immalwadáypa yíp pïxiñ porque Romapic.

27 Jesic miñ jém coronel, icwác jém Pablo:

—¿Que numa mich miRomapic mipïxiñ?

Nïmpa jém Pablo:

—Numa, ich ajeam.

28 Jém coronel iñímáy:

—Ich tsam jáyan tumiñ anyoj iga atsiy juuts aRomapic apïxiñ.

Jesic nïmpa jém Pablo:

—Pero ich aRomapic porque anay jém Roma iñaxyucmi.

29 Jesic jeeti rato jém icótsyajpáppic idic ichacyaj. Jém coronel tsam cïñpatim iga ichenne cuando ijodóna iga Romapic pïxiñ.

Anwejayta Pablo jém anjagooyiyaj iwiñjom, jém Sanhedrín

30 Jesic icuquejama jém coronel ijodónatooba tiiga jém judíos iquejajwadáypa jém Pablo. Iccáyáy jém cadena. Jesic in tuumawat itumpiy jém cobacpic panij con jém Sanhedrín. Jesic nanicta jém Pablo jém anjagooyiyaj iwiñjom.

23

¹ Jesic jém Pablo iámmats jém Sanhedrín, iñímáy:

—Mantiwitam, ich anjodon iga hasta siip anwatne juuts ixunpa Dios. Da ti ançinpa jém Dios iwiñjom.

² Jesic jém Ananías, jém cobacpic panij, ipimíy tum policia, jém itwip nocojom jut it jém Pablo, iga itojáyíñ ijip. ³ Jesic jém Pablo iñímáy jém panij:

—Dios micótspa mimich. Mich tsam minimigóyaytap. Jenum micoñ iga ançinpa juuts nimpa jém anquímayooyi, ¿jesic tiiga inwatpa acontra jém anquímayooyi iga ançóts?

⁴ Jesic jém ityajwip jem iñímáy jém Pablo:

—Oday malnímaayi jém cobacpic panij jém iccámnewip Dios.

⁵ Jém Pablo iñímáy:

—Mantiwitam, da anjodon siiga cobacpic panij. Nimpa jém Dios inmati jut jayñeta: “Oday malnímaayi jém ininjagooyi jém injacpáppic jém pixiñtam.”

⁶ Ocmi jém Pablo icutiíyíy iga wisten partido it jem jut antuumaneyaj. It jém fariseoyaj, ittim jém saduceoyaj. Jesic pimi jiypa iga imatonyajiñ. Nimpa:

—Mantiwitam, ich afariseopic apixiñ. Jém anjatun con anjatunwewe fariseopic pixiñ. Siip anquejajwadayta porque ancupicpa iga pispa jém caaneyajwip.

⁷ Cuando yaj nimi jém Pablo, moj añajiyaj jém fariseoyaj con jém saduceoyaj. Nawécayta jém pixiñtam jut antuumaneyaj. ⁸ Porque jém saduceoyaj nimyajpa iga da pispa jém caaneyajwip. Datim icupicyajpa iga it jém sinyucmi pixiñtam ni

jém espíritu, pero jém fariseoyaj icupicyajpa iga it itumpiy jexpic cosa. ⁹ Jesic tsam pimi jiyajpa itumpiy jém pixiñtam. Jesic teñchucum algunos jém accuyujoypaap de jém fariseopic anquímayooyi. Nimpa:

—Yíp pixiñ da ti mal iwatne. Wiip ijíyáy tum sinyucmipic pixiñ o tum espíritu. Da tanictámpa acontra de Dios.

¹⁰ Jesic tsam pimi áñayajpa. Jém coronel cñpa iga ichichañsajyajpa jém Pablo. Jeeyucmi ipimíy jém isoldado iga itopyajpa pimimi jém Pablo jém pixiñtam icijom y iga ininiguíñ eybic jém cuartel.

¹¹ Jeetim tsuu jém tánomi iwiñquejáy jém Pablo jém cuartel. Inímáy:

—MiPablo, camamwati inñanama. Juuts ininmat ich anañmati yíp Jerusalén tienes que ininmatpatim jém atebet Roma.

Ijisyajpa jutsap iccaayaj jém Pablo

¹² Jesic icuquejama algunos jém judíos iwatyajpa de acuerdo iga iccaayajpa jém Pablo. Nimyajpa iga: “Da tawícpa ni da tanícpa hasta que tanaccaaba jém Pablo.” ¹³ Ityaj más de cuarenta pixiñtam jém nimneyajwiip jempic. ¹⁴ Ocmi nic íamyaj jém panij anjagooyi con jém wídaytam de Israel. Inímayyaj:

—Aichtam animneta iga siip da awícpa ni da anícpa hasta anaccaaba jém Pablo. ¹⁵ Siip mimichtam con jém Sanhedrín wágaytaami jém coronel iga joymi inimíñiñ michtam inwiñjom. Nimanñtaayaji iga chocoymi inçipinpa. Jesic

aichtam aittámpa listo iga ananteñtámpa tunjom antes que núcpa jut miifta.

¹⁶ Pero jém Pablo iyomtíwí imaníc ijodóna iga anteñtap tunjom. Jesic nic inmadáy iachi jém cuartel. ¹⁷ Ocmí jém Pablo inwejáy jém capitán jém iwatnewip cuenta. Iñímáy:

—Nanici yíp jaychixi jut it jém coronel. Iniit tum aḡmati iga iñímáypa.

¹⁸ Jesic jém capitán ininíc jém jaychixi jut it jém coronel, iñímáy:

—Jém preso, jém Pablo, aḡwejáy. Iwác iga manamíñayiñ yíp jaychixi. Iniit tum aḡmati iga miñímáypa.

¹⁹ Jesic jém coronel imatsáy ici jém jaychixi. Ininíc aparte. Iñímáy:

—¿Ti annímaytooba?

²⁰ Jém jaychixi iñímáy:

—Jém judíos ityaj de acuerdo iga joymi miwágayyajpa iga ininíguiñ jém Pablo jém Israelpic anjagooyi iwiñjom. Nímanḡaayap iga icipinpa chocoyi. ²¹ Pero odoy cupici porque más de cuarenta jém pixiñtam inḡeñyajpa tunjom. Iwatyaj acuerdo iga da wícpa ni da nícpa hasta iccaaba jém Pablo. Siḡ ityajum listo. Injócneyaj iga inḡcutsonpa.

²² Ocmí jém coronel inquím jém jaychixi, iñímáy:

—Odoy i aḡmadaayi juuts annímayñe.

Cutsattá jém Pablo jém gobernadorcñm

²³ Jém coronel inwejáy wisten jém icapitán. Ipiimíy iga nawítsacyajtaiñ dosciento soldado jém nicyajpápic puymi y setenta jém

nicyajpáppic cawajyucmi y dosciento soldado jém ininicyajpáppic jém lanza. Inímáy iga nicyajiñ jém atebet Cesarea tsuucim a las nueve. ²⁴ Ipimíy iga imétsayyajiñ cawaj iga icquímcaaba jém Pablo y iga iwíwadiñ cuenta hasta que núcpa jut it jém gobernador Félix. ²⁵ Jém coronel ijay tum toto, icutsadáy jém gobernador Félix con jém isoldado. Nimpa jém toto:

²⁶ “Ich aClaudio Lisias. MiFélix, tsam wibic migobernador. Sip mandioschiiba. ²⁷ Jém judíos imatsne idic yíp pxiñ. Iccaatooba idic. Ancupuj con jém ansoldado. Cuando anjodóna iga Romapic pxiñ, ²⁸ anjodónatooba tiiga iquejajwadayyajpa, jesic ananic jut antuumaneyaj jém Israelpic anjagooyiyaj. ²⁹ Ampát tiiga iquejajwadayyaj. Iwat algo en contra jém Israelpic anquímayooyi. Pero da inii itánca iga iccaayajpa ni datim wí iga ipajyajpa. ³⁰ Anjodóna iga jém judíos ijisyajpa iga iccaayajpa. Jeeyucmi mancutsadáypa yíp pxiñ. Ampimíy tim jém iquejajwadayñewiip iga nicyajiñ mich inwiñjom. Jesánam manjáyáy.”

³¹ Jesic jém soldado iwatyaj juuts ipimíy jém coronel. Tsuucim ininicyaj jém Pablo hasta jém atebet Antípatris. ³² Jesic icuquejama jém soldado, jém nicneyajwip puymi, setyay eybic jém icuartel. Jém tungac soldado, jém nicneyajwip cawajyucmi, seguido iwagananicyajpa jém Pablo. ³³ Cuando núcyaj jém atebet Cesarea, ichiñcodáy jém toto jém gobernador ichiñjom. Ininicyaj jém Pablo jém gobernador iwiñjom. ³⁴ Cuando yaj imay jém toto jém gobernador, icwác jém Pablo iga jutpic pxiñ.

Cuando ijodóna iga nay jém naxyucmi de Cilicia,
³⁵ jesic iñímáy:

—Mammatónáypa jém iñasunto cuando miñpa
 jém miqejajwadayñewip.

Jesic jém gobernador ipimíy iga nanictaiñ jém
 palacio de Herodes iga wattaiñ cuenta.

24

Nacupujta Pablo jém gobernador Félix iwiñjom

¹ Ocmi cuando nasne cinco día, núcyaj Cesarea
 jém cobacpic panij jém Ananías con algunos jém
 Israelpic anjagooyiyaj. Inimiñyajtım tum abogado
 iñiyi Tértulo. Miñ iquejajwadayyaj jém Pablo
 jém gobernador iwiñjom. ² Cuando namiñta jém
 Pablo, jesic jém Tértulo moj iquejajwadáy. Nímayta
 jém gobernador:

—Iyucupdios, migobernador, iga tsam tawıfta.
 Da i jém pleito. Tsam wiap ininjac yıp naxyucmi
 porque tsam mijixíy. ³ Icuwıti yıp naxyucmi
 anjodontam iga mich tsam anjıwadayta.
⁴ Pero iga odoy manactogóyayıñ jáyan tiempo,
 mancunucsáypa iga amatónaayi tum rato ti
 mannímáypa. ⁵ Yıp pıxiñ tsam pımi malo, jut
 quej ictsucum iga iccujíñáypa jém judíos iga
 nawécaytap. Yıp pıxiñ jém cobacpic jém grupo
 nazareno. ⁶ Ininictooba idic jém tungac pıxiñ
 jém tãncaywıip jém mijpic masticjom. Jeeyucmi
 ammatsta. Ançıpinctooba idic con aichtampic
 anañquímayooyi. ⁷ Pero jém coronel Lisias
 tigıy con isoldado, pımimi itop. ⁸ Iñímáy jém
 iquejajwadayñewip iga nıcyajıñ iquejajwadáy

mich inwiñjom. Siip mich mismo wiap inçipin iga inñodónjain numa tiiga anquejajwadayñeta.

⁹ Jém judíos, jém miññeyajwiiip jém gobernadorciim, nımyajtim iga numa. ¹⁰ Ocmi jém gobernador iwadáy seña jém Pablo iga jíyiñ. Jesic nımpa Pablo:

—Ich amaymay iga wiap ancutson jém aquejajwadayñewiip mich inwiñjom. Anjodon iga jáyan amtıy michıy iga minjagooyi yıp naxyucmi. ¹¹ Siiga inicwácpa yıp pixiñtam, jeam minmadáypa iga apenas doce día anúcne Jerusalén iga anañwejpátpa Dios. ¹² Da apát juť sıp anañá jém pixiñtam, ni datim apát iga sıp ançujíñáy jém ityajwiiip jém miipic masticjom, ni tum sinagoga, ni tungac parte de jém atebet. ¹³ Yıpyaj da wiap awiñpacchi juuts nımyaj iga ich anwatne. ¹⁴ Pero ich manañmadáypa iga numa ançuyoxap jeetim Dios jém ijsneyajwiiip jém wiñicpic anjatunwewetam. Ich aít de acuerdo con jém jomipic anquımayooyi, pero jeeyaj nımyajpa iga migooyi. Ich ançupicpa itumpıy jém ijaychacnewiip jém wiñicpic anmatciwiñ y jém Moisés inquımayooyi. ¹⁵ Ich ananjócpatim juuts jeeyaj iga Dios icpıspa jém caaneyajwiiip, jém wıtampic y jém malopic. ¹⁶ Jeeyucmi siempre anwadáypa caso iga anwiwatpa. Jesic da ti ançınpa jém tanjatun Dios iwiñjom ni jém pixiñtam iwiñjom.

¹⁷ 'Cuando tsam wiñigam anicne, jesic aset eybic anticmi iga anyoxpátpa jém antiwitam jém yaachayajpáppic y iga antsacpatim tum

ofrenda. ¹⁸ Iganam síp anwat jempic, algunos jém judíos, jém miññeyajwíp de Asia, apát jém mijpic masticjom. Anwatne jém costumbre iga acuáyíñ. Da anamiñ jáyan pxiñtam ni da i jém bulla. ¹⁹ Más wí meega miñ aquejajwadáy jém Asiapic judíos siiga iniit algo encontra para ich. ²⁰ Wítim meega yípyaj pxiñtam, jém miññeyajwíp yim, miñmadáypa mimich ti mal anwatne, siiga apádáy antañca cuando acipin jém panij anjagooyi iwiñjom. ²¹ Da ti anwat no más pimi ajy cuando aít jém anjagooyi iwiñjom, annímáy: “Sip acipinap porque ancupicpa iga pspa jém caaneyajwíp.”

²² Jém Félix iwicutiíyí jém jomipic anquímayooyi. Cuando yaj imaton ti nimpa jém Pablo, jém Félix ipoychac jém asunto; da icipin. Nimpa:

—Cuando miñpa jém coronel Lisias iga acjodónap ti inwatne, jesic yajpa anwitsac jém asunto.

²³ Ocmi jém gobernador Félix ipimíy jém capitán iga seguido iwatpa cuenta jém Pablo jém palacio. Pero ijícpa iga tigiypa jém iamigoyaj iga miñpa iám y ichiiba iwiccuy titam itogóyáy.

²⁴ Jesic tungac jama más, miñgacum eybic jém gobernador Félix con iwichomo Drusila, tum Israelpic yomo. Inwejay jém Pablo iga inmadáyíñ jutsap micupic jém Jesucristo. ²⁵ Pero Pablo inmadáy iga Dios ixunpa iga tanwíwadiñ, ixunpatim iga tum pxiñ nanjactap iyaac iga odoy imalwadiñ. Inmadáytim iga núcpa jama iga Dios icipinpa itumpiy jém pxiñtam. Jesic cuando imaton, jém Félix tsam pimi cñ. Inímáy jém Pablo:

—Siip poyñicsim. Cuando anaitpa lugar manañwejáypa eybic.

²⁶ Ijispatim jém Félix iga jém Pablo ichiiba tumiñ iga cutsigaytaiñ. Jeeyucmi watciy inwejáypa iga anmatpa con je. ²⁷ Wisna amtíy iñasca así jém Pablo. Ocmi jém Félix putum de gobernador. Jém Porcio Festo jeegagam tsíy iga gobernador. Pero jém Félix, como ixunpa iga iwixiñ jém judíos, da itop jém Pablo.

25

Anwejayta Pablo jém gobernador Festo iwiñjom

¹ Yaguiñ núc jém naxyucmi jém gobernador Festo. Nas tucunajama, put jém attebet Cesarea, nic Jerusalén. ² Jém panij anjagooyiyaj con jém anjagooyiyaj de jém judíos, nic iámyaj jém gobernador. Iquejajwadáypa jém Pablo. ³ Iwágayyaj tum favor jém gobernador. Nimyaj:

—Mançunucsáypa, ayoxpaati, cutsati jém Pablo Jerusalén.

Nimyaj jempic porque ijisyajpa iga inñeyajpa tunjom iga iccaaba.

⁴ Pero jém gobernador Festo icutson. Nimpa:

—Jém Pablo tsíy preso Cesarea. Ich anyaac da jáyñe anicpa jemic. ⁵ Jeeyucmi mannímáypa, wi siiga algunos de mimichtam minjagooyítam tawaganictámpa Cesarea. Siiga jém pixiñ iwat algun tájca, jesic jemigam wiap inquejajwadáy.

⁶ Jesic jém Festo cuando iyaj ocho o diez día Jerusalén, set eybic Cesarea. Icuquejama nicum coñi jém oficina jut cipiñóypa. Ipiimíy jém soldado iga inimíñiñ jém Pablo. ⁷ Cuando jém

Pablo tigiy jém oficina, icunúcyaj jém judíos, jém miññeyajwiiip de Jerusalén. Moj iquejajwadayyaj iga tsam miytampic táŋca iwatne. Pero da i wiap miwiñpacchi. ⁸ Jesic nacupujtap jém Pablo. Nimpa:

—Ich da ti mal aŋwatne contra jém judíos inquímayooyi, ni contra jém miypic mastic, ni contra jém Romapic anjagooyi.

⁹ Jém gobernador Festo ixunpa iga iwixyajiñ jém judíos, jeeyucmi icwác jém Pablo, nímayta:

—¿Que iñxunpa iga maŋcutsatpa Jerusalén iga jemigam micipinñaiñ?

¹⁰ Pablo icutson, iñímáy:

—Ich aít yim juť ciiipinóypa jém gobernador. Yip oficina jém Romapic anjagooyi imichi. Yim tienes que aciiipinñap. Mich inwiijodon iga da ammalwadayñe jém judíos. ¹¹ Siiga tsam pimi ammalwatne, wi iga ampictsonpa jém castigo iga accaatap. Pero siiga da quejpa jém antánca juuts jeeyaj aquejajwadayñe, jesic da i wiap aciijunot jém Israelpic pixiñtam icijom. Aŋwácpa iga jém Romapic anjagooyi iyaac aciiipinñiñ.

¹² Cuando yaj aŋmatiyaj con jém ichiipáppic jixi jém gobernador Festo, iñímáy jém Pablo:

—Inwác iga micipinñiñ jém Romapic anjagooyi, siip jemigam miñicpa.

Aŋwejayta jém Pablo jém rey Agripa iwiñjom

¹³ Cuando da watña jama nasne, núc Cesarea jém rey Agripa con iyomo Berenice. Miñ idioschi jém gobernador Festo. ¹⁴ Ityaj Cesarea watña jama. Jesic jém Festo inmadáy jém rey ti iñasca jém Pablo. Iñímáy:

—Yim it tum p̄ixiñ ichac preso jem Félix cuando put de gobernador. ¹⁵ Cuando aoy Jerusalén jem panij anjagooyiyaj con jem iwidaytam de jem judíos, anmadayyaj ti iwatne yíp p̄ixiñ. Awágáy iga anchiiñ castigo. ¹⁶ Ich ancutsoñ iga taichtam jem taRomapic, da tanaïta jem costumbre iga tanchiiba castigo tum p̄ixiñ siiga da wiñti iwiñpacchiiba jem iquejajwadayñewiip iga wiap inicupujta iyaac. ¹⁷ Jeeyucmi cuando núcyaj yim jem Israelpic anjagooyiyaj, da jáypa ançipin. Icuquejama acoñ jut acipinóypa, anañwejáy jem p̄ixiñ. ¹⁸ Pero cuando núc yim jem iquejajwadaypáppic, da iniquímyaj quejaj iga imalwatne juuts ich anj̄ispa idic. ¹⁹ No más tsam jóyñe iga inimiñ tum jomipic anquímayooyi y iga inmatpa de tum p̄ixiñ iñiyi Jesús. Accaata, pero siip nimpa jem Pablo iga pisneum. ²⁰ Ich da ancutiyyíy ti anwatpa con yicxp̄ic asunto. Jesic anacwác jem Pablo siiga iwianjam iga ancutsatpa Jerusalén iga jemigam w̄itsactaiñ. ²¹ Pero como je iwác iga çipintaiñ jem Romapic anjagooyicim, jem Augusto, ich ampimíy iga tsíyiñ preso hasta wiap ancutsat jem Romapic anjagooyicim.

²² Jesic jem Agripa iñimáy jem gobernador Festo:

—Ich agui ammaton̄tooba ti nimpa yíp p̄ixiñ.

Jem Festo iñimáy:

—Joymi immaton̄pa.

²³ Icuquejama jem rey Agripa con iwichomo Berenice núcyaj jem palacio. Agui w̄i cuyajneyaj. Iwaganamiñyaj jem soldado injagooyiyaj con jem más mijpic anjagooyiyaj de jem attebet Cesarea. Jem

governador Festo ipimáy isoldado iga inimíñiñ jém Pablo. ²⁴ Jesic moj jiyi jém Festo. Nimpa:

—Mirey Agripa, con iñtumpiytam miitwip yim. Yíbam jém pxiñ. Tsam jáyan jém judíos iquejajwadayñe contra je. Iquejajwadáy Jerusalén y iquejajwadáytim yim Cesarea. Da ichacpa iga nimyajpa iga accaatañ. ²⁵ Ich animpa iga da ti iwatne iga iccaayajpa. Pero iyaac iwác iga icipíñiñ jém Romapic anjagooyi jém Augusto. Jeeyucmi anjis iga ancutsatpa jemíc. ²⁶ Pero como da ampádáy itánca iga anjáyáypa jém tananjagooyi jém Romapic, jeeyucmi anamiñ mich inwiñjom, mirey Agripa, iga inçipíñiñ. Jesic siiga quejpa ti mal iwatne, wíap anjáyáy jém tananjagooyi jém itwip Roma. ²⁷ Ich animpa iga da wíap ancutsat tum preso jém tananjagooyicim siiga da anjáyáypa tiiga quejajwadayñeta.

26

Jém Pablo inmatpa ti iwatne jém rey Agripa iwiñjom

¹ Ocmi jém rey Agripa iñimáy jém Pablo:

—Wíap annimáy iñyaac ti inwatne.

Jesic jém Pablo icquím ici, moj inmat así:

² —Mirey Agripa, agui amaymay iga wíap ananmat mich inwiñjom iga anacupujtap juuts aquejajwadayñe jém judíos. ³ Ich agui amaymay porque mich inwixpicpa itumpiy jém judíos icostumbre. Injodonjim jutsap inacayaj jém inquímayoooyi. Jeeyucmi manwágáypa iga amatónaayi chocoymi.

Pablo inmatpa ti iwat antes que icupicpa Cristo

⁴ Itumpiy jém judíos ijodonyaj juuts jáy anwat dende atsixiñam jém naxyucmi jut anay y jém Jerusalén. ⁵ Jeeyaj iwijodonyaj y wiap inmat siiga iwianjamyaj iga ich ançuyujca jém fariseopic anquímayooyi jém más tãncapic tanwat de itumpiy jém anquímayooyiyaj. ⁶ Yim sip aciipintap porque ananjócpa iga Dios icpispa jém caaneyajwip juuts ijycámáy jém wiñicpic anjatunwewetam. ⁷ Itumpiy jém Israelpic pixiñtam, jém doce tribu, injócyajpatim jém promesa. Jeeyucmi anjstámpa Dios y ançuyoxatámpa tsuucim y siññi. Sip, manrey Agripa, jém Israelpic pixiñtam aquejajwadayne porque ananjócpa jeetim promesa. ⁸ ¿Tiiga inñispa iga Dios da wiap icpis jém caaneyajwip?

Pablo pecam icpoypa idic jém icupicneyajwip Cristo

⁹ Pecam ich anyaac anjispatic iga ammalwadáypa jém pixiñtam jém itunypáppic jém Jesús de Nazaret. ¹⁰ Jempigam anwat Jerusalén con jém toto jém achiiñewip jém panij anjagooyiyaj. Ampaj tsam jáyan jém icupicneyajwip jém Cristo, jesic miccaayajta jeeyaj, ich aít de acuerdo. ¹¹ Wati veces anchi castigo iga ichaguiñ iga icupicpa jém Cristo. Jempam anwat itumpiy jém sinagoga. Tsam pimi anjójixpa idic. Tsam ammalwadáy, anacpóyiy juumi hasta jém tungac naxyucmi.

*Pablo inmatpa eybic jutsa micupic Cristo
(Hch. 9:1-19; 22:6-16)*

12 'Jeeyucmi anic jém attebet Damasco. Jém panij anjagooyiyaj acutsat con tum toto. 13 Pero cuando aniqui tunjom, mirey Agripa, como cugapjama ánix tum jucti sñyucmi. Más pimi tsocpa que jém jama. Actsíy jém ichoca con jém anwagananicpáppic.

14 'Jesic antumpiytam acutiñta naxyucmi. Jesic ammaton tum jiyi, anímayta jém hebreo anmañimi: “¿Saulo, Saulo, tiiga ammalwadáypa? Iñyaac siip minimalwadaytap; juuts iwatpa jém buey cuando iñeppa jém ichenóycuy inquiñi, iñyaac miniccoowatap.” 15 Ocmi ich annímáy: “¿Mijapaap, mánomi?” Jesic anímáy: “Ich aJesús jém síppáppic ammalwadáy. 16 Tsucumi. Manwiñquejáy iga mancupin iga ancujoxpap. Michíyapa juuts testigo iga ininmatpa ti íñix siip y ti íñixpa ocmi. 17 Manyoxpátpa iga odoy mimalwadayyajiñ jém Israelpic pixiñtam y jém tungac pixiñtam jém dapic je de Israel. Siip mancutsatpa iga nicpa ininmadáy ich anañmañi jém tungac pixiñtam jém dapic je de Israel. 18 Mancutsatpa iga inictojáypa iixcuy iga odom más wityajiñ piichcim, pero wityajiñ juctianťsočajom. Mancutsatpatim iga inictsacpa jém tungac pixiñtam jém Wocciwiñ ipimi iga ipictsoñiñ jém Dios ipimi. Ininmadáypa ich anañmañi iga acupiguiñ aich, jesic wadaytap perdón jém itañca. Jesic Dios imanigayajpa con los demás jém cuáyñewiip ianama.”

Pablo iwatpa juuts iñímáy Jesucristo

19 'Jeeyucmi, mirey Agripa, anwatpa juuts anímáy cuando Dios anquejáy jém poñ. 20 Wiñti oy anañmadáy jém anmati jém ityajw̄ip jém attebet Damasco, ocmi anic Jerusalén y icuw̄iti jém naxyucmi de Judea. Ocmi anic jut it jém tungac pixiñtam jém dapic je de Israel. Anímáy iga icucaguiñ ijixi y iga ichaguiñ iga imalwatpa y moypa iw̄iwat iga quejiñ iga cucacneum ijixi. 21 Jeam anañnúc. Jeeyucmi amats jém judíos jém mijpic masticjom. Iwatyaj tum trato entre jeeyaj iga accaayajpa. 22 Pero Dios tsam ayoxpát. Hasta siip da antsacne iga anañmatpa Dios inmati. Anañmadáypa cualquier pixiñtam jém mijpic anjagooyi y jém dapic cargojáy. Ich anañmatpa no más juuts nimpa jém wiñcpic anmatciwiñ y jém Moisés cuando inmatyajpa ti miñpa. 23 Jeeyaj nımyaj iga yaachwattap jém Cristo y ocmi accaatap. Je jém wiñtipic icpispáppic Dios de jut it jém caaneyajw̄ip. Chiitap jém Israelpic pixiñtam jém wibic jixi iga icutiyyiyajiñ. Chiitaptim jém tungac pixiñtam, jém dapic je de Israel.

Por uxañ jém rey Agripa icupicpatim Cristo

24 Iganam nacupujtap jém Pablo, tsam pimi jiy jém gobernador Festo. Nimpa:

—¡Mich, miPablo, tsam miloco! Iga tsam pimi micuyujne milocojane.

25 Pero Pablo icutson. Inímáy:

—Miwibic miFesto da alocojane. Síp manañmadáy jém numapic anmati jém jixiyyw̄ip.

26 Yim it jém rey Agripa. Je tsam iw̄icutiyyıypa

itumpiy yípyaj cosa. Jeeyucmi manwianmadáypa, da acinpa. Ich animpa iga iwijodon itumpiy yíp jomipic anquímayooyi porque da yamwatneta jut da i iixpa. ²⁷ Mírey Agripa, ¿que incupicpa juuts nimpa jém wiñcpic anmatcwiñ? Ich animpa iga incupicpa.

²⁸ Jesic jém Agripa iñímáy Pablo:

—Por uxañ anaccupicpa Cristo.

²⁹ Ocmi Pablo iñímáy:

—Por uxañ o por jáyañ, ich tsam ansunpa iga incupicpa. Da solamente mimich, pero itumpiy jém siipic amatonneyaj. Tsam anwianjam iga michiytampa juuts aich, pero sin cadena.

³⁰ Cuando yaj nimi jém Pablo, teñchucumyaj jut coñyaj jém rey, jém gobernador y jém Berenice con itumpiy jém iwaganaitwip. ³¹ Jesic putyaj jém anjagooyiyaj, nicyaj aparte. Moj nanímayyajtaji entre jeeyaj:

—Yíp pxiñ da ti iwatne iga accaatap ni iga pajtap cárcel.

³² Jém Agripa iñímáy jém Festo:

—Wiap tañcutsigáy idic yíp pxiñ meega da iwác iga icipíñiñ jém Romapic anjagooyi.

27

Nanicta Pablo Roma

¹ Jesic icunúcyaj jixi iga acutsattamtap jém naxyucmi de Italia. Jém Pablo con jém tungac presoyaj cñjuncotta tum capitán icñjom. Iñiyi Julio. Jém batallón iñiyi Augusto. ² Atigiyta tum barcojom. Tsucum jém barco Adramitio.

Naspa jém attebetyaj lamar aññaca jém naxyucmi de Asia. Awaganictámpa con jém Aristarco. Je tsucumne jém attebet Tesalónica jém naxyucmi de Macedonia. ³ Icuquejama anúcta jém attebet Sidón, lamar aññaca. Jém capitán Julio tsam iyaachanjám jém Pablo. Ijígáypa iga nicpa iám jém iamigoyaj. Ijígáypatim iga iyoxpátpa y iga ichiiba titam itogóyáy.

⁴ Atsucumta jém attebet Sidón. Anasta jém isla de Chipre jém aññaymipic lado porque tsam pimi jém sawa. ⁵ Anjacta jém lamar jém naxyucmi Cilicia y Panfilia iñuma. Anúcta jém attebet Mira jém naxyucmi de Licia.

⁶ Jemic jém capitán Julio ipát tum barco jém tsucumnewip jém attebet Alejandría. Nicpa jém naxyucmi de Italia. Jém capitán acotta barcojom.

⁷ Watña jama anictámpa chocoymi. Tsam táncaá mu annúcta jém attebet Gnido iñuma. Como tsam pimi jém sawa, da tacnas jem. Jeeyucmi aquetta hasta jém isla de Creta. Anúcta jém punto de Salmón iñuma. Anasta noco jém isla de Creta.

⁸ Tsam táncaap iñic jém barco. Witpa lamaraññaca. Ocmi anúcta tum lugar iñiyi jém Wibic Puerto, nocojom jém attebet Lasea.

⁹ Tsam jáyan tiempo anactogoyta. Siip tsam it peligro iga anictámpa barcojom porque nasne jém sij de ayuno. Núcne jém tiempo cuando tsam poypa jém sawa. Jeeyucmi Pablo ichi jixi jém pixiñtam. ¹⁰ Iñímáy:

—Mipixiñtam, ánixpa iga siip tsam it peligro iga tanicpa barcojom. Wiap itogoy jém barco con itumpiy jém carga hasta togoypatim jém tamvida.

11 Pero jém capitán da imaton ti iñímáy jém Pablo. Más icupicpa jém barco iomi y jém icwitpáppic jém barco. 12 Casi itumpiy jém ityajwip jém barcojom agui nictooba porque da wicom jém puerto jut aitta iga annascatámpa jém tiempo de pagac cuando tsam poypa jém sawa. Nicyajtooba jém atebet Fenice, tungac puerto, jeetim isla de Creta. Íñámmocne anjamtigiyimi. Jemum wiap annascata jém tiempo de succuc.

Tsam it mal tiempo jém lamar

13 Jesic moj poyi jém tsapsawa, ijisyajpa iga wicoomap, wiap iñicyaj. Tsucum jém barco, moj niqúi jém lamar anñaca jém isla de Creta. 14 Pero da jáy mactsiyta tum sawa tsam pimi. Juuts tum ciclón. Jemic iccámayyaj iñiyi jém eu-raquilón. 15 Moj ininic jém barco. Como da wiap anánámmoc jém sawa, jesic jém icwitpáppic jém barco ijicpa iga ininicpa. 16 Anasta tum xutu isla iweñtan, iñiyi jém isla Clauda. Jem da pimi núcpa jém sawa. Tsam tánca maampiñta jém lancha jém ijicnewip jém barco. 17 Cuando yaj ipiñyaj jém lancha, moj ichenyaj jém barco con mijpic tipxi iga odoy sámíñ. Tsam cñneyaj. Wip tsíypa jém pooycim jém lugar iñiyi Sirte. Jesic icquedayyaj ivela. Ijigayyaj iga ininigiñ jém sawa. 18 Icuquejama como tsam pimi poypa jém sawa, jém pixiñtam moj ipatspatsayyaj lamar jém barco ichimi. 19 Jesic núcum tucunajama, aichtam anyaac ampatsáyayta jém barco itñcuy con jém itraste. 20 Watña jama it jém mal tiempo, da aguixta jém jama ni jém mat̄sa. Como tsam pimi

actsíy jém sawa, anjístámpa antumpiytam iga acucaaytámpa.

²¹ Tsam jáyan jama da awícta. Jesic jém Pablo teñchucum jém pixiñtámanjom. Iñímáy:

—Mantiwitam, meega inwadáy caso ti mannímáy y da tatsucum jém isla de Creta jut tait idic, jesic da idic tannascaaba yíp mijpic yaachaji con yíp togoyi.

²² 'Pero siip camamwattaami iñanama. Porque ni tum de mimichtam da micaatámpa aunque yíp barco togoypa. ²³ Tsúmic awiñquejáy tum siñyucmipic pixiñ jém icutsatnewiip Dios, jém ichpic anjacpa y ancuyoxap. ²⁴ Jém siñyucmipic pixiñ anímáy: “MiPablo, odoy cñi porque tienes que mininúctap jém Romapic anjagooyicim. Mich inçuyucmi Dios iciacputyajpa itumpiy jém pixiñtam jém inwagananicpaap jém barcojom iga odoy caaya-jiñ.” ²⁵ Jeeyucmi mannímáypa mimichtam iga odoy cñtaami. Porque ich ancupicpa iga Dios wiap tayoxpát. Ich anjodon iga numa tannascaaba juuts anímáy jém siñyucmipic pixiñ. ²⁶ Pero tienes que tananicpa jém barco hasta tananúcpa tum isla.

²⁷ Cuando nasne dos semana iga aniquitam, jém sawa ananicta jém lamar iñiyi Adria. Jesic como cugapsu jém icwityajpáppic jém barco ijamyajpa iga núctooba naxyucmi. ²⁸ Iquípsyaj jém lamar jutspiy ijojmi. Iniit treinta y seis metro. Cuando wityaj uxan más juumi, eybic iquípsyaj, iniit veintisiete metro. ²⁹ Tsam icñyaypa iga núcpa jém tsaayucmi, jesic icquedayyaj cuatro iancla jém barco itutscim iga ichenyajpa. Tsam anyácneyaj,

síp injócyaj iga cuquejiñ. ³⁰ Algunos jém marinero agui quettooba jém barcojom iga poypa. Moj icquet jém lancha, níman̄taayap iga icquedáypa jém iancla jém icobacc̄mpic. ³¹ Pero jém Pablo inmadáy jém capitán y jém isoldado:

—Siiga yíp p̄ixiñtam da tsíypa barcojom, michtam micucaaytámpa iñtumpiytam.

³² Ocm̄i jém soldado it̄ncujagáy jém lancha it̄pxi jut cutsenneta jém barcoyucm̄i iga cut̄ñiñ n̄ic̄im.

³³ Icuquejama jém Pablo iñímáy itumpiy jém p̄ixiñtam iga wícyajiñ. Iñímáy:

—Iniitum dos semana da miwíc̄neta. ³⁴ Jeeyucm̄i man̄cunucsáypa iga miwíctámpa uxan̄ iga imp̄ictson̄pa imp̄imi porque ni tum de mimichtam da mitogoypa, da togoypa ni tum jém inway jém itw̄ip in̄cobacyucm̄i.

³⁵ Cuando yaj n̄imi jém Pablo, imatspacne tum caxtánañi ic̄ijom. In̄wejpát Dios jém p̄ixiñtam iwiñjom. Ocm̄i iwenjac jém caxtánañi, moj wiiqui.

³⁶ Jesic itumpiy jém p̄ixiñtam icamamwat ianama. Mojum wiiquiyaj mex jeeyaj. ³⁷ Aitta jém barcojom adosciento setenta y seis. ³⁸ Cuando yaj wiiquiyaj, moj ipatspatsayyaj lamar jém trigo iga más xejc̄iyajiñ jém barco.

Po jém barco

³⁹ Icuquejama jém icwitpáppic jém barco da ijodon̄yay júp naxyucm̄i ityay. Iixyay tum lugar jut w̄icom jut w̄itijom jém pooyán̄nc̄i. Ij̄ispa si-iga w̄iap inin̄ic jém barco jem. ⁴⁰ It̄ncujacyaj jém t̄pxi jut tsenne idic jém ancla, ichacyaj lamar. Iwijáy jém timón it̄pxi. Icqúim jém vela, jém

icobaccimpic, iga icwídiñ jém sawa. Jém barco
 moj puti jém lamar aññaca. ⁴¹ Núc jut it jém cor-
 riente, tsíy jém barco icobac pooycim, wí cáme,
 da tsigóypa. Jém ituts moj iccujagáy jém lamar poa.
⁴² Jesic jém soldado ijisyajpa iga iccaayajpa jém
 preso iga odoy púnanjacyajiñ iga poypa. ⁴³ Pero
 jém capitán iciacputtooba jém Pablo. Da ijígáy
 jém soldado iga iccaayajpa jém preso. Ipiimíy jém
 wiapaap iñijén iga tigíyiñ lamar iga putpa añsicmi.
⁴⁴ Iñímáy jém dapic wíap iñijén iga ipiguiñ tabla
 o tum jaca jém barco icuy iga iyoxpátpa. Asíam
 cupudayyaj itumpíyyaj añsicmi.

28

Núc jém Pablo jém isla de Malta

¹ Cuando aciputtámum antumpíytam,
 anjodónata iga jém isla iñiyi Malta. ² Jém jemícpic
 pixiñtam tsam awixta. Icnúcyaj jucti porque
 tsam succuc, tsam chijóypa tuj. Anímayta iga:
 “Míñi mixami.” ³ Ocmi jém Pablo ipiñ uxañ cipi
 titsnewip. Iganam icotpa juctjom, put tum tsañ,
 ipóyáy jém jucti ipiji. Tñnecám jém Pablo iciyucmi.
⁴ Cuando jém ityajwip jem iixyay iga tñnecám jém
 tsañ iciyucmi, nanímayyajta:

—Yíp pixiñ tum accaoypaap. Aunque cñput jém
 lamar, Dios da iwianjam iga tsíypa vivo.

⁵ Pero Pablo icuxicsáy jém tsañ juctjom. Da ti
 iñasca. ⁶ Jesic jeeyaj agui injócyaj siiga xiñpa jém ici
 o jeeti rato caaba. Pero ocmi cuando tsam injócyaj,
 iix iga da ti iñasca. Jesic icacyaj ijixi. Moj nímíyaj:

—Yíp p̄ixiñ tum dios.

⁷ Jém anjagooyi iñiyi Publio. Injacpa jém isla. Noco it jém iñas. Tsam aw̄ip̄ictson̄ta. Achiita jūt amon̄ta juuts aamigotam. Jemum ats̄iyta tucunajama. ⁸ Mimne idic jém Publio ijatun̄. Imatsne jém jawan̄ y jém nīpiñtiñ. Tiḡiy jém Pablo jūt wone. Inwejpádáy Dios para je, ichigáy icobac, icpis. ⁹ Cuando iixyaj ti iwat jém Pablo, jesic miñyajt̄im itump̄iy jém mimneyajw̄ip̄ icuw̄iti jém isla. Acpīsyajtat̄im. ¹⁰ Jesic jém p̄ixiñtam tsam aw̄ixtámpa, tsam acujíptámpa. Ocmi cuando anict̄ooba eybic jém tungac barcojom, jeeyaj achiita titam atogóyayta iganam anictámpa.

Jém Pablo núcpa Roma

¹¹ Cuando anyajta tres meses jém isla de Malta, atiḡiyta tungac barcojom. Jém barco iñascat̄im jém tiempo de succuc jeet̄im isla. Tsucum jém attebet Alejandría. Jém barcoyucmi it w̄isten watnas iñiyi Cástor y Pólux. ¹² Anúcta niañ̄naca tum attebet Siracusa. Tucunajama ats̄iyta. ¹³ Jesic icquímayyaj jém barco ivela, moj aniquit̄am. Anúcta jém attebet Regio. Icuquejama poypa jém tsapsawa, jesic jém tungac jama anúcta jém attebet Puteoli. ¹⁴ Jemum ampáta algunos jém tant̄iw̄itam. Jeeyaj acunucsayta iga ats̄iyt̄amiñ tum semana con jeeyaj. Ocmi moj aniquit̄am Roma. ¹⁵ Jém tant̄iw̄itam jém ityajw̄ip̄ Roma, ijodón̄ayaj iga anúctamtooba, miñ amétsta tum lugar iñiyi Foro de Apio. Núcyaj algunos hasta jém Tres Tabernas. Cuando iix jém Pablo iga núcyaj jém tant̄iw̄itam, moj ichi gracia Dios, más da c̄ñpa. ¹⁶ Cuando anúcta Roma, jém

capitán icijunꝓcot jém tunꝓac presoyaj jém coman-
dante icijom. Pero ijíc iga da i ipaj jém Pablo.
Jígayta iga nic iti tunꝓac añeymi con tum soldado
jém iwatpáppic cuenta.

Jém Pablo inmatpa jém Dios inmati Roma

¹⁷ Cuando nasne tucunajama, jém Pablo inwejay
jém anjagooyiyaj de jém judíos, jém ityajwip Roma.
Cuando antuumaneyajum, nímayyaja:

—Mantiwitam, da ammalwadáy jém Israelpic
pixiñtam ni datim anwatne en contra de jém
wiñicpic tanꝓcostumbre jém tachiiñewip jém
wiñicpic tanjatunꝓewetam. Pero amatsta
Jerusalén, acijunꝓcotta jém gobernador icijom.

¹⁸ Cuando yaj acipin, acutsigaytooba idic porque
da ti apádáy iga accaataiñ. ¹⁹ Pero jém judíos da
ijíc iga acutsigaytaiñ. Jeeyucmi anwác iga acipíniñ
jém Romapic anjagooyi mex da anquejajwadaytooba
jém antiwitam jém judíos. ²⁰ Jeeyucmi manꝓcutsadáy
anmati iga miñi aámtaami iga mananmatpa. Ich
atsenne con yip cadena porque anꝓcupicpa iga Dios
icpíspa jém caaneyajwip. Jesanetim icupicyaj jém
Israelpic pixiñtam dende wiñigam.

²¹ Jesic jém miññeyajwip Roma inímáy jém Pablo:

—Da ampictsonne ni tum toto de jém naxyucmi
de Judea iga ti inñascane mimich. Ni tum jém
tantiwitam, jém miññeyajwip jém Jerusalén, da
anmadayyaj iga mich immalwatne. ²² Agui amma-
tonꝓtooba jém anmati jém michpic ininmatpa porque
anjodónane iga jut quej tsam jóyixtap yip jomipic
anquímayooyi.

23 Jesic jeeyaj icámayyaj tum jama iga miñyajiñ eybíc iga imatonɣajpa jém Pablo. Cuando núc jém jama, miñyaj tsam jáyan jém Romapíc pìxiñtam hasta jém ticcim jut it jém Pablo. Dende tsúyítim hasta tsuáj inmadáy jém pìxiñtam jutsap injac Dios jém ityajwip yíp naxyucmi. Inquejáypa iga Jesús je jém Cristo jém icutsatnewip Dios. Inquejáy con jém wiñicpic anquímayooyi jém ijaychacnewip jém Moisés y jém wiñicpic anmatcwiñ. 24 Algunos jém pìxiñtam icupicyaj jém Pablo inmadayooyi. Pero jém tungacyaj da icupicyaj. 25 Jém dapíc iwianjamyaj moj niquiyaj. Cuando cunigayyaj, nim jém Pablo:

—Wimim jém Dios iAnama cuando iñímáy jém wiñicpic tanjatunwewetam por medio de jém wiñicpic anmatcwiñ jém Isaías. Yimpic nim:

26 Nigi nímaayi yíp pìxiñtam:

Numa immatonɣámpa jém anmati, pero da incutiyíypa.

Numa iñixtámpa, pero da injodónatámpa.

27 Porque yíp pìxiñtam ianama tsam pimi malo,

tsam iñejamatonɣpa,

jém iixcuy inmichñe,

iga odoy ixixóyiñ con iixcuy,

ni odoy matónóyiñ con itatsic,

ni odoy icutiyyíyiñ con ianama,

ni da icacpa ijixi iga anaccáyáypa itañca.

28 Jodónataami iga dende sip Dios icutsadáypa jém tungac pìxiñtam jém wibíc anmati iga Dios

taciacputpa. Cutsadaytap jém tungac p̄ixiñtam, jém dap̄ic je de Israel. Jeeyaj numa imatonjajpa.

²⁹ Cuando yajum in̄mat jém Pablo, nicyaj jém judíos. Tsam aṅayajpa entre jeeyaj.

³⁰ Jesic jém Pablo tsíy wisten am̄tiy jém tic̄im jém iñúcsnew̄ip. Ipīctsonjajpa itump̄iy jém miñp̄app̄ic iám. ³¹ In̄madáypa jém p̄ixiñtam iga Dios in̄jactooba jém ityajw̄ip ȳip naxyucmi. In̄quejáypa jém tán̄omi Jesucristo in̄químayooyi. Da c̄iṅpa jém Pablo, da i imooḡíypa. Jemum cuyaj.

**Jém jomipic trato jém iwatnewip tánomi
Jesucristo
New Testament in Popoluca, Highland**

copyright © 2009 Wycliffe Bible Translators, Inc.

Language: Popoluca, Highland

Translation by: Wycliffe Bible Translators, Inc.

Popoluca, Highland

poi

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoluca, Highland

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

da18b773-264a-519b-a8dd-012e48df725d